

IPIRINIVENTAVAGEIGIRIRA IRITIGANKANEEGI JESO

Jeso ikantakera iripokakera Isure Tasorintsi

1 ¹¿Aiñovi Teopiro notasanotarira kametikyarika pinake? Narori aiñona aka kametikya nonake. Karanki notsirinkakempi nokamantakogetakero magatiro yovetsikagetakitirira Jeso, aikiro yogotagantagetutirira ²⁻³asatyogavagetanaara iatanaira enoku. Yatsipe-reavagetaketari ikamakitira, kantankicha antari yanianaira tera aiñokya iriatæ enoku onti inanai 40 kutagiteri ikoneati-mogeigapanaatirira iritigankaneegei yagaigakerira okyara kameti inelasanoi-gaeriniri irogotasanoigakera arisano yanianai. Aikiro ikamantakogetanakerira Tasorintsi tyara ikantaka ikavintsaantavagetakera itigankantakaririra inkamaventaigakerira maganirō kameti irogavisaakoigakerira kematsaigakerineririra impegakempara Igoveenkariegite. Aikiro yogotagaiganakeri tyara inkantaigakempa iriaigakera inkenkitsaiganakerora Niagantsi Kametiri irapagiteavageiganakemparora magatiro kipatsi, intitari gotagakeri Isure Tasorintsi tyara inkantaigakerira. Impo aganakara 40 kutagiteri ario iatanai enoku.

⁴Impogini itentaigakarira isekataigakara ikantaiganairi:

—Karanki nokamantaigakempi ikantakera Apa intigankimoigakempira Isure. Maika gatata piaigai parikoti,

pinaigaketa aka Jerosarenku pogiaigakera intsatagakerora ikantakerira.

⁵Yogari Joan onti yogiviatantavagetake niaku, kantankicha maika choenitapaake agakempara kutagiteri iripokantakemparira Isure Tasorintsi intimasurentaigapaakempira intinkamiigapaakempira.

Iatanaira Jeso enoku

⁶Impogini yapatoitaigakara iriroegii ikantaigiri:

—Notinkami, ¿ario maika pampatoitai-gaena naroege iseraeeregi pimpegakempara Nogoveenkariegite pimpugamentaigakenara kameti nontimaigaeniri kogapage?

⁷Ikantaigiri Jeso:

—Gara povankinaventaigarō pogoigakerora tyarika onkantagetanakempa impogini, panirotari Apa yogotakerora. ⁸Kantankicha antari iripokakera Isure intimasurentaigakempira ario pinkante iragaveakagaigakempi pinkamantakoiganakenara Jerosarenku. Ario pinkañotagaiganakero Joreaku ontiri aikiro Samariaku. Impogini pintsoenkagiteavageiganakero magatiro kipatsi pinkamantakoigakenara.

⁹Iroro yagatanakera iniaiganairira iriroegi ipampogiaigavakeri yogaenokanaara iatanaira enoku, impo omanakotanakeri menkori, asatyō ipegaka tenige inkoneatae. ¹⁰Impo aiñokyara ineventaiga enoku, ineaigutarityō yaratinkaigapaake piteni surari kutasamatavagetake ¹¹ikantaigapaakeri:

—Viroegi Garireakunirira, ¿tyara pikantaigakara atanatsira pineventaigana enoku? Maika pineaigavairi Jeso iatanaira enoku, ario inkañotapaempa impogini impigaatera.

Matiasshi ipugairira Jorashi

¹²Iriroegi ovashi iaiganai Jerosarenku. Ogari Jerosaren tera osamanitakotero otishi paitacharira Orivoshi, intagati onake ariorika patiro kirometero. ¹³Iroero yogonkeigapaakara ikiaigapaake pankotsiku yagatsonkuiganake enoku. Ariotari kara imagaigakeri Perero, Joan, Santiago, Anturishi, Jeripe, Tomashi, Varitorome, Mateo, Santiago itomi Arejeo, Sumo Komperagetatsirira intiri Jorashi itomi Santiago. ¹⁴Maganiro irooegi omirinka yapatoitaigaka ipirininventavageigakerora iniaigakerira Tasorintsi itentaigakarira irirentiegi Jeso ontiri iriniro ontiri aikiro pashini tsinaneegei.

¹⁵Impogini yapatoitaigakara tovaini kematsaigatsirira ariorika inaiageke 120. Impo yaratinkanake Perero ikanti:

¹⁶“Napiagematsaegine, maika onti otsatagunkani itsirinkakotanakerira Iravi pairani yogotagakerira Isure Tasorintsi nerotyo iniaikotantakaririra Jorashi mampiaiganakeririra gaigakerineririra Jeso. ¹⁷Irirotari atentaigavetakarira okyara ikañoigavetakai aroegi agiaigirira Jeso. ¹⁸⁻¹⁹(Impogini iatake ishitikakara inchatoku yashirianaka itonkanake imotiaku tokn okonteviotanake iramporetsa. Iroero ikemakoigakerira Jerosarenkunirira ovashi ipaiigakero oga kipatsi ikamantakarira Asererama. Antari irinianeku onti onkantakera: ‘Iraatsigiteri.’ Impogini opunaventantunkani oga kipatsi koriki yagakerira Jorashi ipunatunkanira yagakagantakerira Jeso.) ²⁰Otsirinkako-

tunkanitari sankevantiku paitacharira Saremo okanti:

‘Ovashigantanakenkanira ivanko gara tyani timantumataaro.’

Aikiro okanti:

‘Pashinikya pugaerine irantavageta-
kenerira Atinkami.’

²¹⁻²²“Maikari maika aiñoegi aka atentavageigakarira karanki ikyara yogiviatke Joan Jeso kigonkero iatanaira enoku. Maika tsame agaigaera pashini pugaerineririra Jorashi kameti irironiri antentaigake ankamantakoigakerira Jeso yanianaira.”

²³Impogini ikaemaigake piteni. Paniro ipaita Jose ikantaganirira Varesava Goshito. Yogari irapitene ipaita Matiasshi. ²⁴Impo iniaigakeri Tasorintsi ikantaigiri: “Notinkami, pineasurentaigiritari maganiro matsigenkaegi. Maika nokogaigake nogoigakera tyani pikogake impugaerira Jorashi ²⁵impegaempara iritigankane Jeso intentaigae-nara. Yogari Jorashi kamaketari iatakera tyarika kara okatinkatakerira pikantakerira iriatakera.”

²⁶Impogini isokagiaigakero mapukicho ogotantaganirira kameti irogotantaigakemparora tyanirikara onkatinkatake. Impo inti okatinkatake Matiasshi iriroyka pegaacha iritigankane Jeso ovashi itentaigaari itovaireegi^a iritigankaneegei.

Ipokakera Isure Tasorintsi intimasurentaigakerira kematsaigatsirira

2 ¹Impogini agapaakara kutagiteri okantaganirira Pentekoshite ario inaiageke maganiro kematsaigatsirira yapatoitaigakara pankotsiku. ²Impo katsiketio ikemaigutarotyo opoimaenkatapaake kañoenkamataka omarane tampia oponiaenkatapaaka enoku. ³Impogini okoneagematapaake kaño-

a 1.26 Itovaireegi: irinianeku virakocha onti okantake *los once*.

taka omorekira tsitsi okatinkatageiga-paakeri paniropage iriroegi ⁴ovashi itimasurentaigapaakeri Isure Tasorintsi oga ikenaiwake iniantaiganakaro pashini-page niagantsi terira inkemumaigero, intitari niakagaigakeri Isure Tasorintsi.

⁵Ario inaiwake kara Jerosarenku tovaini jorioegi tsatagageigirorira itsirinkakotanakerira Moiseshi, onti iponiageigaka pashinipage kipatsi.

⁶Iroo ikemaigavakerora opoimaenkata-nakera ishigaigamatanakaty yapatoventaiganakarira maganiro kematsaigatsirira ovashi ikemaigapaakeri iniantutaiganakarira irinianeeegi. ⁷Itsarogava-geiganaketyo yogavageiganake kavako ikantavakagaiganakara:

—¿Matsi teratyo iriroegi Garireakunirira maganiro yogaegi? ⁸¿Tyara okantakara akemaigakerira iniantaiganakarora niagantsipage?, akemaigakeritari maika iniantaiganakarora anianeeegi ⁹aroege poniageigankicharira parikotipageku Paretoku, Meroku, Irameku, Mesopotamiaku, Joreaku, Kaparoshiaku, Pontoku, Ashiaku, ¹⁰Pirijiaku, Pampiriaku, Egipitoku, aikiro okaragetanakera Irivia oatakara Shireneku ontiri aikiro Iromaku. ¹¹Aiñoegi jorioegisanorira intiegiri aikiro pashini giatakoigiririra. Aikiro aiñoegi poniageigankicharira Keretaku ontiri Araviaku. iMaganiro aroegi akemaigavakeri iniantaiganakarora anianeeegi ikamantakoigakerora yovetsikagetakerira Tasorintsi yogikoneatakerora iragaveane!

¹²Itsarogavageiganake yogavageiganake kavako ikantavakagantaigakarira: —iEjee! ¿Tataty oitara oka?

¹³Kantankicha ikonogagarantaigaka onti isamatsanaigakeri ikantaiganakera: —iOnti niakagaigakeri ishinkiro!

Ikenkitsavagetakera Perero

¹⁴Yaratinkamatanaketyo Perero itentaiganakarira maganiro iritiganka-

neegi Jeso inianakera imaraenkarikatyo kara ikanti: “Atsi kemisantaigavakena nonkamantaigakempira maganiro viroegi Joreakunirira intiegiri timaigatsirira aka Jerosarenku. ¹⁵Maika pineaigakena ontinirikatyo noshinkii-gaka, kantankicha teratyo ario noshinkiigempa, ikyenkatari gaenokapaacha poreatsiri. ¹⁶Ontityo otsatagana-kara ikamantakotanakerira pairani kamantantatsirira Joere ikantakera:

¹⁷‘Ikantake Tsorintsi: Impogini

panikyara ontsatagagetana-kempa magatiro nosariagetakarira pairani

nontigankimoigakeri Nosure intima-surentaigakerira maganiro matsigenkaegi.

Yogari ananekiegi noniakagaigakeri inkamantakoiganakenara.

Yogari ikyenkarira gaenokageiganankichane noneakagaigakeri posante, kantankicha onti onkañotimoigakempari igisani-reku.

Yogari gatavageiganaacharira onti noniaigakeri igisanireku.

¹⁸Ario nonkañotagaigakeri nomperaneeegi, surariegi ontiri tsinaneegi,

nontigankimoigakeri Nosure intima-surentaigakerira iriniakagaigakerira inkamantakoigakenara.

¹⁹Antari enoku inkiteku nogikoneagematero terira oneimagetenkani, aikiro nogikoneagematerotyto nagaveane aka kipatsiku oneanakenkanira iraatsi, aikiro omorekagematanaketyo tsitsi, ontiri aikiro tsitsienka ontinkamiskantavagetanake.

²⁰Antari nontsatagagetanakerora magatiro nosariagetakarira pairani intsivakanake poreatsiri.

Yogari kashiri inkiraamentatanake
inkañotanakemparo iraatsi.

Irorotari pairorira avisake onkoveen-
katakera kutagiteri nogikonea-
tantakemparorira nagaveane.

²¹ Kantankicha nogavisaakoigakeri
maganiro kantaigakenanerira:
Notinkami, gavisaakotena.'

²² "Maikari maika, viroegi iseraeeregi,
kemisantasanoigena nonkamantaigakem-
pira. Inti nonkamantakotake Jeso
Nasarekunirira. Yagaveakagagetakeri
Tasorintsi yovetsikagetakerora terira
oneimagetenkani, pogoigaketari
yogikoneatimoigakempirora iragaveane.

²³ Kantankicha igantaga yogotakera
Tasorintsi tyara inkantakenkani Jeso,
irerotari kantankitsi okyasanyokara
iragakagantakenkanira irogakagantaken-
kanira. Nerotyo pagakagantantaigakari-
rira pogakagantaigakerira pikantaigakera
inkentakoigakerira kañovageigacharira
terira iriroegi jorioegi. ²⁴ Kantankicha
yoganiairi Tasorintsi ganiri ikonoituma-
tari igamaga, teranika agaveimateri
kamagantsi. ²⁵ Yogari koveenkari Iravi
ikamantakotanakerira Jeso ikanti:

'Ikantakani itentakena Notinkami,
omirinkatari inake nonampinaku
kameti ishintsitagakenaniri ganiri
tatoita nopinkumati,

²⁶ irerotari noshinevegetantanakarira
nosureku,

aikiro noniakerira nokantakeri:
Noshineventavagetakempityo
kara,

nogotaketari nonkamakerika
nontinaanae,

²⁷ gatanika povashigantaro nosure
ontentakemparora isureegi
kamaigankitsirira,
teranika pinkoge oveseganakempara
novatsa,
nantitari pomperane terira inkaño-
vegetumatempa.

²⁸ Pogotagakena tyara nonkantakempa
nonkantakanira nontimake
viroku.

Pinkantakani pintentakena pogishi-
neasanotakenara.'

²⁹ "Maika, napigematsaegine, agotasa-
noigake tera ikiiro niakotachane Iravi
yashikiiganakairira, ikamaketeri pairani
impo ikitataagani, ariotari onakeri
ikitatantaarira aka. ³⁰ Irirori inti kamantan-
tatsirira. Yogari Tasorintsi iniakeri ikantiri:
'Impogini intimake piyashikitanakerira
pegankichanerira igoveenkariegite
maganiro iseraeeregi inkañotaempira viro.
Garatyo namatavitimpi, nantitari Tasorin-
tsi.' ³¹ Irerotari yogotasanovegetantakarira
Iravi pairani iranianaera lkogakagakerira
Tasorintsi intigankakerira impegakempara
Igoveenkariegite iseraeeregi, nerotyo
ikamantakotantakaririra ikantakera gara
ovashigantagani isure ontentakemparora
isureegi kamaigankitsirira, ario onkaño-
take ivatsa irorori gara ovesegumata.

³² Irerotari yoga Jeso yoganiarira Tasorin-
tsi, noneasanoigakeritari maganiro
naroegi. ³³ Impogini yovirinitairi
inampinaku irakosanoriraku ovashi
ipakeri Isure ikantakeririra pairani
impakerira kameti intigankakeriniri aka
kipatsiku intimasurentaigakerira maganiro
kematsaigatsirira. Maikari maika pokake,
nerotyo magatiro oka pineageiganakerira,
aikiro pikemageiganakerira, irerotari
kañotagaketakero maika. ³⁴ Yogari Iravi
teratyo iriro kenkitsatakotaachane ikiiro,
teranika iriro atatsine enoku, intityo
ikantakotake Jeso ikantantakarira maika:
'Yogari Tasorintsi iniakeri

Notinkami ikantiri:

Viro Notomi, piriniteta aka nonam-
pinaku

³⁵ kigonkero nagaveaigakerira
maganiro kisashiigakempirira.'

³⁶ "Maika nokogake pogotasanoiga-
kera maganiro viroegi iseraeeregi,

yogari Jeso pikentakotagantaigakerira ipegakagakari Tasorintsi Itinkami maganiro kematsaigiririra, irirotari ikogakagake okyara intigankakerira irogavisaakoigakaera.”

³⁷Iroto ikemaigavakerira ikenkisurea-vageiganaka ikantaigiri Perero intiegiri itovaireegi iritigankaneeji Jeso:

—Maika, notovaireegi, ÷tyampa nokantaigakempa?

³⁸Ikantaigiri Perero:

—Pakuaiganakero povetsikagegira terira onkametite pinkantatigaiganakempa pogiviatagantaigakempara pokotagantaigakempara arisano pikematsaigakeri Jesokirishito kameti imagisantaeroniri Tasorintsi pikañova-geigara. Impogini intigankimoigakempiri Tasorintsi Isure intimasurentaigakempira. ³⁹Ario inkañotagaigakempi maganiro viroegi intiegiri maganiro piyashikiiganakerira, aikiro maganiro parikotipagekunirira. Arisanotyo intimasurentaigakeri maganiro inkematsatagaigakerira Atinkami Tasorintsi.

⁴⁰Yogari Perero ariompatyo iniaiganakeriri ikantaigiri:

—Pakuaiganakero pikañovageigara pinkantaigakerira Tasorintsi irogavisaa-koigakempira ganiri itentagantaigimpiri pitovaireegi vetsikaigankitsirira terira onkametite inkisashiigakemparira impogini.

⁴¹Iroto ikemaigavakerira ikenkitsava-getakera ishineventaiganakaro ikantakerira ovashi yogiviatagantaigaka. Itovaigavagetitoyo kara kematsaigankitsirira, ariorika iniaigake 3,000. ⁴²Omirinka ipiriniventavageigakero ikemisantaigakerora yogotagaigakeririra iritigankaneeji Jeso, tera irapakumaigero. Onti itentavakagaigaka ikemavakagaigakara, aikiro iniaigakerira Tasorintsi ontiri aikiro yogaigakarora pan isuretakoigakarira Kirishito ikamaventaigakaira.

Tyara ikantaigaka iketyorira kematsaigankitsi

⁴³Maganiro neaigakeririra iritigankaneeji Jeso yovetsikageigakera posante terira oneimagetenkani yogavageiganaketyo kavako. ⁴⁴Kantankicha yogari kematsaigankitsirira itentavakagaigaka ikemavakagaigakara, tera intsaneapitsavakagaigempa tatarika oita yashintaigaka. ⁴⁵Aikiro ipimantaigakero tatarika oita yashintaigaka yagantaigakarora koriki ipaigakerira maganiro kogakovageigacharira. ⁴⁶Omirinka kutagiteri yapatoitapiniigaka ivankoku Tasorintsi. Antari pankotsipageku itentavakagaigaka isekataigakara. Ishinevageigaka tera iraventakovageigempa. ⁴⁷Ishineventavageigakeri Tasorintsi ineaigaketari paio ikavintsavaveigakeri. Maganiro matsigenkaegi timaigatsirira kara ineaigakerira ikañoigakara maika ishineventaiganakari. Omirinka kutagiteri yogari Atinkami atanatsitoyo ikematsatagaigirira pashini itentaigakarira kematsaigatsirira ariompatyo itovaiganakeri.

Yoganuitunkanira terira iranuitumate

3 ¹Impogini yogari Perero intiri Joan iaigake ivankoku Tasorintsi. Omirinkatari inanaira shavini poreatsiri iatapiniigi maganiro jorioegi iniaigirira Tasorintsi. ²Ario ipirinitake kara sotsimoroku terira iranuitumate, kantaka ikyara mehotankitsi. Ariotari yamapiniigiriri yovirinitapiniigirira kameti inevivageigakeriniri igorikite kiapiniigatsirira. Ogari sotsimoro onti opaita Kametiri. ³Irirori ineaigavakerira Perero intiri Joan yaiñonii-gapaakara yakontsaanake ineviigavakerira igorikite. ⁴Iriroegi ipampogiaiganakeri, impo inianake Perero ikanti:

—Atsi gaigena kavako.

⁵Irirori yogaiganakeri kavako yogiakovetakara inei ariori impaigakeri koriki. ⁶Kantankicha Perero ikantiri:

—Narori mameri tatampa nompakempi, tera intimenika nogorikite, kantankicha yagaveakagakena Jesokirishito Nasarekuni nirira novegaempira, nerotyo maika atsi kaviritanake nuitanake.

⁷Impo ikatsatakeri irakosanoriraku yogaratinkakeri. Oga ikenake ishintsitana ke igitiku ontiri aikiro igunkekiku.

⁸Yaratinkagantsimatanaketyo yanuitanaka ovasi yogiaiganakeri Perero intiri Joan ikiaiganakera tsompogi. Tyarikarorokari imitamitavagetaketyo ishineventanakarira Tasorintsi ikanti: “IPairo ikametiti Tasorintsi ikavintsavaagetakenatari!” ⁹Antari ineaigavakerira maganiro ¹⁰ogatyo ikenai gake yogavageiganaketyo kavako, yogoigaketari inti pirinitapinitatsirira ivankoku Tasorintsi inevariantavagetira koriki.

Ikenkitsavagetakera Perero ivankoku Tasorintsi

¹¹Impo irirori ikantakanityo ikatsatkovageigakeri imanchakiku Perero intiri Joan. Maganirotyo yogavageiganake kavako, ishigaigamatanaketyo iaigakera inaigakera iriroegi anta ovetsaenakara otinkamipoa okakaratsenkoatakera okantaganirira Irashi Saromon. ¹²Ineaigavakerira Perero ikanti: “Viroegi iseraereegi, čtyara okantakara pogaiganakera kavako? Pipampogiaiganakenara kañomataka nantieginirikaty kametiri, kañomataka tsikyatanirikaty noganuitakeri yoka. ¹³Kantankicha teraty tsikyata naroe gi gaveaigatsine, intityo gaveakagakena Tasorintsisanorira ikematsasanoigirira yashikiiganakairira Avera n, Isaako intiri Jakovo.^b Irirotari ganiari Jesokirishito itigankakerira inkamaventaiga kaera impo yovirinitairi inampinaku irakosanoriraku. Yogari Jesokirishito irirotari pagakagantaigakerira viroegi

pikantaigakerira Pirato irogakagantakerira. Yogari Pirato ikogavetakaniroro irapakuaerimera, kantankicha viroegi tenirototy pinkogaige. ¹⁴Tera pinkogumaige irapakuaenkanira yoga Pairorira Ikametiti terira inkañovagetumatempa. Inti pikogaigake irapakuaenkanira gantatsirira. ¹⁵Ariotari pikañoi gakeri maika pogakagantaigavetakarira yoga ganiantatsirira, kantankicha yoganiari Tasorintsi, noneasanoigakeritari yanianaira. ¹⁶Irirotari nokematsasanoigakerira nogotasanoigaketyo arisano yagaveavagetake magatiro nerotyo pineantaigakaririra maika yanuitanakera yoka terira iranuitumate.

¹⁷“Maika, notovaireegi, nara nogotake tera pogoigenika pikañotantaigakarorira maika. Ario ikañoi gaka pitinkamiegi tera irogoige. ¹⁸Kantankicha antari ikañotakara maika onti itsatagetakero Tasorintsi ikantakerira pairani iniakagaigakerira kamantantaigatsirira ikamantakoigakerira Ikogakagakerira imegakempara Igoveenkari egite iseraereegi ikantaigakera iratsipereavagetakera inkamakera. ¹⁹Irorotari maika nonkantantaigakempirira pakuaiganakero povetsikageigira terira onkametite pinkematsasanoigakerira Tasorintsi kameti irisaankakeroniri pikañovageigara ovasi aganakempa ishintsitagaigakempira pisureku irogishineagakempira. ²⁰Impogini intigankimoi gaempiri Jeso, irirotari ikogakagake okyara intigankakerira irogavisaakoigakempira imegakempara Pigoveenkari egite. ²¹Kantankicha irirori maika kantaka irinakera anta enoku kigonkero inegintetaerora Tasorintsi magatiro intsatagetakera ikantakerira pairani iniakagaigakerira kamantantaigatsirira. ²²Ikantaketari Moisesi: ‘Impogini intimake paniro pitovaire kamantaigakempinerira tatarika

oita inkantake Tasorintsi, irirotari kogakagakerine inkamantantakera inkañotakenara naro ikogakagakenara nokamantantira. Tatarika oita inkantaigakempi pinkematsaigakerira. ²³Tyanirika garira ikematsatiri nonkisashitakempari ganige itentaigaari itovaireegi.^c

²⁴“Maganiro kamantantaigatsirira ikamantakogeiganakero magatiro pineaiganakerira maika. Iketyo ivatakero kamantantatsirira Samoiri, impogini imaiganakero impogiiganankitsirira. ²⁵Maikari maika viroegi pineaigakero itsatagetakera Tasorintsi magatiro ikamantakogeiganakerira iriroegi pairani. Aikiro itsatagakero ikantaigakeririra yashikiiganakempirira, ikantakeritari Averan: ‘Impogini intimake piyashikitana-kerira kavintsajaigakerinerira maganiro matsigenkaegi.’ Antari ikantakerira maika, vintiegityo isureigaka inkavintsajaigakempira.^d ²⁶Iroto yoganiairira Tasorintsi Itomi viketyo itigankimoigake inkavintsajaigakempira kameti pampakuageiganakeroniri pikañovageigara.”

Ikisaigunkanira Perero intiri Joan

4 ¹Aiñokyara ikenkitsavageigi Perero intiri Joan ipokaigapaake saseroro-teegi itentaigakari itinkamiegi sentaigirorira ivanko Tasorintsi intiegiri saroseoegei. ²Ikisaigapaakeri ineaigakera yogotagaiganakerira maganiro ikamantaigakerira iranaiaganaera impogini kamaigankitsirira inkañoiigakerira Jeso yanianaira. ³Ovashi yagaiganakeri yamaiganakerira, kantankicha tera tyara inkantumaigeri, onti yashitakoiganakeri, ataketari ochapinienkatanake. Antari onkutagitetanaera ario pinkante inkogakotagantaigakeri. ⁴Kantankicha ikonogagarantaigaka kemaigakerorira ikantaigakerira ikematsaigake, ariorika inageiga 5,000 surariegi.

⁵Impo okutagitetanaera yapatoitaigaka itinkamiegi saseroro-teegi itentaigakerira itinkamiegi jorioegi intiegiri aikiro gotagantaigirorira itsirinkakotanakerira Moiseshi. ⁶Ario inake itinkamisanorira saseroro-teegi paitacharira Anashi itentaigakerira Kaipashi, Joan, Arijantero intiegiri aikiro maganiro iitanepageegi. ⁷Impo itigankaigake iragaigakitenkanira Perero intiri Joan inkogakotagantaigakerira. Impo yamaiganunkanira ikantaigiri: —¿Tyanimpatyo gaveakagaigakempi? ¿Tyanimpatyo kantaigakempira poganuitakerira yoga terira iranuite?

⁸Yogari Perero itinkamitakaritari Isure Tasorintsi iniamatanaketyo iniaiganakerira patoitaigankicharira ikanti:

⁹—Irotoventi pikogakotagantavintsaga-kenara tyara nokantaigakeri noganuitaigakerira yoga terira iranuite ¹⁰maika nonkamantaigakempi kameti pogoigakenniri viroegi intiegiri aikiro maganiro iseraereegi inti gaveakagaigakena Jesokirishito Nasarekunirira noganuitantaigakerira. Yogari Jeso irirotari pikentakoigavetakarira, impogini yoganiairi Tasorintsi. ¹¹Viroegi onti pikañoiigakari ‘vetsikaigakerorira pankotsi terira irishineventaigavetemparo mapu pairorira okametitake, kantankicha yogari Tasorintsi ishineventakaro ipegagakakaro okusotantakarira pankotsi.’

Tera pinkematsaigerinika Jeso, kantankicha Tasorintsi ipegagakakari Itinkami maganiro kematsaigiririra. ¹²Irirotari itigankake inkamaventantakera irogavisaa-kotantakera. Teratyo intimumate pashini gaveatsinerira irogavisaa-kotantera, panirotyo ikantakara irirori yagaveakera.

¹³Antari ineaigakerira maganiro tera intsarogumaige, yogavageiganaketyo

kavako, ineaigiritari onti yantaigaveta ikitsavageigira, aikiro tera irogotagasa-noigenkani sankevanti ovashi ikantaigana-
nake impa irororakari itentavageigarira Jeso. ¹⁴Ariotari itentaigakariri terira iranuiwetempa, ityampatyo inkantaige iriroegi! ¹⁵Ovashi yogikontetagantaigakeri sotsi kameti iriniavakagaigakempniri iriroegi. ¹⁶Impo ikantaigi:

—¿Tyara ankantaigakeri maika? Maganirotari timaigatsirira aka ikemakoi-gakeri yovetsikaigakera terira oneimage-tenkani. ¿Matsi tyampa ankantaigero amanakoigakerora? ¹⁷Kantankicha maika tsame ankantaviigakerira kameti ganiri ikenkitsatakotumaigairi Jeso.

¹⁸Impo ikaemakagantaigairi ikantai-gakerira:

—Maikari maika gara pikenkitsatakotumaigairi Jeso, aikiro gara piniakotumaigairi pinkantaigakera yagaveavageti.

¹⁹Impo iriroegi ikantaigi:

—Atsi neaigeroty viroegi. ¿Tyati paio avisake okametitakera, irororika nonkema-tsaigakempira viroegi ontirika nonkema-tsaigakerira Tasorintsi? ²⁰Naroegi garatyo napakuimaigiro nonkamantakoigakerora noneaigakerira, aikiro nokemaigakerira.

²¹Ikantutaigaarityo aikiro:

—Gara pikenkitsatakotumaigairi Jeso, nokisaigimpikari.

Impogini yapakuaigairi, ineaigaketari tyampa inkantaigakeri inkisaigakerira, maganirotari ikantaiganake: “Paio yagaveavageti Tasorintsi”, ineaigaketari yoganuitakerira terira iranuite. ²²Irirori onti ishiriagakotaka 40 shiriagarini.

Ineviigakerira Tasorintsi iragaveakagaigakerira

²³Iroo yapakuaigairira iaigai ineaigakera irapigematsaegine ikamantaigapaakeri magatiro ikantaigakeririra itinkamipage. ²⁴Iroo ikemaigavakera maganiro iniaigakeri Tasorintsi ikantai-

giri: “Notinkami, paio pavisavageigakeri maganiro, virotari vetsikagetakerorira inkite, kipatsi, omaraani nia intiri maganiro timantagetarorira ontiri aikiro magatiro timantagetarorira. ²⁵Aikiro viro niakagakeri pomperane Iravi yashikiiganakenarira ikantakera:

‘¿Tatatyo oitara tsimajaigakeri maganiro matsigenkaegi terira iriroegi jorioegi ikisantaigakeririra Tasorintsi?

¿Tyara ikantaigakara isuregeigave-takarora posantepage terira onkametite garira yagaveaigine aigakerora?

²⁶ Maganiro koveenkariégi kipatsikunirira intiegiri itinkamiégi matsigenkaegi

yapatoventaiganakari ikisashiigana-karira Tasorintsi intiri Ikogakagakerira intigankakerira impegakempara Igoveenkariégite iseraereegi.’

²⁷“Otsataganakatari pikantakerira yapatoitantaigakaririra Erorishi intiri Pontsio Pirato itentaigakarira terira iriroegi jorioegi intiegiri iseraereegi ikemavakagaigakara irogaigakerira pomperane Jeso terira inkañovagetumtempa, irirotari pikogakagakerira impegakempara Nogoveenkariégite. ²⁸Virotari kantankitsi okyara ikañotantaigakarorira maika. ²⁹Notinkami, pikemavakero magatiro ikantaigakenarira ikisaigakenara. Maika nokogaigake pishintsitagai-gakenara naroegi pomperaneegi ganiri notsarogumaigi nonkenkitsaigakerora piniane. ³⁰Pagaveakagaigakenara kameti novegaigakeriniri mantsigaigankitsirira. Aikiro nokogaigake iragaveakagaigakenara pomperane Jeso terira inkañovagetumtempa kameti novetsikaigakeniri posante terira oneimagetenkani.”

³¹Iroo yagataiganakera iniaigakerira Tasorintsi ogaty okenake oshigekanake

pankotsi inantaigakarira okantanakera shige shige shige, itinkamitasanotutaiganaarityo aikiro Isure Tasorintsi. Impo iriroegi ovashi ikenkitsaiganakero Iriniane Tasorintsi teratyto insarogumaige.

Yamuvakagaigakara kematsaigatsirira

³²Maganiro kematsaigatsirira itentavakagaigaka ikemavakagaigakara. Tatarika yashintageigaka tera paniro irashintaigemparo, ontityo yashintaigakaro maganiro.

³³Yogari Tasorintsi ikavintsaavageiganakeri, aikiro yagaveakagavageiganakeri iritigankaneegi Jeso, neroty yagaveasannotantaiganakarira atanatsira ikamantaikoiganakeri yanianaira. ³⁴Maganiro tyanirika timaigatsirira igipatsiegite aikiro ivankopage ipimantaigakero yagantaigakarora koriki. Impogini yamaiganakeneri ³⁵iritigankaneegi Jeso kameti impageigakeriniri maganiro kogakogeigacharira, paniropage onti ipageigakeri akarika ikogakoigaka, neroty tenige intimae kogakovageigankichanerira. ³⁶Itimake pashini Tsiperekunirira iyashikitanakerira Irevi paitacharira Jose, kantankicha yogari iritigankaneegi Jeso ariokya ipaiigairi Verenave (onkantakera: “Gishineantatsirira”). ³⁷Irorori ipimantakero igipatsite yagantakaro koriki. Impogini yamaigakeneri iritigankaneegi Jeso.

Yamatagakara Ananiashi ontiri Sajira

5 ¹Kantankicha itimake pashini paitacharira Ananiashi itentakaro itsinanetsite opaita Sajira, ipimantaigakero igipatsite ²yagantaigakarora koriki, kantankicha yagagarantavakeri. Yogari aiñokyarira inai yamaiganakeneri iritigankaneegi Jeso. ³Kantankicha Perero ikantavakeri:

—Ananiashi, ÷tyara okantakara pikematsatakerira Satanashi pikogantavetakarira pamatavinatakerimera Isure Tasorintsi pagagarantantavaarira koriki

ipunaitakempirira pigipatsite? ⁴÷Matsi tera viro shintasanotemparone okyara? Ario okañotaka maika pipimantakerora, ÷matsi tera viro shintemparine koriki? ÷Antari gara pikañotiro maika? Pikañotakerora maika pamatagakara pineiri ariori narogegiri pikañogake maika, teratyto intityo pikañogake Tasorintsi.

⁵Iroto ikemavakerira ogatyto ikenake ituanake ikamanake. Maganiro kemakoigakeririra itsarogavageiganaketyo kara.

⁶Impo ikiaigapaake ikyaenkarira gaenokai-ganankicha yagaiganakeri iponaiganakeri yamaiganakerira inkitaigaerira.

⁷Impo osamanivagetanakera okenapaake itsinanetsite okiapaake, tera ogovagetumatenika ikamakera ojime.

⁸Yogari Perero ikantavakero:

—Atsi kamantena, ÷arisano ipakenari pijime maganiro koriki pagantaigakarorira pigipatsiegite?

Irorori okanti:

—Jeeje, arisanoniroro ipakempiri maganiro.

⁹Ikantutarotyto:

—÷Tyara okantakara pikemavakagaigakara pamatavinaigakerimera Isure Tasorintsi? ÷Matsi pineaigiri gari ikisaviigimpiro? Neriegi yonta kitaigaatiririra pijime, maika virokya inkitaigaate.

¹⁰Iroto ikantakerora oga okenake otuimotanakeri okamanake. Impo ikiaigavetapaaka ineaigapaakero irorori kamake. Irorokya yagaigapanuti inkitaigaaterora inaira ojime. ¹¹Antari ineaigavakerora okañotanakara maika ogatyto ikenagake itsarogavageiganake maganiro kematsaigatsirira naigankitsirira kara. Ario ikañoiga aikiro maganiro kemakoigavakerorira.

Ikisaigunkanira iritigankaneegi Jeso

¹²Yogari Tasorintsi yagaveakagaigakeri iritigankaneegi Jeso yovetsikimotantaiganakaririra matsigenka terira oneimageten-

kani. Maganiro kematsaigatsirira yapatoitapiniigaka ivankoku Tasorintsi ovetsaenkakara otinkamipoa okakaratsenkoatakera okantaganirira Irashi Saromon. ¹³Yogari itovaireegi itsarogaigake inkonoiigakemparira, kantankicha ishineventaigakari.

¹⁴Ariompatyo itovaiganakeri kematsaigakeririra Atinkami, surariegi ontiritinaneegi. ¹⁵Ineaigavakeritari yovetsikaigamati posantepage yamantaiganakaririra mantsigaigankitsirira yoginoriaigakerira avotsiku ishitaigakerira shitatsiku itimashitaigakerira Perero kameti ontsimankumaigaerira ivamparokite irovegaiganaempaniri. ¹⁶Ario ikañoigaka poniageigankicharira ochoenitira Jerosaren yamaigapaakeneri mantsigaigankitsirira intiegiri yatsipereakageigakarira kamagarini, maganiro yovegaiganaa.

¹⁷Kantankicha yogari itinkamisanorira saseroroteegi intiegiri saroseoegi tsipatasanoigaririra ariompatyo ikisaiganakeriri ineaigakera intiegira ishineventasanoiganunkani. ¹⁸Yagaigamatanakerityo yamaiganakerira yashitakotagantaigakerira. ¹⁹Kantankicha impogini onigankigitetanakera ipokashiigakeri isankariite Tasorintsi yashireakoigapaakeri yogikonteigairira ikantaigiri: ²⁰“Piaigae ivankoku Tasorintsi pinkenki-tsaimoigaerira maganiro pinkamantagakerira tyara inkantaigakempa kameti irogavisaakoigakenkaniniri.” ²¹Impo ario ikañoigakero maika okutagitetanaira iaigamanake ivankoku Tasorintsi itsitiiganairora yogotagantaiganaira.

Aiñokyara yogotagantaigi yogari itinkamisanorira saseroroteegi intiegiri itentaigakarira ikaemaigakeri maganiro itinkamipage iseraereegi yapatoitaigakeri. Iriroegi itigankaigake soraroegi iragaigakiterimera anta yashitakoigave-takarira iramaiganakerimera iriroegiku. ²²Kantankicha iaigavetaka mameri. Ipigaiganaa ²³ikantaigapaake:

—Noaigavetaka noneaigapaakero shitasanomataka yashitakotantaigakarira. Yogari kamaguigakeririra timashii-gamatake sotsimoroku ganiri ikonteigana, kantankicha nashireaigavetaro mamerigitematake tsompogi.

²⁴Iroo ikemaigavakera itinkamiegi soraroegi sentaigirorira ivanko Tasorintsi intiegiri itinkamiegi saseroroteegi yogaigana ke kavako ikantaigi:

—¿Yarikatyo ikantaigakara?

²⁵Ikenamatapaaketyo paniro ikantapaakera:

—Yogari pashitakotagantaigavetakarira chapi akya kogapage aña yogotagantava-geigai ivankoku Tasorintsi.

²⁶Impo ikemaigavakera itinkamiegi soraroegi iaigake kametikya yagaigakitari, itsarogaigaketari impitankaigakenkanira.

²⁷Yamaigapaakeri yogaratinkaigapaakeri yapatoitaigakara. Impogini inianake itinkamisanorira saseroroteegi ikanti:

²⁸—Nokantasanoigavetakempi pampakuaiiganakerora ganigera pikenki-tsatakotumaigairo yovetsikaigetana-kerira Jeso. Kantankicha viroegi tera pinkematsaigena, onti pikamantageiganakeri maganiro Jerosarenkunirira. Ontitari pikogaigake pinkantakagantagakenara ikentakotunkanira Jeso.

²⁹Inianake Perero intiegiri itovaire iritigankaneegi Jeso ikantaigiri:

—Iriompatyo nonkematsaigake Tasorintsi. ³⁰Arisanotari pogamagaigavetakari Jeso pikentakotagantaigavetakarira koroshiku, kantankicha yoganiari Tasorintsisanorira ikematsagirira yashikiiganakairira pairani.

³¹Yovirinitakeri inampinaku ipegakagakeri Atinkami, aikiro ipegakagakeri Gavisakotantatsirira kameti iragaveaigakeniri iseraereegi inkantatigaiganakempara irapakuaiiganakerora yovetsikageigira terira onkametite imagisantae-roniri Tasorintsi. ³²Noneasanoigakeri-

tari nokamantakotantaigakaririra. Ario ikañotaka Isure Tasorintsi ikamantakotakeri. Irirori inti itigankakerira Tasorintsi intimasurentaigakerira maganiro kematsatasanoigiririra.

³³Iroto ikemaigavakera ikisasanoigamatanakaty tyarikarorokari, ikogaigavetakaty irogakagantaigakerimera.

³⁴Kantankicha ario inake kara paniro pariseo paitacharira Gamariere.

Maganiro itovaireegi itasanoigakari. Irirori inti gotagantirorira itsirinkakotakerira Moisesi. Impo yaratinkamatanaketyo ikanti:

—Maiganakerita sotsi.

³⁵Impo ikantaigiri maganiro patoitai-gankicharira:

—Viroegi notovaireegi, tsikyanira pikisaigirikari kogapage, oketyo pisureta-kotasanoigakemparo. ³⁶Kañotari pairani itimavetakara Teorashi ikogavetakara iravisumatantakemera yogiaigavetanakari tovaini matsigenka, ariorika inai-gake 400. Kantankicha teratyo iragavee, ontityo yogunkani. Yogari giaigavetanakaririra oga ikenai-gake iparikotigeiganai tenige intentavakagaigampa. ³⁷Ario okañotaka aikiro pairani itsirinkakotagantaigakerira koveenkari irapatoire irogotakera akatovainirika inai-gake maganiro. Itimake pashini Garireakunirira paitacharira Jorashi. Irirori ikogavetaka iravisumatantakemera inkañotakem-parimera Teorashi. Ario ikañotaka irirori yogiaigavetakarityo tovaini matsigenka, kantankicha iroro yogunkanira oga ikenai-gake iparikotigeiganai giaigavetanakaririra. ³⁸Irorotari nonkantantaigakempirira maika arione yogaegi, pakuaigaeri gara tyara pikantaigiri. Magatiro oka yogotagantaigakerira tsikyatarika yagashiigakaro iriroegi tsikyatatyo ompeganaempa. ³⁹Kantankicha intirika tigankaigakeri Tasorintsi irogotagantavageigakera tyampaty

pinkantaigakeri. Intagarogiteni intirika pagashiventaiga Tasorintsi.

Iroto ikemaigavakerira ikantaigake:

—Irotoventi kametitake.

⁴⁰Impo ikaemakagantaigairi aikiro, ipasatagantaigakerira, impo yapakuai-gairi ikantaigavakeri:

—Maika nonkantavagakempi, gara pikenkitsatakotumaigairi Jeso.

⁴¹Impogini ikonteiganai iaiganai ishinevageiganaa, ineaigaketari inti yatsipereaventaigake Jeso, ⁴²neroty teratyo irapakuimaigero, onti yogotagantavageigake omirinka kutagiteri anta ivankoku Tasorintsi ontiri pashini pankotsipageku ikamantakoiganakerira Jeso ikantaigakera inti itigankake Tasorintsi irogavisaakoigakerira maganiro kematsaigakerinerira impegakempara Igoveenkariegite.

Ikogaigakera 7 mutakoigakerinerira kematsaigatsirira

6 ¹Impogini itovai-ganakeri kematsaigatsirira ovashi itsitiiganakero jorioegi niantaigarorira guriego iniashinaiganakarira itovaire jorioegi niantaigarorira evereo ikantaigakera tera impasanoigero osekaegi ogamakotagapage niantaigarorira guriego. ²Yogari iritigankaneeji Jeso yapatoitaigakeri maganiro kematsaigatsirira ikantaigiri:

—Tera onkametite nampakuaiganakerora nokenkitsavageigirora Iriniane Tasorintsi irorokyara nompiriniventavageiganake nompimantavageigakera sekatsi. ³Irorotari nonkantantaigakempirira maika pinkogaigakera 7 govageigatsirira pairorira inegintetasanovageiga itinkamiigakarira Isure Tasorintsi kameti iriroeginiri piriniventaigakerone impimantavageigakera. ⁴Naroegi onti nompiriniventavageigake noniaigakerira Tasorintsi, aikiro nonkenkitsavageigakerora Iriniane nogotagantaigakerora.

⁵Iroro ikemaigavakerira maganirosanotoyo ishineiganaka ikantaiganake:

—Kametitake.

Yagantaigakaririra Ishitivano, ineaigakeritari ikematsatasanovagetakera, aikiro itinkamitasanotakarira Isure Tasorintsi. Impogini imaigakeri Jeripe, Porokoro, Nikanoro, Timo, Parimanashi intiri aikiro Nikorashi. Yogari Nikorashi onti iponiaka Antiokiaku. Tera iriro jorio kantankicha pairani onti yogiatakoigavetari ikematsaigirira iriroegi. ⁶Impogini ikantaigi iritigankaneeji Jeso:

—Neri yogaegi.

Impo iriroegi ipatikaiigakeri igitoku iniaventaigakerira. ⁷Ariompatyo apagiteakovagetanakari Iriniane Tasorintsi Jerosarenku, itovaigavagetanaketyo kematsaigatsirira. Imaigamatanakatyosaseroroteegi iriroegi ikematsagarantaiganakera.

Ikisunkanira Ishitivano

⁸Yogari Ishitivano inti pairorira ikavintsaavagetakeri Tasorintsi yagaveakagavagetakeri yogikoneatimoigakerira irapijorioegitene terira oneimagetenkani.

⁹Itimaigake kara pashini jorioegi terira intentaigempari itovaireegi yapatoitaigara, onti yapatoitaiga pankotsiku okantaganirira “Irashiegi Tenigerira Ironampiigaenkani”. Impo iriroegi itentaigakari pashini ponaiagankicharira Sureneku, Arijanti-riaku, Surishiaku ontiri aikiro Ashiaku iatashiigakeri Ishitivano ipugananaigakarira ikenkitsavagetakera irorokyatyo ikantaigiri irorokyatyo ikantaigiri, ¹⁰kantankicha teratyo iragaveaigiri irogemisantaigerira, pairotari yavisake yogotakera, intitari gotagakeri Isure Tasorintsi. ¹¹Impo iriroegi ipunaigakeri pashini matsigenka kameti intsoeventaigakempariniri. Iriroegi ikantaigake:

—Nokemaigakeri ikantakera ganigera otsatagaagani itsirinkakotanakerira Moieshi, aikiro isamatsanatakeri Tasorintsi irirori.

¹²Iroro ikemaigavakera maganiro ikisaigamatanakatyos, imaigamatanakatyos itinkamiegi jorioegi intiegiri gotagantaigirorira itsirinkakotanakerira Moieshi. Yagaigapanutiri Ishitivano yamaiganakerira yapatoitaigakara itinkamipage. ¹³Impo ikaemaigake pashini tsoegaigankicharira ikantaigake:

—Yogari yoga onti ipiriniventanake isamatsananakerora ivanko Tasorintsi, aikiro ikantanake tera onkemetite itsirinkakotanakerira Moieshi. ¹⁴Noke-maigakeritari ikantakera: ‘Yogari Jeso Nasarekunirira irogituakero ivanko Tasorintsi, aikiro irogagagetakero magatiro yogotagaigakairira Moieshi.’

¹⁵Yogari patoventaigakaririra ikamagugavetakari ivoroku Ishitivano ineaigiro kañomataka ivoro isaankariite Tasorintsi.

Iniaventavetanaara Ishitivano

7 ¹Impo yogari itinkamisanorira saseroroteegi ikantiri Ishitivano: —¿Arisano pikañotakero maika?

²Irirori ikanti:

—Maika, notovaireegi vintiegiri notinkamiegi, atsi kemisantaigavakena nonkamantaigakempira. Pairani añaokyara Averan Mesopotamiaku tekyara iriate Jaranku, ikoneatimotakeri Tasorintsisanorira gaveavagetatsirira ³ikantiri: ‘Maika pokaiganakerira pitovaireegi piatakera parikoti pashiniku kipatsi nonkantakempirira pintimantakemparora.’ ⁴Iroro ikemavakera Averan ikematsatakeri iatanake iponianakara Karereaku iatakera Jaranku, kantaka itimakera kara. Antari ikamanakera iriri ariokya itigankakeri Tasorintsi ipokakera

aka pitimaigakera maika.^f ⁵Kantankicha tera impasanoteri kipatsi, teratyo irashintumatempo maani, onti ikashigagakagari ikantantakaririra: ‘Pinkamanakerika irokya shintaemparone piyashikiiganakerira.’^g Antari ikashigagakagarira tekyeenka intomintumatempa, ⁶kantankicha ikantakeri: ‘Yogari piyashikiiganakerira onti intimanampiantaigake, aikiro irashintai- gakenkani iromperaperaigakenkanira kogapage. Inkisavintsavageigakenkani kigonkero agavagetanakempara 400 shiriagarini. ⁷Kantankicha impogini naro nonkisashiigakempari shintaigakempari- neririra ovashi irapakuagaeri iripokaiga- kera aka irishineventasanoiganakenara intsatagageiganakerora nonkantaigakeri- rira.’^h ⁸Ikantakeri aikiro irogaratsaita- gantakempara ichonkirimeshinate, aikiro ario inkañotagaigakenkani iyashikiigana- kerira ogaratsaitakenkanira irashiegi iriroegi kameti ogotantakenkanira intsatagasanotakerora ikantakeririra.ⁱ Nerotyoto itomintakarira Isaako iroso aganakara 8 kutagiteri yogaratsaitakero ichonkirimeshinate.^j Impogini irokya Isaako itomintakarira Jakovo imatakeri irirori. Ario ikañotaka Jakovo irirori yogaratsaitakero ichonkirimeshinaegite itomiegi. Yogari 12 itomiegi iriroegitari yashikiiganakairira maganiro aroegi.^k

⁹“Paniro irirori ipaita Jose. Yogari irirentiegi paio yavishi ikisavintsavagei- girira ipimantantaigakaririra ironampita- kenkanira Ejipitoku. Kantankicha antari yatsipereakagunkanira ipugamentakeri Tasorintsi,^l ¹⁰nerotyoto ishinetantakaririra koveenkari paraon, ineakeritari yogova-

geti ikantantakaririra iriro kantankitsine magatiro ovetsikakenkanirira Ejipitoku. Aikiro ipegagakagari itinkamiegi inampi- naegi tavagetimoigiririra.”^m

¹¹“Impogini yatsipereavageiganake itasegane maganiro Ejipitokunirira intiegiri Kanaankunirira. Maganiro yashikiiganakairira tyampa iragaigakero iseka.”ⁿ ¹²Impogini Jakovo itigankaigakeri itomiegi Ejipitoku inevitantavageigaki- tera iseka, ikemakoigakeritari iriro timakoigankitsi turigoki ishatekagiigake- rora pankotsipageku itsoteigakarora irorori irogaigaempa impogini ontsonka- getanakempara magatiro.^o ¹³Impogini iaigaira aikiro ineiviigaaterira yogari Jose iokotagaigaari ikantaigakerira: ‘Nantitari pirenti’,^p ovashi yogotantakarira paraon inti evereo. ¹⁴Impogini yogari Jose ikaemakagantakeri iriri intiegiri aikiro maganiro iitaneegi.^q Maganiro iriroegi onti inaigake 75.”^r ¹⁵Nerotyoto iatantakarira Jakovo intimakera Ejipitoku.^s Impogini ikamanaira irirori^t intiegiri maganiro itomiegi yashikiiganakairira ¹⁶yamaiga- naagani inkitaigaenkanira Sukemeku, irorotari ipunaventanakerira pairani Averan ineviigakeririra itomiegi Amore.”^u

¹⁷“Impogini panikyara aganakempa intsatagakerora Tasorintsi ikantakeririra Averan pairani, itovaigavageiganake yashikiiganakairira Ejipitoku. ¹⁸Aikiro itimake pashini koveenkari terira inkema- kotumageteri Jose. ¹⁹Irirotari matavinai- gavetakaririra yashikiiganakairira yatsipereakagavageigakarityo kara iokakagaigavakerira itomiegi ikyeenkanira mehotankitsi kameti inkamaigakeniri ganigera itovaigai.”^v ²⁰Kantankicha

f 7.4 Jen. 11.31; 12.4. **g** 7.5 Jen. 12.7; 13.15; 15.16-21; 17.8. **h** 7.7 Jen. 15.13-14;

Ek. 3.12. **i** 7.8 Jen. 17.9-14. **j** 7.8 Jen. 21.1-4. **k** 7.8 Jen. 35.22-26.

l 7.9 Jen. 37.3—41.46. **m** 7.10 Jen. 41.39-41. **n** 7.11 Jen. 41.53-57.

o 7.12 Jen. 42.1-2. **p** 7.13 Jen. 45.1-5. **q** 7.14 Jen. 45.9-11, 16-20.

r 7.14 Jen. 46.26-27. **s** 7.15 Jen. 46.1-7. **t** 7.15 Jen. 49.33. **u** 7.16 Jen. 41.53—50.14;

23.1-2, 19-20; 25.9-10; 33.18-19; Jos. 24.32. **v** 7.19 Ek. 1.7-17, 22.

impogini imechotake Moiseshi, yogari Tasorintsi ishineventakari. Yomanaigave-takari tomintaigakaririra mavani kashiri.^w

²¹Impogini tenigera iragaveaigae iromanaigaerira yogaigakitiri parikoti. Impo oneakeri irishinto paraon aganakeri opegakeri otomi ogimonkakeri.^x
²²Yogotagasanotantunkanirira magatiro yogoigirira Ejipitokunirira, ovashi yogovagetanake inkenkitsavagetera.

²³“Impogini ishiriagakotanakara 40 shiriagarini ikoganai ineagaerira itovaireegi. ²⁴Iro-ro iatanaira ineapaakeri paniro ikisavintsavagetunkani, ipugamentanakeri yogakeri Ejipitokunirira kisakeririra. ²⁵Ineiri ariori irogoigavakeri itovaireegi inti tigankakeri Tasorintsi impugamentaigaerira iramaiganaerira parikoti, kantankicha iriroegi tera irogoigavakeri. ²⁶Impo okutagitetanaira ineagiri piteni itovaire kisavakagaigaka. Ikogavetaka irogame-tiaigaerimera ikantaigiri: ‘¿Antari gara pikisavakagaiga? Ariotari pikañovakagai-gakari intitari pitovaire.’ ²⁷Yogari kisakeririra irapitene itatsinkutarityo ikantiri: ‘¿Matsi tyanimpatyora kantakempi pimpegakempara notinkamiegi? ¿Tyanimpatyora pegakagakempi nojoseegite?’ ²⁸¿Ario pikogake pogakenara naro aikiro pinkañotagakenarira Ejipitokunirira pogakerira chapi?’ ²⁹Iro-ro ikemavakera Moiseshi ishiganaka iatake pashiniku kipatsi paitacharira Marian, ovashi itimuntevagetake anta ikonoiigakarira Mariankunirira, impo ario kara yagake tsinane itomintaka piteni.^y

³⁰“Impogini avisanakera 40 shiriagarini irirori inake anta osarigagitetapaakera ochoenitakotakaro otishi Sunai. Ario kara ikoneatimotakeri isaankariite Tasorintsi inantaka tanko omorekanake

aratsantsaenkagematanake. ³¹Yogamata-naketyo kavako, okya iavetanakara yaiñonivetanakarora ineasanotakero-mera ikemutarityo inianake Tasorintsi ikanti: ³²“Nantitari Tasorintsisanorira ikematsaigirira yashikiiganakempirira Averan, Isaako intiri Jakovo.’ Ogatyo ikenake Moiseshi itsarogamatanaketyo ishigekanakeara shige shige shige, teratyo irogumate kavako. ³³Impogini ikanti Tasorintsi: ‘Sapatoreempa, aiñona-tari naro aka. ³⁴Naro noneasanoigakeri nashintaigarira naigankitsirira Ejipitoku yatsipereavageigakera, aikiro nokemai-gakeri ikaemavaitaigakera, irorotari nopokantakarira nompugamentaigaerira kameti irapakuagaeriniri tsipereakagai-gakaririra. Maika nontigankaempi pimpiganaera Ejipitoku.’^z

³⁵“Irirotari yoka Moiseshi ikisaigavetakarira itovaireegi ikantaigavetakarira: ‘¿Matsi tyanimpatyora kantakempi pimpegakempara notinkamiegi? ¿Tyanimpatyora pegakagakempi nojoseegite?’ Maika nonkantaigakempi irirorari itigankake Tasorintsi imegakempara itinkamiegi irogavisaakoigakerira. Intitari mutakotakeri isaankariite Tasorintsi koneatimotakeririra tankoku. ³⁶Impogini yagaigaatiri yashikiiganakairira yovetsikagematanake terira oneimagetenkani anta Ejipitoku ontiri aikiro inkaareku paitacharira Kiraamonkiari. Ario ikañotaka aikiro anta osarigagitetapaakera yovetsikagemati posante terira oneimagetenkani kigonkero agavagetanaka 40 shiriagarini. ^a ³⁷Yogari Moiseshi irirorari kantaigakeririra itovaireegi: ‘Impogini intimimoigakempi paniro pitovaire kenkitsatsinerira. Intitari tigankakerine Tasorintsi inkañotagakenara itigankakenara naro nonkenki-tsavagetakera.’^b ³⁸Irirotari Moiseshi

w 7.20 Ek. 2.2. x 7.21 Ek. 2.1-10. y 7.29 Ek. 2.11-15. z 7.34 Ek. 3.1-10.
a 7.36 Ek. 7.8—11.9; 12.29-41; 13.17—14.31; Nm. 14.33.

tentaiganakaririra yapatoitaigakara osarigagitetapaakera. Yogari isaan kariite Tasorintsi iniakeri otishiku Sunai,^c impo irirokya kamantaigakeri yashikiiganakaririra. Irirotari kemakerorira niagantsi ganiantatsirira ovashi kantakani ogotagan tanunkanira, nerotyo agotantaiganakarorira aroegi maika.

³⁹“Kantankicha yogari yashikiigana kairira tenige inkogaigae inkematsaigae rira, onti ipintsapintsavageigavetaa Ejipitoku, ⁴⁰ikantantaigakaririra Aaron: ‘Nokogaigake povetsikaigakenara notasorintsiegite kameti iriroeginiri tentaiganaenane, tera nogoigenika tyarika itsatake Moiseshi gaigutanarira Ejipitoku, iataketari otishiku ovashi ipegaka tera impigae.’ ⁴¹Impogini yovetsikaigake itasorintsite ikañotagagakari ityomiani toro. Impo yovetisaigakeri piratsipage itagaigakeririra. Ishinevageiganaka ishineventaigakaritari yovetsikaigakerira.^d ⁴²Irorotari yapakuantaiganakaririra Tasorintsi impaigakanerira itasorintsite impokiropage. Itsirinkakoiganakerotari kamantantaigatsirira ikanti:

‘Viroegi iseraereegi,
antari pinaigakitira anta osarigagite-
tapaakera 40 shiriagarini,
¿matsi naro povetisaigakene piratsi-
page pimpaigakenara?

⁴³ ¡Teratyo!

Intitari pipegaigake pitasorintsiegite paitacharira Moroko,
nerotyo tyarikara piaigake pamava-
geiganakero ivanko inantarira. Aikiro pamavageiganakeri impokiro povetsikaigakerira viroegi pikañotagaigakaririra pitasorintsiegite paitacharira Irepa.
Viroegi pikañogakero maika

povetsikaigakera pishineventantai-
gakemparirira pipegaigakerira
pitasorintsiegite kogapage.

Irorotari maika nonkantantaigakem-
pirira impogini nagakagantai-
gakempira
iramaitanakempira samani avisana-
kara Vavironia.’

⁴⁴“Impogini yogari yashikiigana kairira yovetsikaigakeri Tasorintsi igamisapan-
kote anta osarigagitetapaakera. Ikañota-
gaigakero ikantakeririra Tasorintsi Moiseshi, iokotagakeritari anta otishiku tyara inkantaigakero irovetsikaigake-
rora.^e ⁴⁵Impogini ikamanakera Moiseshi, irirokya pugairi Josoe itentaigakarira yashikiigana kairira ipokantaigakarora oka kipatsi ikashigakagaigakaririra Tasorintsi yamaigakeririra igamisapan-
kote.^f Impogini yogonkeigavetapaaka ineagapaakeri terira iriroegi jorioegi timaigavetacharira aka, kantankicha impogini yoneagaigakeri Tasorintsi kameti impaigakeriniri irirokyaniri shintaigaemparone. Kantaka otimakera igamisapankote Tasorintsi kigonkero agavagetanakara itimakera Iravi. ⁴⁶Impo yogari Tasorintsi ikavintsaavagakeri Iravi. Impo irirori ikogavetaka irovetsika-
kenerimera pankotsisanorira. ⁴⁷Kantanki-
cha tera irovetsikeneri, inti vetsikakeneri Saromon.^g ⁴⁸Kantankicha yogari Tasorintsi timatsirira enoku tera intimantemparo pankotsi yovetsikaigirira matsigenka, ikantaketari kamantantatsirira:

⁴⁹ ‘Ikanti Tasorintsi:

Nanti Tasorintsisanorira Igoveenka-
riegite maganiro matsigenkaegi.
Magatirosanotyo napagiteakaro.
¿Matsi pagaveaigake povetsikaiga-
kenara novanko nontimanta-
kemparira?

c 7.38 Ek. 19.1—20.17. d 7.41 Ek. 32.1-6. e 7.44 Ek. 25—27. f 7.45 Jos. 3.14-17.
g 7.47 2 Sa. 7.1-16; 1 Kov. 6.1,11-13.

¿Matsi nokogakotaka pankotsi
nampishigopireantakemparira?

⁵⁰ ¿Matsi tera naro vetsikageterone
magatiro timagetatsirira?

⁵¹ “Viroegi vintiegi terira pinkemu-
maige kañomataka tenirikatyo
ontimaige pisure. Onti pikañoigakari
terira irogotumaigeri Tasorintsi,
ontiniroro pipugananaiganakari Isure
kañoigamatakavi yashikiiganakempirira.
⁵² Iriroegitari tsipereakagaigakaririra
maganiro kamantantaigatsirira, aikiro
ipogereagakeri maganiro niakoigakeri-
rira Pairorira Ikametiti pokankitsinerira.
Impogini ipokavetaka viroegi pitsoeven-
taigakari pogakagantaigakeri. ⁵³ Tasorin-
tsi inti itigankavetaka isaankariite
inkamantakerira Moiseshi ikogagetake-
rira ontsatagakenkanira impo irokyo
gotagaigakeri yashikiiganakempirira,
kantankicha teratyo inkematsaigeri.
Ariotari pikañoigakari viroegi maika
tera pinkematsatumaige.”

Ikamakera Ishitivano

⁵⁴ Iroero ikemaigavakerira ikantakera
ikisasanoigamatanakatyo opegakoigana-
kerityo itsimaenka. Tenigetyo
iragaveaige iriniaigaera. ⁵⁵ Yogari
Ishitivano itinkamitakaritari Isure
Tasorintsi ineventanaka enoku ineakeri
Tasorintsi ishimpokirerenkatera
kantamataketyo porerererere yogari Jeso
aratinkake inampinaku irakosanoriraku.
Iniitanaatyō Ishitivano ⁵⁶ ikantaigiri:

—iKemisantaigna! Naro noneakero
inkite shirenakimataka. Neri yonta
Kañotasanotakaririra Matsigenka
aratinkake inampinaku Tasorintsi
irakosanoriraku.

⁵⁷ Ogatyo ikenaiagake yaviigamatanake-
rotyo igempita ganiri ikemaigai. Ikaema-
vaimatanaketyo ishigateiganakarira
yavetakaiganakerira ⁵⁸ yamaiganakerira
parikoti okaragetanakera pankotsipage

ipitankaigakerira. Ario inake kara pashini
matsigenka ikyaenkarira gaenokananki-
cha. Irirori onti ipaita Saoro. Yogari
pitankaigakeririra Ishitivano onti
isapokashiiganakari imanchaki ipaigana-
keri Saoro ineaiagaenerira. ⁵⁹ Iroero
ipitankaigakerira irirori inianakeri
Atinkami ikantiri: “Notinkami Jeso,
gavaero nosure.” ⁶⁰ Impogini itigeroanaka
ikaemapanuti ikanti: “Notinkami, gara
pikisaviigiri ikisaigakenara.”

Iroero ikañotanakerora maika ikamanake.

8 ¹⁻² Yogari Saoro ishinevegetanaka-
tyo kara ineavakerira ikamanakera.

Saoro yatsipereakagaigakarira kematsaigatsirira

Ariotari inaiagakeri kara kematsatasa-
noigiririra Tasorintsi yagaiganairi
Ishitivano yamaiganairira ikitagairira.
Iragatsikanaigakarityo kara. Impogini
yogari terira inkematsaigeri Jeso
itsitiiganakero ikisashiiganakarira
maganiro kematsaigatsirira timaigatsi-
rira Jerosarenku yatsipereakagavageiga-
nakarira. Ishigantaiganakarira maganiro
iriroegi iaigakera itivarokaiganakara
Joreaku ontiri Samariaku, intaganivani
timaigaatsi iritigankaneegi Jeso. ³ Yogari
Saoro ariompatyo ipogereavageiganake-
riri kematsaigatsirira ikiashigeigamatiri-
tyo ivankoegiku inoshikaiganakerira
surariegi ontiri tsinaneegi yamaiganake-
rira yashitakotagantaigakerira.

Ikenkitsatakotunkanira Jesokirishito Samariaku

⁴ Yogaegiri shigaiganankicharira
iaigake yapagiteaiganakarora ikenkitsa-
vageiganakera ikamantaigakerira tyara
inkantaigakempa kameti irogavisaakoi-
gakenkaniniri. ⁵ Yogari Jeripe iatake
Samariaku ikenkitsatakotakerira
Kirishito ikantakera inti itigankake
Tasorintsi irogavisaakoigakerira

maganiro kematsaigakerinerira impegakempara Igoveenkariegite. ⁶Maganiro kemaigavakeririra ikemisantasanoigavakeri, ineagakeritari yovetsikagematityo terira oneimagetenkani. ⁷Yogari kamagarinipage timaguigakeririra matsigenka ikaemageigamatanake ikontegeigamata-naketyo. Impo irirori Jeripe yovegageigamatri shinkogisenari intiegiri terira iranuitagantsiige. ⁸Nerotyo ishineventan-tavageiganakaririra maganiro.

⁹Ario itimi kara paniro seripigari paitacharira Sumo. Irirori kantaka iseripigaritira pairani yamataviigakerira maganiro. Yaventakovagetaka ikantakera yavisavageigakerira maganiro. ¹⁰Maganiro ikemisantasanoigiri, ananekiegi intiegiri antariniegi, ikantaigake: “Yoga Sumo intirorokari gaveakagakeri Tasorintsi gaveavagetatsirira.”

¹¹Ikemisantasanoantaigaririra maganiro yogikoneatimoigakeritari posante terira ineimageigero iriroegi yogakagavageigakeri kavako. ¹²Kantan-kicha impogini iriroegi ikemaigavakeri Jeripe ikenkitsavagetakera ikantakera Jesokirishito inti Gavisaakotantatsirira Itigankakerira Tasorintsi irogavisaakoi-gakerira, aikiro ikamantaigakeri tyara inkantaigakempa inkematsaigakerira kameti impegakempaniri Tasorintsi Igoveenkariegite. Antari ikemaigakerira ogatyo ikenaiigake ikematsaiganake ovashi yogiviatagantaiganaka surariegi ontiegiri aikiro tsinaneegi. ¹³Impo imamatanakatyo Sumo irirori. Iro-ro ikematsakera yogiviatagantaka ovashi yogiavagetakeri Jeripe. Yogavagetanake kavako ineakerira yovetsikagemati terira oneimagetenkani.

¹⁴Yogari iritigankaneegi Jeso naigan-kitsirira Jerosarenku iro-ro ikemakoiga-kerira Samariakunirira ishineventaiga-karora Iriniane Tasorintsi itigankaiga-keri Perero intiri Joan inkamosoigute-

rira. ¹⁵Iro-ro yogonkeigapaakara iniaven-taigapaakeri kameti intimasurentaigake-riniri Isure Tasorintsi, ¹⁶tekyatanika intimasurentaigeri. Intagatitari yogivia-tagantaigaka iokotagantaigakara arisano ikematsaigakeri Atinkami Jeso. ¹⁷Impo-gini Perero intiri Joan ipatikaigakeri igitoku oga ikenake itimasurentaigana-keri Isure Tasorintsi. ¹⁸Iro-ro ineavakera Sumo ¹⁹ikantaigiri iritigankaneegi Jeso:

—Nokogake pagaveakagaigakenara naro aikiro nonkañoigakempira viroegi kameti tyanirika nompatikaitake igitoku intimasurentanakeriniri Isure Tasorintsi. Atsi gaveakagaigena, nompunaigakem-pitari koriki.

²⁰Ikantiri Perero:

—iManakerityo pigorikite pintaga-kempara morekariku, pikogaketari pimpunaventantakemparira koriki Isure Tasorintsi! ²¹Garatyo pitentumaigana pinkañoigakenara naro, tekyatanika pinkantatigasanotempa teratyo irishine-tempi Tasorintsi. ²²Pakuaero pisuretaka-rira maika pinkantatigasanotakempara. Piniaerira Tasorintsi ariorika imagisan-taero ganiri ikisavitimpiro. ²³Nonea-kempitari pikantakani povetsikagiseva-getakero terira onkametite, apaiventa-shivagetakempitari kañoavagetagantsi.

²⁴Iniamatanaketyo Sumo ikanti:

—Atsi niaventaigena viroegi pinkan-taigakerira Tasorintsi ganiri ikisashi-tana.

²⁵Yogari Perero intiri Joan ikenkitsa-takoigakeri Tasorintsi tyara ikanta yogavisaakotantira, aikiro ikamantakoi-ganakerora magatiro ineagakerira itentavageigavetakarira Jesokirishito. Impogini yagataiganakera ipigaiganaa Jerosarenku. Antari avotsiku ikenkitsati-moiganakeri Samariakunirira tyarika kara itimageigi ikamantaiganakerira tyara inkantaigakempa kameti irogavi-saakoigakeriniri Tasorintsi.

**Ikematsatakera onampina
igoveenkariegite Etiopiakunirira**

²⁶Impogini iniakeri Jeripe isaankariite Tasorintsi ikantiri: “Piate osarigagiteta-paakera, pinkenantanakempa avotsi poniankicharira Jerosarenku atacharira Gasaku.” ²⁷Ikavirimatanaakaty Jeripe iatakera, impo ineventakotavakari paniro eonoko timatsirira Etiopiaku. Irirori inti otesorerote igoveenkariegite Etiopiakunirira opaita Kantase. Onti iponiaa Jerosarenku iatutira iniitirira Tasorintsi. ²⁸Onti iatanai itimira ikenantanaa ishigakotantarira iniavanta-vegetanake sankevanti itsirinkanakerira pairani kamantantatsirira Isaiashi.

²⁹Yogari Isure Tasorintsi ikantiri Jeripe: “Piate pogiatavakerira.” ³⁰Itsati-mamatanaketyo Jeripe ikemapaakeri niavantake, ikantapaakeri:

—¿Pikemavakero piniavantakerira?

³¹Irirori ikanti:

—Tyara nonkantakempa nonkemake-rora, mameritari gotagakananerira. Atsi tainanityo viro pimpitapaakera naroku pogotagakenara.

³²Ogari iniavantakerira onti okanti:

“Yamanunkani ikañotaganunkani yamaganira ovisha yovetisaga-nira

tera inkaemumatanake.

Onti ikemisantakotanaka

ikañotanakari itomaitaganira agaganira iviti.

³³Antari yogamagunkanira yovashi-gantavagetunkani tyanikonatyo kantakotumaterine. Maikari maika garaty tyani niakotu-maigiri iyashikiiganakerira, teranika intimaige, yogamagunkani-tari.”

³⁴Yogari eonoko ikantiri Jeripe:

—Kantena, ¿tyani iniakotake kaman-tantatsirira? ¿Ikiro niakotaacha intirika iniakotake pashini?

³⁵Iniamatanaketyo Jeripe ikanti:

—Intityo iniakotake Jeso.

Ovashi yogotagagetakeri tyara okanti sankevanti iniavantakerira itsotenkasa-notakeroty ikamantakotakerira Jeso.

³⁶Impogini ikenaignake kara ineaiga-paakero nia ikanti eonoko:

—Nero oga nia, ¿kemetitakerikara nogiviatakempara?

³⁷Ikanti Jeripe:

—Virompatyo. Pikematsatasanotake-rika kemetitakeniroro pogiviatakempara. Irirori ikanti:

—Arisanoniroro nokematsatasanotake nogotaketari yogari Jesokirishito inti Itomi Tasorintsi.

³⁸Impo ikantiri ironampiria irogaratin-kakerora ishigakotantakarira, yaguitanake iaigakera oaaku yogiviatakakerira. ³⁹Iro-ro yagaiganairora otsapiaku yaganakeri Isure Tasorintsi Jeripe asatyo ipegaenka-tanaa ovashi tera ineaeri, kantankicha iatanai ishinevegetanaka. ⁴⁰Impogini yogari Jeripe ineaagani Asotoku ikenkitsatakovegetanakerira Kirishito itsotenkageavagetanakero itimageigira yagavagetanakero Sesareaku.

Ikematsatakera Saoro

(Ipi. 22.6-16; 26.12-18)

9 ¹Yogari Saoro ariompatyo ikisashi-vageiganakariri kematsaigiririra Atinkami ikogavetaka irogaigakerimera, neroty iatantakarira inakera itinkami-sanorira saseroroteegi ²inevitapanutirira impavakerira sankevanti kameti inkiashiiganakeriniri pankotsipageku yapatotantaigarira jorioegi Iramashikoku inkogaigakiterimera maganiro kematsaigiririra Atinkami^h iramaigana-

kerimera irashitakotagantaigakerira Jerosarenku, surariegi ontiri tsinaneegi.

³Kantankicha iroro iatanakera yagaveta-nakarora ochoenitapaakara Iramashiko katsiketyo okantamatanake tsaarere oponiapaaka enoku oatagutakerira inakera irirori. ⁴Oga ikenake yashiriana igavayoteku ikemi ikantapaagani: “Saoro, Saoro, ¿antari gara pikisana?”

⁵Irirori ikantiri: “¿Tyanimpatyo viro, Notinkami?” Ikantiri: “Naro nanti Jeso pikisashitakarira. ⁶Maika tinaanake piatakera Iramashikoku. Ario kara inkantaitakempi tyarika pinkantakempa.”

⁷Yogari itentaiganakarira Saoro itsarogavageiganaketyo kara ineaigaketari ikemaigavetakatyo oniinkanira kantankicha tera tyani ineaige. ⁸Irirori itinaanaka ikireaaветanaka tenige inea. Onti ikatsaiganakeri yamaiganakerira Iramashikoku. ⁹Ario inake kara mavati kutagiteri tera inea, aikiro tera isekatumataempa, tera iroviikumataempa maani. ¹⁰Kantari Iramashikoku ario itimi paniro kematsata-sirira paitacharira Ananiashi. Ikoneatimotakeri Atinkami inei ontinirika okañotimotakari igisanireku ikantiri: “¡Ananiashi!” Ikanti irirori: “Notinkami, ¿tatoita?”

¹¹Ikantiri irirori: “Tinaanake plate shintsi pinkenantanakempa avotsi paitacharira Katinkapokiri. Pagapaakerora ivanko Jorashi pinkogakotagantapaakeri Saoro poniankicharira Tarisoku. Maika aiño irirori inianakena. ¹²Inkaara inekempi pikoneatimotakerira okañotimotakari igisanireku. Inempi pikiapaake pipatikaitapaakeri igitoku kameti ineaneniri.”

¹³Iroo ikemavakera irirori ikanti: “Notinkami, nokemakovagetiritari ikisantasanovagetityo kara yatsipereakagavageiganakari kematsaigatsirira timaigatsirira Jerosarenku. ¹⁴Maikari maika gonketaka aka yamakero sankevanti ipaigavakeririra itinkamiegi saseroroteegi kameti iramaiganakeriniri

maganiro kematsaigimpirira irashitakotagantaigakerira. Irerotari ipokashitake.”

¹⁵Ikanti Atinkami: “Piatetyo, tsikyatatari nokogake naro inkenkitsatakotakenara inkamantaigakerira terira iriroegi jorioegi timageigatsirira parikotipageku intiegiri igoveenkariegite. Aikiro inkamantaigakerira irapijorioegitene. ¹⁶Nokogake nogotagagetakerira posante tyara inkantakempa iratsipereaventavagetakenera.”

¹⁷Ovashi iatake ikiapaake pankotsiku inakera Saoro ipatikaitapaakeri igitoku ikantiri:

—Napigematsatene Saoro, yogari Atinkami Jeso koneatimotakempirira avotsiku itigankakena nompatikaitakempira pigitoku kameti pineanaeniri, aikiro intimasurentakempiniri Isure Taserintsi intinkamitakempira.

¹⁸Iroo ikantakerira ogaty okenake ashiriventakigematanakaty irokiku kañotavagetaka iventak shima ovashi ineani. Impo iatake yogiviatagantakara. ¹⁹Impo ovashi isekatanaa ishintsitanaira. Tekya aiñokya iriatate, ontimagimoiganakeri kematsaigatsirira timaigatsirira Iramashikoku, kantankicha tera samani intime kara.

Ikenkitsavagetake Saoro Iramashikoku

²⁰Impogini ikenkitsamatanaketyo Saoro pankotsipageku yapatoitantaigarrira jorioegi ikantanakera Jeso inti Itomi Taserintsi. ²¹Maganiro kemaigavakeririra yogavageiganaketyo kavako ikantaigi:

—¿Matsi teratyo iriro yoga kisashiigarrira kematsaigiririra Jeso timaigatsirira Jerosarenku? ¿Matsi teratyo iriro pokashii-gakeririra kematsaigatsirira naigankitsirira aka irogusoiguterira iramaiganakenerira itinkamiegi saseroroteegi?

²²Kantankicha yogari Saoro ariompatyo ikenkitsatanakeri ikamantakotanakerrira Jeso ikantakera inti Ikogakagakerira Taserintsi impegakempara Igoveenkarie-

gite, nerotyo yogemisantantaiganakari-rira irapijorioegitene timaigatsirira Iramashikoku tenige iragaveaigae impugaigaemparira. ²³Impogini otovaiganakera kutagiteri isariaigaveta-kari irogaigakerimera. ²⁴Omirinkatyo tsitenigetiku ontiri kutagiteriku itimashii-gavetakari sotsimoroku otantatsaitakotara apatotara pankotsipage irishiganakerika irogaigavakerira, kantankicha ikamantunkani. ²⁵Impogini iroro apavatsaanakara yoyagaigakeri irapigematsaegine kantiriku, tsikyani yoguita-koigakeri yogavisakoigakerira aikeyara yogishigaigakerira iatantaarira parikoti.

²⁶Iroro yogonketapaakara Jerosarenku ikogavetaka inkonoii gapaakemparimera kematsaigatsirira, kantankicha maganiro ipinkaigavakeri ineagiri teri inkematsate. ²⁷Impogini yaganakeri Verenave itentanakarira inaikera iritigankaneegi Jeso ikantaigiri:

—Gara pipinkaigiri, ineakeritari Atinkami avotsiku ikemakeri iniakerira. Ikematsatantakarira ikenkitsatakovagetakeri anta Iramashikoku tera intsarogumate.

²⁸Iroro ikemaigavakera yagaigavakeri itentavageigakarira. Impo irirori ikenkitsatakovagetakeri Atinkami itsotenkavagetanakeri Jerosaren. ²⁹Aikiro iniaigakeri jorioegi niantaigarorira guriego. Iriroegi ikogaigavetaka irogemisantaigakerimera, kantankicha tera iragaveaigeri, niganki ikisaiganakeri ikogantaigavetakarira irogaigakerimera. ³⁰Kantankicha iroro ikemaigavakera irapigematsaegine itentaiganakari Sesareaku, impo ariokya itigankaigakeri Tarisoku.

³¹Ovashi itimaigai kameti maganiro kematsaigatsirira timaigatsirira Joreaku, Garireaku ontiri Samariaku tenige

iroverajaigaenkani. Itovaigavageiganaketyo kara kematsaigatsirira, ariompatyo ikematsatasanoiganakeriri Atinkami itsatagasanoiganakerora magatiro ikogirira irirori, intitari shintsitagaigakeri Isure Tasorintsi.

Perero yovetsikagetakera terira oneimagetenkani

³²Impogini iatake Perero ineantavagetakera inkamsoigakerira irapigematsaegine, aikiro iatake ineagakerira timaigatsirira Iriraku. ³³Ario kara ineapaakeri shinkogisenari ipaita Eneashi inoriintevagetanakani 8 shiriagarini. ³⁴Ikantiri Perero:

—Eneashi, maika irovegaempi Jesokirishito. Tinaanae pigikanaero pishita.

Irorotyo ikantakerira itinaamatanaaty. ³⁵Maganiro timaigatsirira Iriraku ontiri Saronku iroro ineagavakerira yovega-naara ikematsaiganakeri Atinkami.

³⁶Antari antakona anta Jopekuri ario otimi pashini kematsatsirira paitacharira Tavita. Antari irinianeegiku guriegoegi onti okantagani Irorokashi. ⁱIrorori pairotyo okavintsavantavageti okavintsajaigirira kogakoigankicharira. ³⁷Impogini omantsigatanake ovashi okamake. Okivanunkani impo amanunkani oginoriinkanira menkotsiku. ³⁸Impo yogari kematsaigatsirira timaigatsirira kara yogoigaketari ario inake Perero anta Iriraku itigankantaigakarira piteni iriaigakitera inkantaigakiterira iripokakera shintsi. ³⁹Iroro ikemavakera Perero ikaviritanaka yogiaiganakerira. Antari yogonkeigapaakara pankotsiku itentaiganakari onoriakara Tavita. Ario onaigake kara kamakoigatsirira ojime okamanavageigaketyo kara iragatsikaigakarora okamakera. Iroro oneaigavakerira Perero

i 9.36 Tavita *Tabita*: arameoku onti *Tabitha*. Irorokashi *Dorcas*: guriegoku onti *Dorkas*. Pitetiro onti onkantakera *gacela*.

apatoventaigavakari okotageigavake-
rira kamisapage okantaigakerira:

—Nero oka avovigeiganarira Tavita.

⁴⁰Yogari Perero yogikonteigakeri
maganiro itigeroanaka iniakerira
Tasorintsi. Impogini ikamagutanakero
Tavita ikantiro:

—iTavita, tinaanae!

Oga okenake okireaatana oneitarityo
Perero otinaana opirinitanake.

⁴¹Ikatsatakero yogaviritakerora
ikaemaigairo kamakoigatsirira ojime
intiegiri otovaireegi kemataigatsirira
ikantaigiri:

—Nero, atake anianai.

⁴²Ovashi ikemakoiganakero magani-
rosanoty timaigatsirira kara itovaiga-
vageiganaketyo kematsaiganakeririra
Atinkami. ⁴³Ario imaguntevagetake
Perero tovai kutagiteri ivankoku Sumo
kitaatakotiririra meshinantsi.

Perero intiri Koronerio

10 ¹Itimi Sesareaku paniro soraro
paitacharira Koronerio. Irirori
inti itinkamiegi soraroegi ikantaganirira
Itariano, ariorika inagake 100. ²Irirori
inti pinkatsatiririra Tasorintsi itentaiga-
rira iitanepage ipiriniventaigirora
ikogagetirira. Ikavintsaavageigakeri
kogakovageigankicharira, aikiro
omirinka iniiri Tasorintsi. ³Impogini
agaka kutagiteri itsunkanaira poreatsiri
iroro iriniaerimera,inei ontinirika
okañotimotakari igisanireku ipokapaake
isaankariite Tasorintsi ikantapaakeri:
“iKoronerio!” ⁴Iroro ineavakerira
ikiapaakera itsarogavagetanake yogana-
keri kavako ikantiri: “Notinkami,
¿tatoita?” Ikanti: “Ikemakempi Tasorin-
tsi piniirira, aikiro ineakempi pikavin-
tsaantavagetira. ⁵Maikari maika tiganke
iriaigakitera Jopeku inkantaigakiterira
Sumo Perero. ⁶Inti imagimotake irapisu-
motene timatsapiatiririra omaraani nia.

Irirori onti ipiriniventavageti iikataatirira
imeshinapage.”

⁷Iroro iatanaira isaankariite Tasorintsi
yogari Koronerio ikantakagantake piteni
iromperane aikiro paniro soraro
mutakovagetiririra. Yogari soraro inti
pairorira ipiriniventiro ikogagetirira
Tasorintsi. ⁸Antari ipokaigakera
ikamantaigakeri magatiro ikantakerira
isaankariite Tasorintsi, ovashi itigankaig-
akeri Jopeku. Impo iriroegi iaiganake.

⁹Iroro okutagitetanaira ipampokiiganai
aikiro, impo ikatinkatanakera poreatsiri
panikya irogonkeigakempa. Yogari
Perero iatake yagatsonkutanakera enoku
sotsi otishitapanokoku pankotsi iriniaerira
Tasorintsi. ¹⁰Impo itaseganake ikogave-
tanaka isekatakempamera kantankicha
tekyia omposate, okyaenkatari
onkotanunkani. Impo inei ontinirika
okañotimotanakari igisanireku. ¹¹Oga
okenake ashireagitetanaka inkite
aguitapaake kañomataka ogamagoni
manchakintsi ontinirika ogusogetunkani
onampinapageku. ¹²Yomateviotantakaro
posantepage kamarigetatsirira, noshika-
getacharira intiri aragetatsirira. ¹³Impo
ikemiri inianake Atinkami ikanti:
“Perero, kaviritanakeagetavakeri
pogamagagetavakerira pogakemparira.”

¹⁴Ikantiri Perero: “Notinkami, garatyo
nogumatari, tera nogumatemparinika
kitsitinkantagetatsirira ikantavitantaga-
nirira.” ¹⁵Iniitaarityo aikiro ikantiri:
“Yogari ikantakerira Tasorintsi kameti-
take irogakenkanira gara pipinkiri,
kametitaketyo pogakemparira, gatanika
ikitsitinkumatimpi.”

¹⁶Mavati ikañotagunkani maika iniinka-
nira impo akya opiganaa opegaenkavage-
tanaa enoku. ¹⁷Impo yogari Perero
isurevagetanakaro ineakerira ikanti:
“¿Tatarikatyo oita?” Yogaegiri itigankaiga-
kerira Koronerio mataka gonkeigapaaka
Jopeku ikogakotagantaigapaakerora

ivanko Sumo tyara onake. Impo ikaman-taigunkanira iaigake yaratinkaigapaake sotsimoroku ¹⁸ikaemaigapaake ikantaigi:

—¿Ario inake Sumo Perero aka?

¹⁹Kantankicha yogari Perero

aiñokyara isuretaro ineakerira inkaara, ikantiri Isure Tasorintsi: “Pokaigake mavani matsigenka ikogaigakempira.

²⁰Atsi kaviritanake paguitanakera gara pitsarogi pogiaiganakerira, nantitari kantaigakeri iripokaigakera.”

²¹Ovashi yaguitanake ikantaigapaakeri:

—Nanti pikogaigakerira. ¿Tatoita pipokashiigake?

²²Iriroegi ikantaigiri:

—Inti tigankaigakena notinkamiegi paitacharira Koronerio. Irirori inti pairorira ipinkatsavagetiri Tasorintsi, aikiro inegintevagetaka. Maganiro jorioegi ishineventaigari. Chapi iniakeri isaankariite Tasorintsi ikantiri: ‘Tiganke iriaigakitera inkantaigakiterira Perero, tatarika inkamantaigetakempi pinkemisantavakerira.’ Irorotari nopokashiigake maika nonkantaigakitempira.

²³Yogari Perero yogiagavakeri ipaigavakerira irimagantaigakempirira. Impo okutagitetanaira iaiganaira yogiaiganakeri, aikiro itentaiganakari irapigematsaegine timaigatsirira kara Jopeku. ²⁴Okutagitetanaira aikiro yogonkeigapaaka Sesareaku. Ario inake Koronerio intiegiri iitanepage intiegiri aikiro iamigoegite itentaigakari yogiaigakerira Perero. ²⁵Iroko yogonketapaakara ikontetanake Koronerio itonkivoavakarira itigeroaventamanakarirityo ikañotagakarira irironirika Tasorintsi. ²⁶Kantankicha Perero yogaviritavairityo ikantiri: —Atsi kaviritanae. ¿Matsi tera naro matsigenka pitigeroaventakenara?

²⁷Iroko iniakerira itentanakari ikiaiganakera tsompogi. Yogari Perero ineaga-paakeri patovageigamataka, ²⁸ovashi inianake ikantaigapaakeri:

—Viroegi pogoigitari naroeigi jorioegi nokantatigaiga paio navishi nokantavitaigirora nonkonoivageigempirira terira iriroegi noshaninkaegi, aikiro nonkiavankoigerira ivankoku. Kantankicha naro maika yogotagakena Tasorintsi kameti ganiri nokantantavagetai kantakarikatyo ikitsitinkirika. ²⁹Pineantaigakenarira maika, iroko pikantakagantaigakena notsatimavagetake nopokakera tera tatoita nontatsiventempa. Maika kantaigena, ¿tatatyo pikaemaviigakena?

³⁰Impo ikanti Koronerio:

—Atake apitepagetanaka kutagiteri ikañotanaara maika poreatsiri itsunkanaira, nonake aka novankoku noniavagetakerira Tasorintsi. Katsiketyo noneatigirityo ikoneatimotakena isaankariite kutasamamatake imanchaki.

³¹Irirori ikantana: ‘Koronerio, ikemakempi Tasorintsi piniirira, aikiro ineakempi pikavintsavantavagetira.

³²Maikari maika tiganke iriaigakitera Jopeku inkantaigakiterira Sumo Perero. Inti imagimotake irapisumotene timatsapiatirorira omaraani nia. Irirori onti ipiriniventavageti ikitaatirira imeshinapage.’ ³³Notigankantaigakaririra inkantaigakitempira. iMatsi ariokona pipokumatake! Maikari maika apatoitai-gakara ario inimoigakai Tasorintsi. Nokogake pogotagaigakenara magatiro tatarikara oita ikantakempi Tasorintsi.

Ikenkitsavagetakera Perero ivankoku Koronerio

³⁴Iniamatanaketyo Perero ikanti:

—Maika nogotasantake ineagakai Tasorintsi ario akañovakagaigaka maganiro tera ankantatigumaigempa, ³⁵ishineventasanoigakaritari maganiro matsigenkaegi tyansirika pinkatsakeri, aikiro inegintevagetaka. ³⁶Itigankakeri Jesokirishito inkenkitsatimovageigakerira maganiro iyashikiiganakerira

Iseraere inkamantaigakerira tyara ikanta Tasorintsi yogavisaakotantira kameti irishinevageigakempaniri. Yogari Jesokirishito intitari Itinkamisanorira maganiro matsigenkaegi. ³⁷⁻³⁸Viroegi pikemakoigakeritari Joan ikenkitsavagetakera karanki, aikiro yogiviatantavagetakera. Impo pikemakoigakeri Jeso Nasarekunirira ipakerira Tasorintsi Isure yagaveakagasanotakerira. Impogini yanuiventavagetakero ikavintsiantavagetakera yoneaganontageigakarira maganiro yatsipereakagaigakarira kamagarinipage, itsititanakero Garireaku impo yapagiteavagetanakaro magatiro igipatsite jorioegi. Intitari tentakari Tasorintsi. ³⁹Naroegi noneakotasanoigakeri magatiro yovetsikimogeigakeririra maganiro jorioegi timaigatsirira Jerosarenku intiegiri aikiro timageigatsirira parikotipageku. Impogini yogamaigaigakeri ikentakoigakerira koroshiku.

⁴⁰Kantankicha omavatanakara kutagiteri yoganiairi Tasorintsi itigankakeri ikoneatimoigaanara. ⁴¹Kantankicha teratyo maganiro inkoneatimoigeri, intagani naroeegi ikoneatimoigai notentaigaari nosekatavageigaara, naroegitari ikogakagaigake Tasorintsi pairani nonkematsaigakerira, aikiro nonkamantaigakerira maganiro.

⁴²Irirotari tigankaigakena nonkenkitsaigakerora Iriniane Tasorintsi nonkenkitsatimoigakerira maganiro matsigenkaegi, aikiro nonkamantaigakerira iriro ikogakagake Tasorintsi inkantakera impogini tyara inkantaigakenkanira maganiro, irirorika kamaigankitsirira, intririka tekyarira inkamaige. ⁴³Maganirotari kamantantatsirira ikamantakoigakeri ikantaigakera tyanirika kematsaigakerine imagisantaero Tasorintsi ikañovageigara.

⁴⁴Aiñokyara iniavageti Perero ipokapaake Isure Tasorintsi itinkamiigapaakarira maganiro kemisantaigakeririra

ikenkitsavagetakera. ⁴⁵Yogari jorioegi kematsaigatsirira itentaigakarira Perero iponiakara Jopeku yogavageiganake kavako, ineigaketari ipokakera Isure Tasorintsi itinkamiigapaakarira terira iriroegi jorioegi. ⁴⁶Aikiro ikemaigavakeri iniantaiganakarora pashinipage niagantsi terira oniantumatenkani ishineventasanoiganakari Tasorintsi ikantaigi:

—Païro ikametivageti Tasorintsisanoirira.

⁴⁷Impo iniamatanaketyo Perero ikantaigiri itovaire:

—Maikari maika ñmatsi ario ankantaviigakeri irogiviaigakempara?, ariotari ikañoigakairi aroegi itinkamiigakaira Isure Tasorintsi.

⁴⁸Impo yogiviatagantaigakeri iokotagantaigakempara arisano ikematsatasanoigakeri Jesokirishito. Impogini iriroegi ikantaigakeri Perero gatata iatai.

Ikemakotavunkanira Jerosarenku ikematsaigakera terira iriroegi jorioegi

11 ¹Impogini yogari itovaireegi iritigankaneeji Jeso intiegiri irapigematsaegine timageigatsirira Joreaku ikemakoigakeri terira iriroegi jorioegi ikenkitsatimoigunkanira Iriniane Tasorintsi ovashi ikematsaigake. ²Iroo ipiganaara Perero Jerosarenku ikisaenkaviigavakeri kematsaigatsirira jorioegi ³ikantaigiri:

—ñTyara okantakara piatashiigakerira terira irogaratsaiigenkani ichonkirime-shinate pisekatakovageigakarira?

⁴Inianake Perero ikamantaiganakerira magatiro ikanti:

⁵—Naro nonake Jopeku noniavageterira Tasorintsi. Impo noneake kañomataka ontinirika nokisanivagetake noneavakero kañotaka ogamagoni manchakintsi oponiapaaka enoku inkiteku ogusotunkani onampinapageku, impo aguitapaake naroku. ⁶Nokamaguta-

sanotakero noneakerora tatarikara yagantakaro. Noneagetakeri yomatevioletantakaro kamarigetatsirira piratsipage intiri inkenishipagekunirira. Yomatevioletantakaro aikiro noshikagetacharira intiri aragetatsirira. ⁷Impo inianake Atinkami ikantana: 'Perero, kaviritanake, pogamagetavakerira pogakemparira.'

⁸"Kantankicha naro nokanti: 'Notinkami, garatyo nogumatari, tera nogumatemparinika ikantavitantaganirira irogagetenkanira, aikiro tera nogumatemparinika kitsitinkantatsirira.' ⁹Iniitanaatyo aikiro ikanti: 'Yogari ikantakerira Tasorintsi kametitake pogakemparira gara pipinkiri, gatanika ikitsitinkimpi.' ¹⁰Mavati ikañotagakena maika iniakenara, impo akyaa opiganaa opegaenkavagetanaara enoku.

¹¹"Tekya osamanite yogonkeigapaaka pankotsiku nomagantakarira mavani matsigenka ponaiagankicharira Sesareku itigankaigunkanirira inkantaigakitenara. ¹²Impo itigankakena Isure Tasorintsi ikanti: 'Piate giaiganakeri gara pitsarogi.' Ovashi noatake yogiaiganakena 6 napigematsaegine. Impogini nogonkeigapaakara nokiaigapaake ivankoku Korone-rio. ¹³Irirori ikamantaigavakena ikoneati-motakerira isaanakariite Tasorintsi yaratinakimotapaakerira ivankoku ikantiri: 'Tiganke iriaigakitera Jopekú inkantaigakiterira Sumo Perero. ¹⁴Irirori kantaigakempine tyara pinkantaigakempa viro intiegiri maganiro pitovaireegi kameti irogavisaakoigakempiniri Tasorintsi.'

¹⁵"Iro-ro notsititanakerora noniaiganakerira ipokapaake Isure Tasorintsi itinkamiigapaakarira ikañotagaigakarira aroegi itinkamiigakaira okyara. ¹⁶Nosurematanakarotyo ikantaiganakairira Atinkami: 'Arisano yogari Joan onti yogiviatantavagetake niaku, kantankicha viroegi inti timasurentaigakempine Isure Tasorintsi.' ¹⁷Ikavintsajaigakeritari Tasorintsi ikañotagaigakaira aroegi

akematsaigakerira Atinkami Jesokirishito. ¿Ario tyaratyo nonkantera? ¿Matsi tyanimpatyora naro kameti nonkantakerira Tasorintsi gara ikavintsajaigiri?"

¹⁸Iro-ro ikemaigavakera irapigematsaegine ikemisantavageiganake ovashi ishineventaiganakari Tasorintsi ikantaigi:

—iPairotyo ikavintsaantavageti Tasorintsi, nerotyo ikavintsaantaigakarira aikiro terira iriroegi jorioegi kameti inkantatigai-ganakempaniri ganiri ineagairo igamane inkantakani intimaigake!

Ikenkitsavageiganakera parikotipageku kipatsi

¹⁹Antari yogunkanira Ishitivano iro-ro oponiantanaka yatsipereakagaiganunkanira kematsaigatsirira ovashi ishigaiganaka itivarokaiganakara iaiganakera Penishiaku, Tsipereku ontiri Antiokiaku. Ario kara ikenkitsavageigake ikamantaigakera tyara ikanta Tasorintsi yogavisaakotantira kantankicha intagani ikenkitsatimoigake jorioegi. Yogari terira iriroegi jorioegi tera inkenkitsatimoigeri. ²⁰Kantankicha ikonogagarantaigaka shigaiganankicharira ponaiagankicharira pairani Tsipereku ontiri Sureneku ipokaigake iriroegi aikiro Antiokiaku. Iro-ro yogonkeigapaakara ikenkitsatimoiganakeri terira iriroegi jorioegi ikamantakoigakerira Atinkami Jeso. ²¹Intitari gaveakagaigakeri ikenkitsaigakera yagaveantaigakarira ikematsatagaigakerira tovaini, yapakuantaiganakaririra ipegaigavetarira itasorintsiegite, irirokya ikematsaiganake Atinkami.

²²Impogini ikemakoigakerira kematsaigatsirira timaigatsirira Jerosarenku itigankaigakeri Verenave inkamosoiguterira. ²³Iro-ro ygonketa-paakara ineagapaakeri arisano ikavintsaavageigakeri Tasorintsi iriroegi aikiro ikematsatantaigakaririra ovashi ishinevagetanaka ikantaigakeri inkanta-

kanira inkematsatasanoigakeri Atinkami intsatagaigakerora magatiro ikogagetirira garatyo yapakuimaigiro. ²⁴Yogari Verenave pairotyo ikametiti. Itinkamita-sanotakari Isure Tasorintsi, aikiro pairo ikematsatasanoti, neroty ikematsatagantaigakaririra tovaini matsigenka.

²⁵Impogini iatake Tarisoku inkogakiterira Saoro ²⁶impo ineapaakerira yaganakeri itentanakarira iaigakera Antiokiaku. Ario inaiagakiti patiro shiriagarini yogotagavageigakerira yapatovageigakara tovaini kematsaigatsirira. Ariotari kara Antiokiaku itsitiiganunkaniri ikantaiganunkanira kematsaigatsirira kirishitiano.

²⁷Antari aiñokyara Verenave intiri Saoro Antiokiaku ipokaigapaake kamantantaigatsirira iponiaigaka Jerosarenku. ²⁸Paniro onti ipaitaka Agavo. Irirori yaratinkimoiganakeri maganiro kematsaigatsirira ikanti: “Impogini antsipereavagetanakenkani tasegagantsi ampagiteavagetanakemparo magatiro kipatsi.” Intitari niakagakeri Isure Tasorintsi neroty ipagakara Karaorio koveenkari otsatagagetanunkani ikantakerira. ²⁹Antari ikemaigavakera ikantakerira iniavakagaiganaka ikemavakagaiganaka irapatoigakera koriki iramakagantaigakenerira irapigematsaegine timaigatsirira Joreaku. Paniropage ipimantagarantaigake akarikara yashintaigaka. Yogari shintasanogankicharira iriro pimantasanoigankitsi. Yogari terira irashintasanoigempa ogakona ipimantaigake. ³⁰Impogini ipaigavakeri Verenave intiri Saoro iramaiganakerira Jerosarenku impaigapaakerira sentaigiririra kematsaigatsirira.

Yogunkanira Santiago aikiro yashitakotunkanira Perero

12 ¹Impogini yogari koveenkari Erorishi itsititanakero ikisashiva-

geiganakarira kematsaigatsirira. ²Yogakagantakeri Santiago onti itogitorenkaka-gantakeri savuriku. Irirori inti irirenti Joan. ³Impo yogari Erorishi ineakera ishineventasanoiganakarira jorioegi ovashi imatakeri Perero irirori yagakagantakeri viesetaku ogantaganirira pan terira onkonogempa opoegantarira ⁴yashitakotagantakerira impo itigankaigake 16 soraroegi inkamaguigakerira isurevetakataris aavisanaera Pasekoa inkantakera iragakitenkanira iramakenkanira ikanomaantapinitira kameti ineakoigakerira maganiro patovantaigakemparineririra kara inkisashitakemparira irogakagantakerira. ⁵Kantankicha yogari kematsaigatsirira ikantakani iniaigakeri Tasorintsi iniaventaigakerira Perero.

Tasorintsi yogikontetairira Perero yashitakovetunkanira

⁶Panivati tsitenigeti imagantanaarira iroro onkutagitetanaera iramakagantakerimera Erorishi irogakagantakerimera, irirori magasevagetake inigankiigakeri piteni soraro yogusotantunkani piteti karenatsa irakopageku. Yogari itovaire soraro kamaguigamatake sotsimoroku. ⁷Impo katsiketyo ikoneatimotapaakeri isaankariite Tasorintsi oga okenake okutaenkagitetanake tsonpogi yashitakotakara. Yogari isaankariite Tasorintsi itsagatapaakeri imeretaku yogireakerira ikantiri: “iTinaanake shintsi!” Oga okenake otsaagetanaka karenatsa yogusotantunkanirira. ⁸Ikantiri isaankariite Tasorintsi: “Suntoratanaempa, aikiro sapatotanaempa.” Iroro yagatanakera isuntoratsatanaara, aikiro isapatotanaara ikantutaarityo aikiro: “Gagutanaempa pimanchaki pogiatanakenara.”

⁹Iatake yogiatanakeri, kantankicha onti ineagetakero kañomataka ontinirika

ikisanivagetake, tenirikatyo arisano intentempari isaankariite Tasorintsi.

¹⁰Iroro ikonteiganakera iketyo yavisaigana ke soraroegi kamaguigiririra shitakoi-gacharira, impo imaiganakeri naigankitsirira antakona anta, impo ariompa yagavageiganakerori pashini sotsimoro ashitantaganirira asuromenta okontetakarara avotsiku oatakara otimagetira pankotsi. Oga okenake tsikyata ashireanaka. Ikonteiganake iaiganakera yagavokiaiganakerora apipokitene impo asatyo ipegaenkatanaa isaankariite Tasorintsi iokanairi paniro. ¹¹Impo irirori ineakotasanovetaa ikanti: “Iroroventi arisanoniroro itigankakeri Tasorintsi isaankariite yogikontetaanara ganiri yogakagantana Erorishi, aikiro ganiri yatsipereakagavageigana napijorioegitene.”

¹²Impo ovashi iatake ovankoku Maria, iriniro Joan Marokoshi. Ario inaigake kara irapigematsaegine yapatoitaigakara iniaigakerira Tasorintsi. ¹³Impo irirori yoenenkapaakero shitakomentontsi ovashi opokapaake nampiriantsi paitacharira Irore onkamosotakiterira tyanirikara. ¹⁴Iroroty okemavakerira inti niapaatsi Perero oshinematanakaty, kantankicha teratyo ashireakoteri, akyatyo opiganaa oshiganakara okamantaigakerira aiño Perero sotsi. ¹⁵Iriroegi ikantaigiro:

—iAriorikaratyo!

Kantankicha irorori ariompatyo onianakeri okanti:

—Arisanoty.

Iriroegi ikantaigiro:

—Iroroventi intirorokari isaankariite Tasorintsi sentiririra.

¹⁶Kantankicha irirori atanatsityo yoenenkanakerora shitakomentontsi. Iroro yashireigaivetakarora ineaigutari-tyo inti Perero yogavageiganaketyo kavako. ¹⁷Irirori yogaenokanake irako kameti inkemisantaigakeriniri. Impogini

ikamantaigakeri tyara ikantairi yogikontetairira Tasorintsi. Aikiro ikantaigiri:

—Pinkamantaigakerira Santiago intiegiri maganiroro atovaireegi apigematsaegine.

Ovashi iatake parikoti.

¹⁸Impogini okutagitetanaira ikireaigavetanaka soraroegi mameri Perero. Itsarogavageiganaketyo kara ikantavakagaiganakara: “¿Tyarika iatake?”

¹⁹Yogari Erorishi itigankaigakeri pashini soraroegi inkogaigakerira, kantankicha tera ineaigaeri. Impo ikogakotagantaigavetakari kamaguigavetakaririra kantankicha iriroegi tyampa inkantaige ovashi yogakagantaigakeri. Impogini irirori iatake intimakera Sesareaku.

Ikamakera Erorishi

²⁰Yogari Erorishi ikisaigakeri timaigatsirira Tiroku ontiri Sureneku, teratyo maani inkisavageigeri kara, kantankicha iriroegi ikemavakagaigaka iriaigakera irogametaigaaterira, irirotari Erorishi pakagantaigiri iseka. Iketyo yogishineai-gapaake inampina paitacharira Verashito kameti irironiri niaventaigakerine inkantakerira ikogaigakera irogame-tiaigaerira. ²¹Impo yogari Erorishi ikamantakagantaigakeri tyatirika kutagiteri iripokantaigakempa inkemavakagaigakempara. Impogini aganakara iripokantaigakemparira yogagutanaka imanchaki yogagutashitarorira yapatoventanaira. Impo ipokaigakera ipirinitanake irirori ipirinitapinitira ikenkitsavagetira ovashi ikenkitsavagetake. ²²Impo ikemaigakerira patoitaigankicharira ikaemavaimatanaketyo ikantaigi: “iOjojoo teratyo iriro niatsine matsigenka, intityo niankitsi tasorintsi!”

²³Impo iroro ikemavakera Erorishi yaventakotasanomatanakaty inkantumagetaketyo: “Teratyo naro tasorintsi, aiñotari paniro Tasorintsisanorira gaveavagetatsirira.” Iroro ikañotakerora

maika ipokapaake isaankariite Tasorintsi ikantakagantapaakerira. Ogatyo ikenake imantsigatanake yoganakari kenitsi ovashi ikamake.

²⁴Ogari Iriniane Tasorintsi ariompatyo otivarokakovagetanakari apagiteakovagetanakarora magatiro okenkitsatakota-nunkanira. ²⁵Yogari Verenave intiri Saoro itsatagaiganakerora itigankaviigakeririra irapigematsaegine timaigatsirira Antiokiaku, iponiaiganaa Jerosarenku ipigaiganaa itentaiganakari Joan Marokoshi.

**Verenave intiri Saoro
yanuiventashiiganakerora
Niagantsi Kametiri**

13 ¹Yogari kematsaigatsirira timaigatsirira Antiokiaku ikonogagarantaigaka inti kamantantaigatsirira, pashini inti gotagantaigatsirira. Iriroegitari yoka: Verenave, Sumeon (ikantaganirira Potsityainari), Iroshio Surenekunirira, Saoro intiri Manae (itentarira Erorishi ikimoigira. Yogari Erorishi inti inampina Sesa neagetakeririra magatiro Garireaku.) ²Impogini yapatoitaigaka iriroegi tera isekatumai-gempa, onti ipiriniventaigake iniaigakerira Atinkami. Impo ikantaigiri Isure Tasorintsi: “Nokogake pampakuaigakerira Saoro intiri Verenave nontigankai-gakerira inkenkitsaigakerora Niagantsi Kametiri, irorotari nokogakagaviigakeri.”

³Iroero yagataiganakera iniaigakerira Atinkami ipatikaiigakeri igitoku Saoro intiri Verenave ikantaigavakeri: “Maika piaigakera pinkenkitsaiganakerora Niagantsi Kametiri.”

**Verenave intiri Saoro
ikenkitsavageigakera Tsipereku**

⁴⁵Impogini itigankaigakeri Isure Tasorintsi iaigake Sereoshiaku itentaiga-

nakari Joan irimutakoigakerira. Impo yomateiganaka omaraneku pitotsi yamaatakoiganakera iaigakera Tsipereku. Iroero yogonkeigapaa-kera Saraminaku iaigake pankotsipageku yapatoitantaigarira jorioegi ikenkitsavageiganakerora Iriniane Tasorintsi.

⁶⁻⁸Impogini yanuiventashiiganakero Niagantsi Kametiri yapagiteavageiganakero Tsipere ovashi yogonkeavageipaaka Paposhiku. Ario kara itimi matsikanari paitacharira Varejoso. Irirori onti ikantagani aikiro Irimashi (onkantakera: “matsikanari”). Inti jorio pairorira yamatagavageta ikantaketari inti tigankakeri Tasorintsi inkamantantakera. Aikiro inti itentavagetarira inampina Sesa paitacharira Serejio Paoro. Yogari Serejio Paoro paio yogovageti. Impogini ikemakoigavakerira Verenave intiri Saoro pokaigake ikaemakantaigakeri, ikogaketari inkemisantakerora Iriniane Tasorintsi. Impo ipokaigake iriroegi yogotagaigavetanakari kantankicha yogari Varejeso onti yonaventaigavetakari nerotyo yakanatantaigavetavakarira ganiri ikematsatagaigiri. ⁹Yogari Saoro paitaacharira aikiro Pavoro itinkamitaritari Isure Tasorintsi yoganakeri kavako ipampogianakeri sorerere ikantiri:

¹⁰—iVinti matavitantatsirira, intitari tomintakempi kamagarini povetsikagisentanakarira terira onkametite pikisavintsavageigirira maganiro vetsikaigirorira kametiripage! ¿Antari gara pogagiyo yogotagantakerira Notinkami? ¹¹Maika inkisashitakempi Tasorintsi pinkamaraatanake garatyo pineimatairi poreachiri. Impogini avisanakera akatirika kutagiteri ario pineanae.

Ogatyo okenake apavatsaimotanakari tenige inea, ipasasavagetaketyo ikogakera tyanirika katsatakerine.

¹²Iroero ineavakera Serejio Paoro ikematsatakeri Kirishito, yogavagetana-

ketari kavako ikemakera yogotagaigake-
rira ikamantakotakerira Atinkami.

**Pavoro intiri Verenave
ikenkitsavageigakera Antiokiaku**

¹³Impogini iponiaiganaa Paposhiku yomateiganaa iaiganakera Perejeku Pampiriaku. Yogari Joan ipiganaa ovashi iatai Jerosarenku. ¹⁴Iriroegi iponiaiganaa Perejeku iaiganakera Antiokiaku Pisuriaku. Impogini aganakara kutagiteri apishigopireantaganirira ikiaigake pankotsiku yapatoitantaigarira jorioegi ipirinitaigapaake. ¹⁵Impogini agatanunkanira oniavantunkanira itsirinkakotana-kerira Moiseshi ontiri itsirinkakoiganake-rira kamantantaigatsirira yogari tinkamiigatsirira pankotsiku yapatoitan-taigarira yaiñoniiganakari Pavoro intiri Verenave ikantaigapaakeri:

—Notovaireegi, ariorika aityo pikogaigakerira pinkantaigakenarira kameti pishintsitagaigakenaniri. Aityorika atsi kantaigenanityo maika.

¹⁶Ikavirimatanakatyo Pavoro yogaenokavakotanagerora irako kameti inkemisantaigakeriniri ikantaigiri:

—Kemisantaigavakena viroegi notovai-reegi iseraereegi, aikiro maganiro viroegi pinkatsaigiririra Tasorintsi. ¹⁷Yogari Tasorintsi ikematsaigirira yashikiigana-kairira irirotari kogakagaigakeri irashintasanoigakemparira impogini nerotyo pairani itimaigavetara Ejipitoku ikavintsaavageigakeri ovashi itovaigava-getanaketyo kara. Impogini yagaveaka-gavagetakeri Moiseshi yamaiganairira parikoti.^k ¹⁸Yatsipereakovageigakari Tasorintsi 40 shiriagarini inaiagakera osarigagitetaapaakera.^l ¹⁹Impogini ipogereaigakeri timaigatsirira Kanaanku.

Yagutaigakeri igipatsiegite irirokya ipaigake yashikiiganakairira. Yogari pogereaigankicharira intiegitari ititaegi, jerejeseoegi, amoreoegi, kananeoegi, pereseoegi, jeveoegi, intiri jevoseoegi.^m ²⁰Atake avisavagetanake 450 shiriagarini iaigakera yashikiiganakairira intimaiga-kera Ejipitoku.

“Impogini onti ikantake Tasorintsi intimaigakera joeseegi pugamentaigakeri-neririra. Impo ario okañotaka kigonkero agavagetanakara itimakera kamantanta-tsirira Samoiri.” ²¹Impogini yogari yashikiiganakairira ikantaigakeri Tasorin-tsi ikogaigakera itimakera igoveenkarie-gite irorotari ipegakagantakaririra koveenkari Saoro itomi Sushi iyashikita-nakerira Vejamin.^o ²²Impogini aganakara 40 shiriagarini yapakuakagairi irirokya ipegakagaa koveenkari Iravi. Impogini ikamantakotakeri Tasorintsi ikanti: ‘Yogari Iravi itomi Isai inti pairorira ikametiti noshineventavagetakarityo kara yovetsikagetirota nokogagetirira.’^p

²³Impo ikantake intigankakera paniro iyashikitanakerira iripokakera irogavisaa-koigakaera aroegi iseraereegi. Maikari maika mataka pokake, irirotari Jeso pokutatsirira. ²⁴Antari panikyara intsitita-nakero inkenkitsatanakera iketyo ivatakero Joan ikenkitsavagetanakera ikantaiganakerira maganiro inkantatigai-ganakempara irapakuaiaganakerora yovetsikageigirira terira onkametite irogiviatagantaigakempara. ²⁵Impo panikyara iragatanaero ikogakagavitate-ririra Tasorintsi ikantanake: ‘¿Matsi naro pogiaigakerira? Karatapaatsine iripoka-paakera impogitapaakenanerira. Irirori pairotyo yavisakena yagaveavagetakera. Narori garorokarityo nokañotumatari

k 13.17 Ek. 1.7; 3.1-12; 12.29-41. **l 13.18** Nm. 14.34. **m 13.19** Ireo. 7.1.

n 13.20 Joe. 2.16; 1 Sa. 3.19-20. **o 13.21** 1 Sa. 8.4-5; 9.15-17; 10.17,24.

p 13.22 1 Sa. 13.13-14; 16.1,10-13.

irirori, onti nagamaavagetakari, pairotari yavisavagetakena.’

²⁶“Viroegi pikonogagarantaigaka inti yashikiiganakempi Averen, aikiro pikonogagarantaigaka tera iro yashikii-gempine kantankicha aiño pipinkatsai-giri Tasorintsi. Maika nokogake nonkamantaigakempira yogari Tasorintsi ipaigakai Iriniane kameti ankematsai-gakeriniri maganiro aroegi irogavisaa-koigakaera. ²⁷Maganiro timaigatsirira Jerosarenku intiegiri itinkamiegi tera irogoigenika onti ipokashitake Jeso irogavisaakoigakaera, tera inkemaigava-keronika itsirinkakoiganakerira kamantantaigatsirira iniavantaigirira kutagiteriku apishigopireantaganirira. Impo yogakagantaigakerira onti itsatagasanoigakero otsirinkakotunkanirira. ²⁸Teratyo ontimavetempa onkenan-takemparira irogavitantaigakemparirira, kantankicha ariompatyo ikantaiganakeriri Pirato irogakagantakerira. ²⁹Impogini otsatagagetanunkanira Itsirinkakagantakerira Tasorintsi, yogujiigakeri koroshiku ikitagairira, ³⁰kantankicha Tasorintsi yoganiairi. ³¹Impogini irirori ikoneatimogeigapanaatiri yogaegi giaiganakeririra iponianakara Garireaku iatakera Jerosarenku, impo otovaigava-getanakera kutagiteri iatai enoku. Maikari maika yogaegi giaiganakeririra iroegitari kamantakoiganakeri ikamantaigakerira atovaireegi.

³²⁻³³“Maika nokogaigake nonkamantai-ganakempira pairorira avisake okameti-takera. Yogari Tasorintsi itsatagakerotari magatiro ikantaigakeririra yashikiigana-kairira, aneantaigakarorira yoganiairira Jeso. Irorotari otsirinkakotunkanirira Saremoku 2 ikantakera Tasorintsi:

‘Virori vinti Notomi,
vikyakenkasano notomintaka maika.’

³⁴Ikantaketari Tasorintsi pairani irogoniaerira Jeso ganiri ovesegumata

ivatsa. Ariotari okantakeri Itsirinkakagantakerira okanti:

‘Nonkavintsaavageigakempi nontsa-tagakerora magatiro nokantakeririra Iravi.’

³⁵Aikiro otsirinkakotunkani apiteneku Saremo okanti:

‘Garorokari povashigantari irovese-ganakempira pomperane terira inkañovagetumatempa.’

³⁶Aroegi agoigake yogari Iravi itsataga-gevetakarotyo magatiro ikogagetakerira Tasorintsi, kantankicha impogini ikamanaira ikitataagani itentagantaa-gani yashikiiganakeririra yoveseganaara. ³⁷Kantankicha yogari Jeso yoganiairira Tasorintsi tera irovesegumatempa.

³⁸“Notovaireegi, nokogake pogotasa-noigakera intagani gaveankitsine Jeso irogavisaakoigakaera ganiri ikisaviigairo Tasorintsi akañovageigara. ³⁹Yogari ventaigarorira itsirinkakotanakerira Moiseshi gara yogavisaakotumatagani, kantankicha yogari ventaigaririra Jeso iro pinkante irogavisaakotaenkani. ⁴⁰Tsikyani vintiegirika okantakoigi itsirinkakoiganakerira kamantantaigatsirira kantatsirira:

⁴¹‘Kamaguige viroegi samatsatantai-gatsirira,

gavageiganake kavako, pimpoge-reaigakempatari maganiro.

Kantankicha antari aiñokyara pintimaige

novetsikagematetyo gakagantanki-tsinerira kavako.

Intimaigavetakempatyo kamantaigavetakempinerira maika tyara

nonkantaigetakero impogini viroegi garatyo pikematsatumaigiri.’”

⁴²Iroo yagatanakera ikenkitsatakera ikontetanai itentanaari Verenave. Yogari kemisantaigakeririra ikantaigavakeri:

—Pimpokaera pinkenkitsatimoigaate-nara omatanaempara aikiro aganaem-para kutagiteri apishigopireantaganirira.

⁴³Iroro iaiganaira Pavoro intiri Verenave yogiaiganakeri tovaini jorioegi intiegiri terira iriroegi jorioegi giatakotasanoigirorira itsirinkakotana-kerira Moiseshi. Impo ikantaigakeri inkantakanira inkematsatasanoigakeri Tasorintsi iraventasanoigakemparira ompote inkavintsaavageiganakerira.

⁴⁴Impogini aganaara aikiro kutagiteri apishigopireantaganirira yapatovageiga-nakatyo tovaini matsigenkaegi ipokashiigakerira Pavoro intiri Verenave inkemisaigaigakerira inkenkitsaigake-rora Iriniane Tasorintsi. ⁴⁵Kantankicha yogari jorioegi iroro ineaigavakera yapatoventavageiganakarira ikisaigama-tanakatyo ovashi ikantaigiri maganiro:

—Garatyo pikematsaigiri, intitari tsoenti, ontityo yamatavinaigakempi.

⁴⁶Kantankicha yogari Pavoro intiri Verenave tera intsarogumaige ariompa-tyo iniaiganakeriri ikantaigi:

—Viketyoniroro nopokashiigavetaka nogotagaigakempirora Iriniane Tasorin-tsi, vintiegitari jorioegi, kantankicha tera pishineventaigavakemparo, terorokari pinkogaige pinkantakanira pintimaigake, nerotyo maika inti noatashiigake nonkenkitsatimoigakerira terira iriroegi jorioegi. ⁴⁷Ariotari ikañotagaiganakenari Notinkami itigankaiganakenara ikanti:

‘Ontitari nontigankavitakempi
pinkenkitsatimoiganakerira
terira iriroegi jorioegi,
pintotenkagiteavagetanakemparora
magatiro kipatsi
pinkamantaigakerira maganiro
matsigenkaegi tyara nokanta
nogavisaakotantira.’

⁴⁸Iroro ikemaigavakera terira iriroegi jorioegi ishinevageiganakatyo kara

ikantaigi: “Onkametivagete Iriniane Tasorintsi.” Ovashi ikematsaigake maganiro ikogakagaigakerira Tasorintsi pairani inkematsaigakera kameti ganiri ineaigairo igamane. ⁴⁹Ariompatyo otivarokakovagetanakari Niagantsi Kametiri ikemaigakero maganiro timageigatsirira kara. ⁵⁰Kantankicha yogari jorioegi inianiaigakero tsinaneegei shintavageigacharira pinkatsaigiririra Tasorintsi intiegiri itinkamipage Antiokiakunirira ikantaigakerira inkisaigakerira Pavoro intiri Verenave. Impo iroro ikemaigavakera iriroegi ogatyo ikenaigake ikisashiiganakari itigankaigairi parikoti. ⁵¹Iriroegi ipotevonkititasanoiganaaro kipatsipane yagatikakoigakeririra kameti iroroniri ineantaigakempa onti iokaiganakeri iriaigakera parikoti yovetsikaigaketari terira onkametite teranika iragaigavakeri irishineigavakemparira. Impo ariokya iaiganake Ikonioku. ⁵²Kantankicha yogari kematsaigatsirira timaigatsirira Antiokiaku ishinevageiganakatyo kara, itinkamiigakaritari Isure Tasorintsi.

Pavoro intiri Verenave ikenkitsavageigakera Ikonioku

14 ¹Impogini yogonkeigapaakara Ikonioku ikiaigapaake pankotsiku yapatoitantaigarira jorioegi ikenkitsava-geigapaakera ovashi ikematsaiganake tovaini jorioegi intiegiri terira iriroegi jorioegi. ²Kantankicha yogari jorioegi terira inkogaige inkematsaigera inianiaigakeri terira iriroegi jorioegi ganiri ikematsaigiri niganki yagaveaiganakeri, nerotyo itsititantaiganakarira ikisaigana-kerira kematsaigatsirira. ³Kantankicha Pavoro intiri Verenave teratyo intsarogu-maige ariompatyo ikenkitsatakoiganake-riri Atinkami. Samani itimuntevageigake yogotagantavageigakera. Yagaveakagai-gakeri Tasorintsi yovetsikantaigakarira

terira oneimagetenkani kameti ineaigakeriniri maganiro inti tigankaigakeri.

⁴Kantankicha yogari timaigatsirira Ikonioku tenige inkemavakagaigampa. Ikonogagarantaigaka intiegi ishineventaigaka gotagantaigirorira itsirinkakotanakerira Moiseshi, pashinikya inti ishineventaiganaka iritigankaneegi Jeso. ⁵Impogini yogari jorioegi intiegiri terira iriroegi jorioegi itentaigakari itinkamiegi isariaiganakarira Pavoro intiri Verenave iratsipereakagaigakerira impo impitankaigakerira irogaigakerira. ⁶Kantankicha iroro ikemakoigakara iriroegi ishigaiganaka iaigakera Irishitiraku ontiri Irereveku nagetankitsirira Irikaoniaku, ontiri aikiro okaragetanakera Irikaonia, ⁷ikenkitsavageiganakerora Niagantsi Kametiri.

Ipitankavetunkanira Pavoro Irishitiraku

⁸Antari Irishitiraku aiño paniro terira iranuitumate, kantakani ikañotakara ishinkogisetakara ikyan kara mechotankitsi. ⁹Irirori ikemisantasananotavakerityo Pavoro ikenkitsatakera. Iroro ineaikerira irirori ipampogiasanotanakeri yogotan-takarira arisano yogotake iragaveakera Tasorintsi irovegaerira. ¹⁰Ikaemakotutarityo:

—iKaviritanake!

Ikavirimatanakatyo yanuitanakera.

¹¹Yogari patoitaigankicharira ineaigavakerira yoganuitakerira Pavoro iniaiganake irinianeegiku imaraenkarika kara ikantaigi:

—iPokaigake tasorintsiegi yaguitashii-gakaira ikitsagataigapaakarira matsigenka!

¹²Iriroegi ikantaigake yogari Verenave inti tasorintsi Seoshi. Yogari Pavoro ontii ikantaigake inti tasorintsi Eremeshi, irirotari niasanotankitsi ikenkitsatakera.

¹³Ogari ivanko tasorintsi Seoshi ontii onake aikyara otantatsaitara Irishitira ochenitakotakaro osotsimorote. Yogari

saserorote sentirorira yagagetake otegapage intiri aikiro toropage itentaigakari maganiro patoitaigankicharira yamaigakeri Pavoro intiri Verenave irovetisaigakerimera ishineventaigakaritari ikogantaigavetakarira impegakagagakemparimera itasorintsite. ¹⁴Kantankicha iriroegi ineaigavakerira itisaraakoiganaka imanchaki ishigateigamatanakarityo yapatoitaigakara ikaemaiganake ikantaigi:

¹⁵—¿Antari gara pikañoiga maika?

Narogegiri ariotyo nokañoigakempi viroegi, matsigenkatari nonaigake. Onti nopokashiiigake nonkenkitsaigakempira pokaiganakeriniri pipegaigavetarira pitasorintsite kogapage irirokyaniri pinkematsaiganake Tasorintsisanorira vetsikagetakerorira inkite, kipatsi, omaraani nia intiri maganiro timantagetarorira. ¹⁶Pairani Tasorintsi yapakuagavetanakari maganiro matsigenkaegi terira iriroegi jorioegi tenige iriniaigaeri ontii itimashiigavetaaro kogapage, ¹⁷kantankicha aiñokyatyoo ikavintsajaigiri kameti iroroniri ogotantenkani tyara ikanta irirori, irirotari givarigairo inkani aikiro yogimonkage-tairo pankirintsi page otimantaarira pogaigaarira pishinevetantaigakarira.

¹⁸Ikañoigavetakarityo maika teratyoo inkemaige, tyampatyoo inkantaigakeri, ariompatyoo ikogaigavetanakari irovetisaigakerimera toro.

¹⁹Impogini yogonkeigapaaka jorioegi Antiokiakunirira intiegiri Ikoniokunirira inianiaigapaakerira maganiro ikantaigakerira gara ishineventaigaari ontii inkisaigakeri impo ovashi yagaveaiganakeri, nerotyo yagantaiganakaririra Pavoro ipitankaigakerira mapuku. Impogini ineaigiri kamakeri inoshikaiganakeri yamaiganakerira iokaigakitirira parikoti okaragetanakera pankotsi page.

²⁰Kantankicha iroro yapatoventaigapaakarira irapigematsaegine ogatyoo ikenake

itinaanaa ipiganaara inkaaraku ipitanka-
vetunkanira. Impo okutagitetanaira
itentanai Verenave iaigakera Irereveku
²¹Ikenkitsavageigakera Niagantsi
Kametiri ovashi ikematsaigake tovaini
matsigenkaegi. Impogini yagatavageiga-
nakera ipigaiganaa Irishitiraku, Ikonioku
ontiri Antiokiaku. ²²Ario kara ishintsita-
gaiganakeri maganiro kematsaigatsirira
ikantaiganakeri:

—Pinkantakanira pinkematsasano-
igake gara papakuimaigiro pikematsaiga-
kerira, antsipereaventavageigakeritari
Atinkami, kantankicha impogini irapatoi-
taigakerira Tasorintsi maganiro kematsai-
giririra imegakempara Igoveenkariegite
aigake antimimoigakerira.

²³Impogini yagagarantaigakeri kameti
irisentaigakeriniri irapigematsaegine
timageigatsirira kara. Impo ipitashiiga-
karo kogapage tera isekataigempa onti
ipiriniventaigake iniaigakerira Tasorintsi.
Antari yagataiganakera ikantaiganakeri:

—Irisentaigakempira Atinkami
pikematsaigakerira.

Pavoro intiri Verenave ipigaiganaara Antiokiaku Suriakutirira

²⁴Impogini iaiganake ikenaiiganake
Pisuriaku yogonkevageigaka Pampiriaku.

²⁵Ikenkitsavageiganake Niagantsi
Kametiri Perejeku, impo ariokya iaigake
Atariaku. ²⁶Impo matakatar yagatavagei-
ganake ikenkitsavageigutira yomateiga-
naa iaiganaira Antiokiaku, ariotari
iponiaiganakari okyasanokeyara ikantaiga-
kerira irapigematsaegine iriaigakera
inkenkitsavageiguterora Niagantsi
Kametiri, impo aikiro iniaventaigavakeri
ikantaigakerira Tasorintsi impampogia-
koigakerira iragaveakagaigakerira
inkenkitsavageigutera. ²⁷Impo yogonkei-
gapaakara ikaemaigapaakeri maganiro

irapigematsaegine ikamantaigapaakerira
magatiro yagaveakagaigakerira
Tasorintsi. Aikiro ikamantaigakeri tyara
ikanta Tasorintsi ikavintsajaigakerira
terira iriroegi jorioegi kameti inkemakoi-
gakeriniri iriroegi aikiro Jesokirishito
inkematsaigakerira. ²⁸Ario kara itimuntei-
ganake itentaigakarira irapigematsaegine.

Apatoitunkanira Jerosarenku

15 ¹Antari aiñokya Pavoro intiri
Verenave Antiokiaku ipokaigake
pashini ponaiagankicharira Joreaku
yogotagaigakerira kematsaigatsirira
ikantaigiri:

—Pintsatagaigakerora itsirinkakotana-
kerira Moiseshi pogaratsaitagantaigake-
rora pichonkirimeshinate. ²Antari
garika pogaratsaitagantaigiro garatyo
yogavisaakoigimpi Tasorintsi.

²Yogari Pavoro intiri Verenave
ikantaviigakeri ikantaigiri:

—Viroegi tera pogoige onti pikomui-
gakaro.

Ariompato iniavakagaiganakari
teranika inkemavakagaigempa, ³nerotyo
itigankantunkanirira Pavoro intiri
Verenave intiegiri pashini kematsaigatsi-
rira iriaigakitera Jerosarenku inkogako-
tagantaigakiterira iritigankaneegi Jeso
intiegiri sentaigiririra kematsaigatsirira
tyarikara inkantaigera iriroegi. Iaiganake
ikenaiiganake Penishiaku ontiri
Samariaku ikamantantaiganakerora
ikematsaigakera terira iriroegi jorioegi.
Iroo ikemakoigavakerira maganiro
kematsaigatsirira ishinevageiganaka.

⁴Impogini yogonkeigapaakara
Jerosarenku ineaigavakerira irapigema-
tsaegine yagaigavakeri ishinevageigana-
katyo. Ariotari inaiigakeri iritiganka-
neegi Jeso intiegiri sentaigiririra
kematsaigatsirira. Ikamantageigapaakeri

tyara ikantaka ikavintsaavageigakerira Tasorintsi imuvageigakerira ikenkitsavageigakera. ⁵Kantankicha yapatoitaigakara ario inaigake pariseoegi kematsaigakeririra Kirishito. Impo iriroegi yaratinakaigamatanaketyo ikantaigi:

—Yogari kematsaigankitsirira terira iriroegi jorioegi irogaratsaitagantaigakeroty ichonkirimeshinaegite, aikiro intsatagaigakeroty magatiro itsirinkakotanakerira Moiseshi.

⁶Iroko ikonteiganaira maganiro yogari iritigankaneegi Jeso intiegiri sentaigiririra kematsaigatsirira yapatoitaigaa iriniaventaigakerora ikantaigakerira pariseoegi kameti inkemavakagaigakempara. ⁷Samani ipiriniventaigakero teratyo aiñokya inkemavakagaigempa. Impo yaratinakamatanaketyo Perero ikanti:

—Napigematsaegine, viroegi pogoigaketari itigankakena Tasorintsi nonkenkitsatakerora Niagantsi Kametiri nonkenkitsatimoigakerira terira iriroegi jorioegi inkemaigavakerora inkematsaigakeriniri Jesokirishito. ⁸Impogini yogari Tasorintsi neasurentaigiririra maganiro matsigenkaegi itigankakeri Isure intimasurentaigakerira terira iriroegi jorioegi kameti ogotakenkaniniri ishineventaigakari iriroegi aikiro, onti ikañotagaigakaira aroegi itigankakerira itimasurentaigakaira. ⁹Itaigakaritari iriroegi ikañotagaigakai aroegi, ikematsaigakeritari ovashi yogavisaakoigakeri imagisantairo ikañovageigara. ¹⁰¿Antari gara pikañoiga maika? ¿Matsi pineaigiri Tasorintsi tera irogote? Onti povashigaiganakaro pikantantaigankarira intsatagaigakerora itsirinkakotanakerira Moiseshi, kantankicha yogaegiri yashikiiganakairira tera iragaveaigero intsatagaigerora. Ario akañoigaka aroegi tera agaveaige. ¹¹Kantankicha maika agoigake inti kavintsajaigakai Atinkami Jesokirishito yogavisaakotantaigakairira. Ario ikañoigakeri aikiro terira iriroegi

jorioegi ikavintsajaigakerira yogavisaakotagantaigakerira.

¹²Iroko yagatanakera Perero iniakera ikemisantaiganake maganiro, impo irirokya ikemisantaigake Verenave intiri Pavoro ikamantageigakerira yagaveaigaigakerira Tasorintsi yovetsikaigakera terira oneimagetenkani ikenkitsatimoi-gutirira terira iriroegi jorioegi.

¹³Impo yagataiganakera iriroegi irirokya nianankitsi Santiago ikanti:

—Maika napigematsaegine, nokogake pinkemisantaigakenara nonkamantaigakempira. ¹⁴Maika ikamantaigakaira Sumo Perero tyara okantaka ikyara ikemaigakerora Niagantsi Kametiri terira iriroegi jorioegi, intitari kogagaigakeri Tasorintsi inkematsaigakerira. ¹⁵Katinka oganakero itsirinkakoiganakera kamantantaigatsirira okanti:

¹⁶‘Tera inkematsaigenanika pitovai-reegi pairaninirira neroty nokisantaigakaririra

tenige nonkavintsaavageigaeri kigonkero maika,

kantankicha impogini nonkavintsaavageigaeri piyashikiiganakerira nontsatagetakerora magatiro nokantakeririra koveenkari Iravi pairani

ovashi intimake iyashikitanakerira pegankichanerira Igoveenkariegite maganiro kematsaigakerinerira.

Onti nonkañotagagetakero maika

¹⁷kameti inkematsaigakenaniri aikiro terira iriroegi jorioegi nokogagaigakerira nashintaigakemparira.

¹⁸Ariotari nokantakeri, nantitari Tasorintsisanorira gikoneagetakerorira magatiro nosaria-karira pairani okyasanokyara.’

¹⁹‘Irorotari maika gara akantanaigiri terira iriroegi jorioegi kematsaigankitsi-

rira intsatagageigakerora magatiro
itsirinkakotanakerira Moisesi. ²⁰Intagati
antsirinkaigakeri ankantaigakerira gara
yogumaigaari ivatsa ipaigavetunkanirira
ipegetaganirira tasorintsi kogapage.
Gara iatashitumaigairo tsinane terira iroro
irashi. Gara yogumaigaari ikatikagetaga-
nirira, aikiro gara yogumaigaaro
iriraapage yogagetaganirira. ²¹Ariotari
okantakeri itsirinkakotanakerira Moisesi^r
ogantagarira ogotagatagani pairani
tyarika itimageigira atovaireegi, aikiro
oniavantagani omirinka apatoitaganira
pankotsipageku apatoitaganirira
kutagiteriku apishigopireantaganirira.”

**Itsirinkaigakerira terira
iriroegi jorioegi**

²²Iroto ikemaigavakera iritigankaneeji
Jeso, itentaigakari maganiro kematsaiga-
tsirira intiegiri sentaigiririra ikantaigi:

—Tsame antigankaigakera piteni
irogiaiganakerira Pavoro intiri Verenave
iriaigakera Antiokiaku.

Inti itigankaigake Jorashi Varesava
intiri Surashi. Iriroegi intiegi kematsaiga-
tsirira pairorira inegintevageiga. ²³Aikiro
itsirinkaigavakeneri sankevanti ipaigava-
kerira iramaiganakenerira ikantaigi:

Maika naroeji iritigankaneeji Jeso
notentaigakari sentaigiririra kematsai-
gatsirira nontsirinkaigakempira viroegi
napigematsaegine timaigatsirira kara
Antiokiaku, Suriaku ontiri Surishiaku
ariorika kametikya pinaigake.

²⁴Naroeji nokemakoigakempitari
iaigakera timaigatsirira aka yoverajai-
ganakempira ikantatigaiganakerora
nogotagaigakempirira. Ikantaigakempi
pogiatakoiganakerora itsirinkakotana-
kerira Moisesi pogaratsaitagantaiga-
kerora pichonkirimeshinaegite,
pikantantaigakarira: “¿Tyarika

nonkantaigakempa kameti nogoigake-
niri tyani nonkematsaigake?” Kantan-
kicha tera naro tigankaigerine,
tsikyatatyo iatashiigakaro iriroegi.

²⁵Irorotari maika napatoitantaigakarira
nokemavakagaigakara nontigankaiga-
kerira Jorashi intiri Surashi iriaigaki-
tera inkamosoigutempira, inti
irogiaiganake Verenave intiri Pavoro
²⁶pimantaiganakarorira igamane
yanuiventashiiganakerira Atinkami
Jesokirishito inkenkitsatakovageigana-
kerira. ²⁷Yogari Jorashi intiri Surashi
onti notigankaviigakeri inkamantaiga-
kempira magatiro nontsirinkaigakempi-
rira. ²⁸Intagati nonkantaigakempi
ikogakerira Isure Tasorintsi. ²⁹Gara
pogumaigaari ivatsa ipaigavetunkani-
rira ipegetaganirira tasorintsi
kogapage. Gara pogumaigaaro
iriraapage yogagetaganirira. Gara
pogumaigaari ikatikagetaganirira.
Gara piatashitumaigairo tsinane terira
iroro pashiegi. Maika intagati.

³⁰Impogini yogari itigankaigakerira
iaigake Antiokiaku yapatoitaigapaakeri
maganiro kematsaigatsirira ipaigapaa-
keri sankevanti. ³¹Iroto iniavantaigake-
rora ogatyo ikenaiigake ishinevageigana-
katyo kara. ³²Yogari Jorashi intiri
Surashi intiegitari kamantantaigatsirira
ikenkitsatimovageigakeri ishintsitagai-
ganakerira yogishineavageiganakerira.
³³Impogini otovaigagitevegetanaira
ipintsatanaa iriaiganaera itimaigira
tigankaigakeririra okyara. Yogaegiri
irapigematsaegine timaigatsirira kara
iniaigavairi ikantaigavairi:

—Maika kametikya piaiganaera
intentanaempitari Tasorintsi.

Ovashi iaiganai, ³⁴kantankicha yogari
Surashi itatsitaka ovashi tera aiñokya
iriatae. ³⁵Ario ikañoigaka Pavoro intiri

Verenave tekya aiñokya iriaige onti samani inaianai Antiokiaku itentaigaa-rira pashini yogotagantavageigakera Iriniane Tasorintsi.

**Pavoro imatanairora
yanuiventavagetanairora Niagantsi
Kametiri ikenkitsavagetanairora**

³⁶Impogini Pavoro ikantiri Verenave:
—Tsame ampigaiganaera aneaigaate-rira maganiro apigematsaegine akenkitsa-timoiganakerira karanki aiñoegirikara.

³⁷Ikanti Verenave:
—Iroroventi maika tsame agaiganae-rira Joan Marokoshi.

³⁸Kantankicha Pavoro ikanti:
—Naro tera nonkoge impokakera, iokaiganakaitari okyara Pampiriaku tera iramampiaigae akenkitsavageigakerora Niagantsi Kametiri.

³⁹Iniavakagaigavetaka tera inkemavaka-gaigempa ovashi yontainavakagaiganaka. Yogari Verenave itentanakari Marokoshi yomateiganakara pitotsiku iaiganaira Tsipereku. ⁴⁰Impo yogari Pavoro inti itentanaka Surashi. Maganiro irapigema-tsaegine iniaventaigavakeri kametikyaniri iriaigake. ⁴¹Impogini iaiganake ikenai-ganake Suriaku ontiri Surishiaku ishintsita-gaiganakerira maganiro kematsaigatsirira.

**Timoteo yogiatanakerira
Pavoro intiri Surashi**

16 ¹Impogini iaiganake Irereveku ontiri Irishitiraku. Ineaigapaakeri kara paniro kematsatatsirira paitacharira Timoteo. Ogari iriniro onti joria kematsa-tatsirira. Yogari iriri inti guriego. ²Yogari kematsaigatsirira timaigatsirira Irishitiraku ontiri Ikonioku ineaigakeri inti pairorira inegintevageta, ³irorotari ikogantakarira Pavoro intentanakerira, kantankicha oketyo yogaratsaitagantana-keri ichonkirimeshinate ganiri ikisaigava-keri jorioegi timageigatsirira inkenagei-

ganakera. Maganirotari yogoigake inti tomintari guriego. ⁴Antari yogonkeiga-paakara itimageigira ikamantageigana-keri irapigematsaegine ikantaigakeririra iritigankaneeji Jeso intiegiri sentaigiri-rira kematsaigatsirira timaigatsirira Jerosarenku kameti intsatagaigakerora irosoegi aikiro. ⁵Yogari kematsaigatsirira ariompatyo ikematsatasanoiganakeriri Atinkami omirinka kutagiteri, ariompa-tyo itovaigavagetanakeri.

Ineakerira Pavoro Maseroniakunirira

⁶Impogini yogari Pavoro intiri Surashi ikogaigavetaka inkenkitsaigutemera Ashiaku, kantankicha yogari Isure Tasorintsi tera inkoge, nerotyo ikenantai-ganakarira Pirijiaku ontiri Garashiaku ⁷ovashi yogonkeigapaaka okaragetapaa-kera Mishia. Impo ikogaigavetaka aikiro iriaigakemera Vitiniaku, kantankicha yogari Isure Jeso tera inkoge iriaigakera. ⁸Irorotari ikenantaiganakarira Mishiaku iaiganakera yogonkeigapaakara Toroashiku. ⁹Impogini onigankigitetana-kera yogari Pavoro inei ontinirika okañotimotakari igisanireku yaratinkimo-tapaakeri Maseroniakunirira ikantapaa-keri: “Pimpokakera Maseroniaku pinkenkitsatimoigakenara.” ¹⁰Impo naroeji novetsikaiganaka noaiganakera, nogoigaketari inti kogankitsi Tasorintsi noaigakera nonkenkitsatimoigakerira Maseroniakunirira nonkamantaigakerira tyara ikanta yogavisaakotantira.

Pavoro intiri Surashi ineaigakera Piripoku

¹¹Iroro okutagitetanaira nomateiga-naka pitotsiku namaatakoiganakera patiro nogaiganakero Samoterashiaku. Impo okutagitetanaira aikiro ario nogonkeigapaaka Neaporishiku. ¹²Ariokya nokenaiganake avotsiku noaiganakera Piripoku. Ogari Piripo onti otinkamitakarira Maseronia, intiegi

shintaignaro iromanoegi. Ario nomagaignake kara mavati kutagiteri. ¹³Impogini agakara kutagiteri apishigopireantaganirira noaigake oaaku iniapinitaganira Tasorintsi nopirinitaigapaake nokenkitsaigapaakerora Niagantsi Kametiri nokamantaigakerora tsinaneegi patoitaigankicharira. ¹⁴Ario onake kara paniro tsinane paitacharira Iriria poniankicharira Tiatiraku. Irorori onti pimantavagetatsirira mechomagoripage kamisa kamachonkamagori. Pairo okematsavagetiri Tasorintsi. Okemisan-tasanotakeri Pavoro ikenkitsavageta-keri, intitari niasurentakero Atinkami, nerotyo okematsatantakarira. ¹⁵Ovashi ogiviatagantaka otentaigakari maganiro magimoigirorira impo okantaigana:

—Pineaigakenarika arisano nokematsatanotakeri Atinkami pimpokaigake-tyo pimagimoigakenara novankoku.

Agaiganakena noaiganake nomagimoigakerora.

Yashitakoigunkanira Pavoro intiri Surashi

¹⁶Impogini noaigavetanaara aikiro iniapinitaganira Tasorintsi notonkivoaigakaro ananeki gogetirorira tyarika onkantagetanakempa impogini, intitari gotagakero kamagarini timagutakerorira. Omirinka okamantantira opunatagani koriki impo irorokya paigavairi nampiigarorira, irorotari yagantaigarira tovai igorikiegite. ¹⁷Irorori ogiaiganakena okaemanakera okanti:

—iNeri yogaegi iritigankaneegi Tasorintsi gaveavagetatsirira, onti ipokaigake inkamantaigakempira tyara pinkantaigakempa irogavisaakoigakempira Jesokirishito!

¹⁸Ario okañotakero maika omirinka kutagiteri noatapiniigira. Impo overaamatanakerityo Pavoro ishonkate-matanakarotyo ikantutarityo timagutakerorira:

—Maika naventashitakempiro ivairo Jesokirishito nonkantakempira kontetanae piatae.

Ogatyo ikenake ikontetapanuti.

¹⁹Kantankicha yogari nampiigarorira ineiaigavaketari ganigera yagantavageigaaro koriki yagaigamatanakerityo Pavoro intiri Surashi yamaiganakerira yapatoitapiniigara itinkamipage ²⁰ikantaigapaakeri ijoesegite:

—Neri yoka jorioegi onti ipokashiigake yoveraavageigakenara ²¹yogotagavageiganakenara pashini terira nameigemparonaroegi, aikiro garatyo nagaveimaigi nonkematsaigakerira, nantiegitari iromanoegi, ikantaviiganarotari Sesa.

²²Iroo ikemaigakerira ikamantaigakerira ikisaigamatanakatyo maganiro. Impo yogari joeseege yomperaventaigakari isapokaigakerira ipasapasaigakerira.

²³Antari yagataigakera ipasapasaigakerira yamaiganakeri yashitakotagantaigakerira. Ikantaigakeri shitakotantatsirira irisentasa-noigakerira. ²⁴Iroo ikemavakera yogiaganovageigakeri tsompogi yavinaakotantaigakerira inchakota itasagiiku.

²⁵Impo iriroegi tera irimagaige onti ipiriniventavageigake iniaigakerira Tasorintsi, aikiro imatikaventavageigakerira. Yogari itovaire shitakoigankicharira naigankitsirira kara ikemisantaigakeri iriroegi aikiro. ²⁶Impo onigankigite-tanakera katsiketyo ontininkamatanaka kipatsi okantanakera pankotsi shige shige shige ogaty okenake ashireagetanaka shitakomentontsipage, otsaagetanaka karenatsa yogusotantaigunkanirira maganiro shitakoigankicharira ashiriagetanakara. ²⁷Ikireamatanaketyo shitakotantatsirira ineitarotyo shireage-taka shitakomentontsipage inoshikamatanaketyo isavurite imokoroakempera, ineiri atakeri ishigaiganaka shitakoigankicharira. ²⁸Kantankicha ikaemamatanaketyo Pavoro ikanti:

—iGara pimokoroa! Maganirotari aiñoegina aka.

²⁹Iroo ikemavakerira ikantutatyo irogimorekakenkanira mechero ovashi ishigapaaka ikiapaakera itsarogavagetanakettyo kara ishigekavagetanakera itigeronaka ivonkitiigakera Pavoro intiri Surashi.

³⁰Impo yogikonteigakeri ikantaigiri:

—Atsi kamantenanityo, ÷tyara nonkantakempara kameti irogavisaakotakenaniri Tasorintsi?

³¹Ikantaigiri iriroegi:

—Kematsasatanoteri Notinkami Jesokirishito iriro gavisaakotakempine ario inkañotagaigakempari maganiro magimoigimpirira.

³²Impo Pavoro intiri Surashi yogotagagakeri irirori intiegiri maganiro magimoigiririra ikantaigakerira tyara ikanta Tasorintsi yogavisaakotantira. ³³Iroo yagataigakera yogotagaigakerira yogari shitakotantatsirira ikivagiseigairi yagaveavageigunkanira ipasapasaigunkanira. Impo yogiviatagantaka irirori intiegiri maganiro magimoigiririra. ³⁴Impo yamaiganakeri ivankoku ipaigakeri iseka. Ishinevetakatyyo kara irirori intiegiri aikiro maganiro magimoigiririra ineaigakera ikematsaigakerira Tasorintsi.

³⁵Impo okutagitetanaira yogari joeseegi itigankaigake soraroegi inkantaigakiterira irapakuaigaerira.

³⁶Impo irirori ikantiri Pavoro:

—Ikantakagantaigakena nampakuai-gaempira. Maika konteiganae, kametitya piaigae.

³⁷Kantankicha Pavoro ikantaigirityo soraroegi:

—Naroegi nantiegi iromanoegi nonaigavetaka, nantiegi ipugamentavintsagirira Sesa. Kañotari chapi ineaigake maganiro nantiniroro ipasapasaigake kogapage impo yashitakoigakena tera ario okettyo inkogakotagantumaigna tatoita nokenkitsatakoigake, ÷matsi

maika maireni irogikontetagantaigaena? iGaraty noaigi! Kantetyo iripokaigakera iriroegi tsikyata irogikonteigaatena.

³⁸Ipigaiganaa soraroegi ikamantaigapaakeri joeseegi. Iroo ikemakoigavakerira intiegi iromanoegi ogatyyo ikenaiigake itsarogavageiganakettyo kara. ³⁹Impo ovashi iaigake irogametaigae-rira. Antari yogonkeigapaakara yogikonteigairi ikantaigiri:

—Gamerakari nokañoigimpi maika. Maikari maika atsi ariome piaigaeme parikoti.

⁴⁰Iroo ikonteiganaira iaigake ovankoku Iriria iniaiganairira irapigema-tsaegine ikantaiganakerira inkantakanira inkematsasanoigake, impo iaiganai.

Ikisunkanira Pavoro Tesaronikaku

17 ¹Impogini ikenaiiganai Ampiporishiku ontiri Aporoniaku yogonkeigapaaka Tesaronikaku. Ario kara otimake pankotsi yapatoitantaigara jorioegi. ²Yogari Pavoro ikiapinitake mavati kutagiteri apishigopireantaganirira yogotagantavagetakerora Iriniane Tasorintsi, kantakatari irirori yogametakara yogotagantira omirinka kutagiteri apishigopireantaganirira.

³Antari yogotagaigakerira ikantaigakeri:

—Ogari Itsirinkakagantakerira Tasorintsi okantake yogari Ikogakagakerira intigankakerira impegakempara Agoveenkariégite inkamake impo iraniana. Maika nonkantaigakempi ario ikañotanakero Jeso nokamantakoigakerira, irirotari itigankake Tasorintsi irogavisaakoigakerira maganiro kematsaigakerinerira impegakempara Igoveenkariégite.

⁴Ikonogagarantaigaka jorioegi ikematsaiganake ovashi itentagaiganakari Pavoro intiri Surashi. Aikiro ikematsatagarantaiganake guriegoegi shineventavageigaririra Tasorintsi. Ario okañoiganaka tovaini itsinanetsiegi

itinkamipage Tesaronikakunirira okematsaiganake. ⁵Kantankicha iroro ineaigavakerora jorioegi terira inkematsaige ikisaigamatanakatyo impo iaigake yapatoitaigakeri pashini tovaini matsigenkaegi pairorira yavisaigake terira inkametiige, aikiro tera tatoita irantumaige onti ipitashiigaro kogapage. Impo itentaiganakari ikaemavaitaiganake ikantaiganakerira maganiro inkisaiganakerira Pavoro. Impo iaiganake ivankoku Jason ikogaigavetakarira Pavoro intiri Surashi inoshikaigakerimera impaigakerimera patoitaigankicharira inkisaigakerimera ⁶kantankicha tera ineaigeri, nerotyo intira inoshikaiganake Jason intiegiri pashini irapigematsaegine yamaiganakenerira itinkamipage ikaemavaitaiganakera ikantaigi:

—iYogari Pavoro intiri Surashi intiegiri veraavageigiririra maganiro matsigenkaegi, maika ariokya ipokaigake aka yagaigavakeri Jason! ⁷Iriroegi tera intsatagaigero ikantirira agoveenkariegite Sesa teranik inkematsaigeri, ikantaigaketari aiño pashini koveenkari ipaita Jeso!

⁸Iroo ikemaigavakerora maganiro patoitaigankicharira intiegiri itinkamipage ikisaigamatanakatyo. ⁹Impo ikantaigiri Jason intiegiri irapigematsaegine:

—Yogari Pavoro intiri Surashi tera nonkogaigeri aka. Tigankaigaeri parikoti, kantankicha maika paigenata koriki, impogini iriaigaerika nogipigaigaempiri. Impo ipaigakeri ovashi yapakuaigairi.

Pavoro intiri Surashi inaigakera Vereaku

¹⁰Impo apavatsaanakara yogari kematsaigsirira itentaiganakari Pavoro intiri Surashi yogavokiigakitirira iriaigakera Vereaku. Iroro yogonkeigapaakara ikiaigapaake pankotsiku yapatoitantaigarira jorioegi yogotagantavageigapaakera. ¹¹Yogari jorioegi timaigatsirira Vereaku tera ario inakañoigempari

timaigatsirira Tesaronikaku. Iriroegi onti ikemisantasanoigavakeri yogotagaigakerira. Omirinka kutagiteri iniavantaigakeri Iriniane Tasorintsi ineaigakerora katinkarikara onake ikantaigakeririra, ¹²nerotyo ikematsatantaiganakaririra Jeso tovaini jorioegi intiegiri guriegoegi. Ikematsaiganake surariegi ontiegiri aikiro tsinaneeegi shintavageigacharira.

¹³Kantankicha yogari jorioegi timaigatsirira Tesaronikaku ikemakoigakeri Pavoro aiño ikenkitsavagetanakero Iriniane Tasorintsi Vereaku nerotyo ipokantaigakarira impo inianiaigapaakeri timaigatsirira kara ikantaigakerira inkisaigakerira Pavoro. ¹⁴Iroo ikemaigavakera kematsaigatsirira yogishigaigakeri Pavoro iriatakera otsapiaku omaraani nia. Intaganivani inaigai Surashi intiri Timoteo. ¹⁵Yogari mampiaiganakeririra yogavageigakitiri Atenaku, impogini ipigaiganaa. Yogari Pavoro ikantaigavakeri:

—Pinkantaigapaakerira Surashi intiri Timoteo iripokaigakera shintsi.

Ikenkitsavagetakera Pavoro Atenaku

¹⁶Antari inakera Pavoro Atenaku yogiaigakerira Surashi intiri Timoteo iripokaigakera, iatake yanuivagetakera. Impo ineaigakeri yovetsikageigakerira timaigatsirira kara ipegageigakerira itasorintsite kogapage. Antari ineakerira itovaigavagetiratyo kara ogatyo ikenake yovankinavagetanaka. ¹⁷Impo iatake pankotsiku yapatoitantaigarira jorioegi ikenkitsatimoiganakeri iriroegi intiegiri aikiro pashini matsigenkaegi pinkatsaigiririra Tasorintsi. Ario ikañotakero maika aikiro omirinka kutagiteri iatapinitakera opimantagetaganira arakintsipage ontiri ogagetaganirira itentaigakarira naigankitsirira kara ikenkitsavakagaigakara.

¹⁸Ario inaigake giatakoigirorira yogotagantanakerira Epikoro pairani

itentaigakarira pashini govageigatsirira ikantaganirira ishitoikoegi. Iririroegi itentaigakari Pavoro ikenkitsavakagaigakara, kantankicha impo ikonogagaran-taigaka ikantaiganake:

—¿Tyarikara ikantira yoga niavagetasirira kogapage irorokya ikanti, irorokya ikanti?

Pashinikya kantaigankitsi:

—Intirorokari kenkitsatakotiririra pashinirira tasorintsi.

Ikantantaigakarira maika ikemaigakeritari ikenkitsatakotakerira Jeso yanianaira.

¹⁹Impo yamaiganakeri Areopagoku, ariotari kara yapatoitapiniigari ikogakotagantaigirira tyanirika kenkitsavage-tankitsirira pashini okyarira niagantsi kameti inkantaigakeniri ario inkemisan-takenkani ontirika gara ikemisantagani. Impo ikantaigiri Pavoro:

—¿Tatatyo oita pogotagantanake?

²⁰Tera nonkemumaigero pogotagaiganakenarira, irorotari nokogantaigakarira pogikoneatasanoigakenarora.

²¹Ikantantaigakarira maika imirinkae-gitari Atenakunirira intiegiri poniaigan-kicharira parikotipage timaigatsirira kara ontitari ipiriniventavageigi ikemisantaigira okenkitsatakotunkanira pashinirira tekyarira inkemumaigero, impo irorokya niakoigairo.

²²Yaratinkamatanake Pavoro ikanti:

—Viroegi timaigatsirira Atenaku, noneaigakempi vintiegi pairorira piriniventavageigiri tasorintsi page, ²³neroty noatakera nanuivagetakera nokamosogetakerora povetsikashiigakeniririra pitasorintsiegite noneapaakero patiro aityo otsirinkaka okanti: 'Inti yovetsikashitunkani Tasorintsi terira inkemakotumatenkani.' Yogari yoga Tasorintsi irirotari nokenkitsatakotirira naro, kantankicha viroegi tera pinkemakotumaigeri onti pipegashitakari pitasorintsite kogapage. Irirori inti

Tasorintsisanorira. ²⁴Irirotari vetsikakerorira kipatsi ontiri magatiro timantagetarorira. Irirori intitari shintagetarorira inkite ontiri kipatsi. Tera intimantemparo pankotsi yovetsikaigirira matsigenka.

²⁵Tera tatoita inkogakotempa irirori irovetsikaigakenerira matsigenka, irirotari timakagaigakai, aikiro iriro ganiaigakai ipaigakairora magatiro.

²⁶“Ikyasanokyara yovamparoatake matsigenka panirosanoty inake impo ovashi yogitovaigakeri kameti irapagiteaiganakemparoniri magatiro kipatsi, irirotari kantankitsi tyarikara imechoigake, aikiro tyarikara intimaigake.

²⁷Ario ikañoigakeri maika kameti inkogaigakeriniri ompote inkematsaigakerira, teranika isamanitakoigajae, aiñonitari inake. ²⁸Irirotari ganiaigakai ishintsitagaigakaira. Gamera itimi irirori gametyo atimaigi. Ariotari ikantaigakeri pitovaireegi pairorira yogovageigi: 'Intitari tomintaigakai Tasorintsi.'

²⁹“Irorotari itomintaigakaira Tasorintsi gamerorokari aneaigiri kañomataka irironirika ipegagetaganirira tasorintsi kogapage yovetsikagetantaganirira kori, perata ontiri mapu. ³⁰Pairani tera irogoigenika matsigenka teniroro tyara inkantumaigeri Tasorintsi, kantankicha maika ikantaigakeri maganiro inkantagaigakempara irapakuaiganakerora ikañovageigara. ³¹Impoginitari agapaakempa kutagiteri inkantakera Jeso tyanirika kañovagetankicha, aikiro tyanirika terira inkañovagetempa, katinkatyo irogakero, intitari kantakeri pairani Tasorintsi inkañotagetakakerora maika, impogini yoganiari ikamavetakara kameti agoigakeniri ario inkañotakero maika.”

³²Iroero ikemaigavakerora iniakotakerora iraniaiganaera impogini igamaga ikonogagarantaigaka ikavakavaitaiganake isamatsanaigakerira. Pashinikyatyo kantaiganankitsi:

—Impogini nonkemaigaempi aikiro.

³³Nerotyo iokantaiganaaririra Pavoro iatanaira, ³⁴kantankicha ikonogagaran-taigaka yogiaiganakeri ovashi ikematsaigakeri Jeso. Impo ikematsatake paniro itentaigarira patoitapiniigacharira Areopagoku. Irirori ipaita Ironishio. Aikiro okematsatake paniro tsinane paitacharira Tamarishi. Ario ikañoigaka pashinipage ikematsaigakeri Jeso.

Ikenkitsavagetakera Pavoro Korintoku

18 ¹Impogini iponianaa Pavoro Atenaku iatanakera Korintoku.

²Ario kara ineapaakeri paniro jorio paitacharira Akira timavetacharira Pontoku. Ikyakenka pokankitsi iponiaka Itariaku itentakaro itsinanetsite opaita Pirishira. Ipokantaigakarira ontitari yogishigaigakeri koveenkari Karaorio, teranika inkogaenika intimaigaera jorioegi Iromaku. Impo iatake Pavoro ivankoku ineaiigakerira ³ovashi itimuntevagetake imuvageigakerira yantavageigakera. Ariotari ikañoigakariri iriroegi intitari vetsikavagetatsirira kamisapanko. ⁴Omirinka kutagiteri apishigopireantagani-rira iatapinitake pankotsiku yapatoitan-taigarira jorioegi ikenkitsatimovageigake-rira iriroegi intiegiri terira iriroegi jorioegi kameti inkematsatagaigakeriniri.

⁵Impogini iroro yogonkeigapaakara Surashi intiri Timoteo iponiaigakara Maseroniaku yogari Pavoro ariompatyo ipirininivasanovagetanakerori ikenkitsavagetanakera ikamantasanoiga-kera jorioegi ikanti:

—Yogari Jeso inti pogiaigavetakarira, irirotari ikantakerira Tasorintsi intigan-kakerira imegakempara Agoveenkarie-gite.

⁶Impo iriroegi ikisaiganakeri ikakitsai-ganakeri ikantaigiri:

—iGaratyo nokematsatumaigimpi, vintitari tsoenti!

Nerotyo ipotetantanakarorira Pavoro imanchaki kameti irogoigakeniri onti iokaiganakerira ganigera ipirininiventai-gairi inkenkitsatimoigakerira, ariokya iriatanake parikoti, impo ikantaigiri:

—Nokantaigavetakempi tera pinkemaige. Maika tsikyata pinkañoitaka-gantaiganakempa viroegi pinkamaigakera gara naro kañotagantaigimpi. Irorenti maika irirokya noatashiigake terira iriroegi jorioegi nonkenkitsatimoigakerira.

⁷Irore ikantaiganakerira iatanake ivankoku Tishio Goshito pinkatsatiririra Tasorintsi. Ogari ivanko onti apipankote-takaro yapatoitantaigarira jorioegi.

⁸Impo paniro tinkamitatsirira pankotsiku yapatoitantaigarira ikematsatakeri Atinkami. Irirori onti ipaita Kirishipo. Ario ikañoigaka itaneegi intiegiri aikiro tovaini Korintokunirira ikemaigavake-rora Iriniane Tasorintsi ikematsaigakeri Atinkami ovashi yogiviatagantaigaka.

⁹Impogini ikisanivagetake Pavoro tsitenigetiku inei ikoneatimotakeri Atinkami ikantiri: “Gara pitsarogi. Ariompatyo pinkenkitsavagetanakeri gara papakuimati. ¹⁰Nonkantakanitari nontentakempi gara tyara ikantumai-timpi, aiñotari aka tovaini kematsaigake-nanerira.” ¹¹Ovashi itimake Pavoro Korintoku 18 kashiri yogotagantavageta-kera Iriniane Tasorintsi.

¹²Antari aiñokyara inake kara, yogari Sesa itigankakeri inampina paitacharira Garion ineagetakenerira magatiro Akayaku. Impo yogari jorioegi yapatoventaiganakeri Pavoro yagaigana-keri yamaiganakerira iriroku ¹³ikantai-giri:

—Yokari yoka onti ipirininiventavageta-nake ikenkitsatanakera ikantaigakerira maganiro inkematsaigakerira Tasorintsi, kantankicha inkañoigakerorika maika ikantaigakeririra ontityo irovetsikaiga-nake okantavitantaganirira.

¹⁴Iroro irinianakemera Pavoro iniamatanaketyo Garion ikantaigiri jorioegi:

—Gara poverajaigana. Antari ariome inkoshitakeme ontririka irogantakeme ario pinkante nonkemaigakempime. ¹⁵Kantankicha tera ario inkañotero maika, onti pikisaviigakeri yogotagaigakempira ikantatigutaigakempirora pogotagantaigirira. Tsikyatyato pinkantaigakeri viroegi. Narori gara tyara nokantumatiri.

¹⁶Impo itigankaigairi. ¹⁷Impo irirokya ishonkateiganaka Soseneshi ikisaiganakerira. Irirori inti pashini tinkamitatsirira pankotsiku yapatoitantaigarira. Yagaiganakeri ipasapasaigakeri. Ineaigavetakarityo Garion, kantankicha teratyto tyara inkantumagete.

Ipiganaara Pavoro Antiokiaku

¹⁸Impogini otovaigagitetanakera yogari Pavoro iniaiganairi irapigematsaegine iatanai itentanakaro Pirishira intiri Akira yomateiganaka pitotsiku yamaatakoiganake iriaigakera Suriaku, kantankicha iaigapanuti Senkereaku yogaragitotapanutara Pavoro kameti intsatagakeroniri ikantakeririra Tasorintsi ikantiri:

“Impogini nontsatagakerorika nokantakempirira, nogaragitotakempa.” Impogini yomateiganaa yamaatakoiganai. ¹⁹Impo yogonkeigapaaka Epesoku ario kara aguitanai Pirishira intiri Akira. Yogari Pavoro iatapanuti pankotsiku yapatoitantaigarira jorioegi ikamantaigapanutirira patoitaigankicharira. ²⁰Impo iriroegi ikantaigavetavakari gatatara iati kantankicha irirori ipintsatanaa iriataera ²¹nerotyo iniantaiganaaririra ikantaiganairi:

—Ariorika inintake Tasorintsi ario nompigake noneaigaatempira.

Ovashi yomatetanaa iatanaira.

²²Antari yagatakotapaakera Sesareaku yaguitanake iatakera Jerosarenku ineaigakitirira kematsaigatsirira. Impogini iatanai Antiokiaku.

²³Impogini iatanai ikenagetanai Garashiaku ontiri Pirijiaku ishintsitagaiganakerira maganiro kematsaigatsirira inkematsatasanoiganakerira Atinkami.

Ikenkitsavagetakera Aporo Epesoku

²⁴Impogini yogonketaka paniro jorio Epesoku iponiaka Arijantiriaku. Irirori onti ipaita Aporo, inti pairorira yogovageti ikenkitsavagetira, aikiro yogotasano-tiro itsirinkakagantakerira Tasorintsi pairani. ²⁵Irirori yogotagunkani magatiro ikantakerira Joan Giviatantatsirira ikamantakotakerira Jeso, nerotyo yogotagantavagetakera ikenkitsatakotasannotakerira yogikoneatanovagetakerotyto kara, kantankicha intagatityo yogovetaka yogotagantirira Joan yogiviatantavageti. ²⁶Antari yogonketakara Epesoku, iatake pankotsiku yapatoitantaigarira jorioegi ikenkitsatimoiganakerira maganiro tera intsarogumate, kantankicha iroro ikemaigavakerira Akira ontiri Pirishira yamaiganakeri parikoti yogotagasanoiganakerira ikamantaigakerira yogari Jeso inti ikantakerira Tasorintsi intigankakerira irogavisaakotantakera. ²⁷Impogini ipintsatanakara iriatakera Akayaku yogaegiri irapigematsaegine ikantaigakeri kametitake iriatakera inkenkitsavagetakera anta, impo iriroegi itsirinkaigakeneri kematsaigatsirira timaigatsirira Akayaku ikantaigakerira kametikyara iragaigavakeri. Impogini yogonketapaakara ishintsitagaigapaakeri maganiro ikavintsajaigakerira Tasorintsi ikematsatantaigakaririra. ²⁸Yogemisantai-ganakerityo maganiro jorioegi patoitai-gankicharira, katinkatari yoganakero magatiro, ontitari ipampiatanake Itsirinkakagantakerira Tasorintsi pairani ikamantakotanakerira Jeso ikantakera inti Ikogakagakerira Tasorintsi intigankakerira impegakempara Igovenkariegite, nerotyo tyampatyto inkantaigete iriroegi.

Ipiganaara Pavoro Epesoku

19 ¹Antari ainiokyara Aporo Korintoku iatanai Pavoro ishonkagetanaaro otishipage ipiganaara Epesoku. Ineaigapaakeri kematsaigatsirira tera intovaige ²impo ikantaigapaakeri:

—¿Ario ipokake Isure Tasorintsi itimasurentaigakempira vikyankara kematsaigankitsi?

Ikantaigiri:

—Tera nonkemakotumaigeri intimera Isure Tasorintsi.

³Ikantaigiri Pavoro:

—Irorenti itatampatyto oitara pogiviatashiigakara?

Iriroegi ikantaigi:

—Onti nogiviatashiigaka kameti nontsatagaigakerora yogotagantanakerira Joan Giviantatsirira.

⁴Impo ikanti Pavoro:

—Antari yogiviantakera Joan inti yogiviaigake kogaigankitsirira irapakuai-ganakerora yovetsikageigira terira onkametite inkematsatasanoiganakerira Tasorintsi, kantankicha ikantaigavakeri aikiro inkematsaigakerira impogitapaan-kitsinerira, irirotari Jesokirishito.

⁵Impo ikemaigakera ikantaigakerira ovashi yogiviatagantaigaka iokotagan-taiganakara arisano ikematsaigakeri Atinkami Jeso. ⁶Impo yogari Pavoro ipatikaigakeri igitoku ovashi ipokapaake Isure Tasorintsi itimasuren-taigapaakerira itsitiantaiganakarorira iniantaiganakarora pashinipage niagantsipage terira inkemumaigero.

⁷Yogari yogiviaigakerira inaiigake 12.

⁸Impogini iatapinitake Pavoro yapatoitaigara jorioegi ikenkitsavageta-kera ikamantakotasanotakerira Tasorintsi tyara ikantaka ikavintsaantavageta-kera itigankantakaririra Jesokirishito inkamaventaigakerira maganiro kameti irogavisaakoigakerira kematsaigakerine-

rira imegakempara Igoveenkariegite. Ario ikañotakero maika ovashi agavage-tanaka mavani kashiri. ⁹Kantankicha impogini ikonogagarantaigaka ikisaiga-naka, tera inkogaigenika inkematsaiga-kera onti ikantaiganakeri maganiro:

—Tera onkametite yogotagantirira yoga. Yogari Jeso teranika iriro Gavisaakotantatsirira ikantakerira Tasorintsi intigankakerira.

Irorotari iparikotitantanaaira Pavoro itentaiganakari kematsaigatsirira iaiganakera pankotsiku yogotagantira Tirano. Ario yogotagantavagetake kara omirinka kutagiteri ¹⁰niganki agavagetanaka piteti shiriagarini, nerotyo maganiro timaigatsirira Ashiaku ikemakotantaigakaririra Tasorintsi tyara ikanta yogavisaakotan-tira. Ikemaigake maganiro jorioegi intiegiri aikiro terira iriroegi jorioegi.

¹¹Yogari Tasorintsi yagaveakagagema-tanakeri Pavoro yovetsikagetanakera terira oneimagetenkani, ¹²nerotyo yairikumatakerora pañoirontsipage ontiri kamisapage impo yamakagantai-gakeneri mantsigaigankitsirira ogatyo ikenaiigake yovegaiganaa. Ario ikañoiigaka itimaguigavetakarira kamagarinipage yovegaiganaa, ikontei-ganaketari timaguigavetakaririra.

¹³Kantankicha itimagarantaigake pashini jorioegi yanuvageigake yoneaganontai-gakarira matsigenkaegi itimaguigakerira kamagarini. Impogini ikogaigavetaka inkañoiigakemparimera Pavoro yoneaga-getarira kamagarinipage onti yaventa-shiigakari ivairo Jeso, nerotyo ikantan-taigakaririra itimagutakerira: “iMaika naventashiigakempiro ivairo Jesokiri-shito ikenkitsatakotirira Pavoro nonkan-taigakempira konteiganee piaigae!”

¹⁴Ario ikañoiigakero maika itomiegi Eseva. Irirori inti itinkamiegi saseroro-teegi. Yogaegiri itomiegi inaiigake 7.

¹⁵Impo agaka kutagiteri imaigavetakara

iriroegi yaventaigavetakarora ivairo Jeso ironeaganontaigakemparimera paniro itimagutakerira kamagarini, kantankicha yogari kamagarini ipugamatanakari ikantiri: “Naro nogotake Jeso inti gaveavagetatsirira, aikiro yogari Pavoro nokemakotiri, kantankicha ¿tyanimpatyo viroegi?”

¹⁶Impo yogari matsigenka itimagutakerira ishigateigamatanakaritoyo yavetakai-ganakerira ikavichovichogakeri yagaveai-gakeri itisarasaratakoigakeri, nerotyo ishigantaiganakarira nogatsantsapageniro.

¹⁷Iroo ikemakoigavakerira maganiro timaigatsirira Epesoku ogatyo ikenaigake itsarogavageiganaketyo kara. Ario ikañoigaka jorioegi intiegiri aikiro terira iriroegi jorioegi, nerotyo ipinkatsatasano-tantanunkanirira Atinkami Jeso ikantanunkanira paio yagaveavageti.

¹⁸Impogini ipokaigake tovaini kematsaigankitsirira ikamantakoiganakerora magatiro yovetsikageigakerira terira onkametite. ¹⁹Ipokaigake aikiro tovaini matsikanariegi yamaigakerora isankevantiegite itagaigakerora. Apatotakara magatiro ariorika opunataka 50,000 koriki. ²⁰Ariompa itovaigavagetanakeri kematsaigiririra Atinkami, aikiro ariompatyo ikematsatasanoiganakerori Iriniane Tasorintsi, ineigakerotari arisano okantasanoti. ²¹Impogini Pavoro ipintsatanaa iriataatera Jerosarenku inkenanakera Maseroniaku ontiri Akayaku, ikantaketari: “Noatakerika Jerosarenku ovashi noavagetake Iromaku.” ²²Kantankicha tekya aiñokya iriate, iketyo yogiivaigake Timoteo intiri Erashito iriaigakera Maseroniaku. Iririroegi intiegitari mutakoigiririra.

Ikisantaigakera Epesokunirira

²³Impogini yogari Epesokunirira ikisavitantagakero Niagantsi Kametiri.

²⁴Inti kañotagantakero Irimetirio pitanka-

vetatsirira perata. Irirori intitari vetsikavagetatsirira otyomiatirira pankotsi ikañotagarora ovanko itasorintsiegite Epesokunirira paitacharira Aretemisa. Yogari tavagetimoigiririra yagantasanovageigaro koriki. ²⁵Yapatoitantaigakaririra aikiro kañoigaririra irirori pitankavageigatsirira perata ikantaigiri:

—Viroegi pogoigitari irorotari agantagari koriki avetsikantavageigarira.

²⁶Kantankicha maika pineaigake yoga Pavoro ikenkitsavagetanakera ikantakera yogari tasorintsiyape yovetsikaigirira matsigenka tera iriroegi Tasorintsisanorira, pikemaigakeritari viroegi. Maikari maika itovaiganake timaigatsirira aka Epesoku kematsaigakeririra. Kantankicha tera patiro inkañotero aka, ontityo itsotenkagiteanakero aikiro magatiro Ashiaku. ²⁷Okari kañorira maika teratyo onkametite, onti ganige agantaigaaro koriki, aikiro ovanko Aretemisa onti ovashigantanakenkani ganige oshineventaagani. Ario onkañotakempa Aretemisa irorori. Maikari maika ontitari ishineventavageigaro maganiro timaigatsirira aka Ashiaku intiegiri aikiro timageigatsirira parikotipageku, pairotari okametiti.

²⁸Iroo ikemaigavakera ikisaigamatanakatyo kara ikaemavaitaigamatanaketyo ikantaigi:

—iPairo okametiti Aretemisa!

²⁹Ishigavioigamatanakatyo maganiro timaigatsirira kara iaigakera pankotsiku kakaratsenkoari apatoitanganirira inoshikaiganakerira Gayo intiri Arishitariko yamaiganakerira iriroegi aikiro. Piteniro iriroegi intiegi kematsaigatsirira ponიაigankicharira Maseroniaku itentavageigarira Pavoro ikenkitsavagetira Niagantsi Kametiri. ³⁰Yogari Pavoro ikogavetaka iriatakemera irirori, kantankicha yogari irapigematsaegine ikantaigavakeri:

—Gara piati.

³¹Ario ikañoigaka itinkamipage Ashiakunirira ikonogagarantaigaka ikantakagantaigakeri ganiri iati yapatoitaigakara. Ikantantaigakaririra intiegitari iamigogite. ³²Antari yapatoitaigakara ikaemavaitaiganake, pashinikyatyto kantatigaigavakero, kantankicha itovaigavageti terira irogoige tatarika yapatotashiigaka. ³³Impo yogaegiri jorioegi ineaigutarityo Arijantero ario inake irirori kara ovashi yagaiganakeri yogaigakerira niganki kameti irironiri niankitsine. Impo irirori yogaenokavakovetanaka kameti inkemisaantaigakeniri maganiro iriniaigakerimera. ³⁴Kantankicha iroro ineaigakerira inti jorio ariompatyo ikaemasanoiganakeri ariorika piteti ora ikantaigakera:

—iPaïro okametiti Aretemisa! iPaïro okametiti Aretemisa!

³⁵Impo yogari itinkami Epesokunirira iroro yagaveaigakerira yogemisaantaigakerira ikantaigiri:

—Viroegi Epesokunirira, kemisaantaigena, magatitotari apagiteakovagetaka ogotaganira aroegi antiégi sentaigirorira ovanko tasorintsi Aretemisa ontiri aikiro mapu shigirorira irorori poniankicharira enoku ashiriakara pairani. ³⁶Tera intimaigenika kantatigaigeronerira, irorotari nokantantaigakempirira kemisaantaige. Gara tatoita povetsikumaigi intagarogiteni oketyo pisuresatanoigakemparo. ³⁷Yogari yoga pamaigakerira tera tyara inkantumaiigenika iriniashinaigakemparora atasorintsiegite. ³⁸Kantaigerityo Irimetirio intiegitari tavagetimoigiririra aiñorika ikogaigakerira inkisaigakerira kantetyo iriaigakera ikanomaantira joese iroro kemisaantaigakerine, irorotari itimashitake inkantagakerira tyanirikara kañotankicha, aikiro tyanirikara terira inkañotempa maika. ³⁹Kantankicha aityorika pashini pikogaigakerira pinkantaigakera atsi pogiaigakera agakempara kutagiteri

nampatotantaigakemparirira kemisaantaigakempinerira impo ario piniaigake.

⁴⁰Maikari maika intagarogiteni kantakarikatyo itsoeventaigarika koveenkariku, ineiri irorori apatotashiigaka ampugai-ganakemparira ganigera akematsaigairi impo inkogakotagantaigakaerika tatoita apatotashiigaka tyampa ankantaige.

⁴¹Iroo ikantakera yapakuaigairi iriaigaera.

Iatakera Pavoro Maseroniaku

20 ¹Impogini ipegageiganaara ikaemavaitaigakera, yogari Pavoro yapatoitaigakeri irapigematsaegine ikantaiganakerira atanatsira inkematsasanoiganakera, impo iniaiganairi iatanakera Maseroniaku. ²Ikenagetanai iatutira karanki iniaiganakerira irapigematsaegine ishintsitagaiganakerira inkematsasanoigakerira Kirishito ovashi yogonkevagetaka Gereshiaku. ³Ario itimanake kara mavani kashiri. Impo iroro iromatetanakempamera pitotsiku iriatakera Suriaku ikemakoigakeri jorioegi isariaigakari irogaigakerira, ipigantanaarira Maseroniaku. ⁴Inti itentaiganaka Sopatere (itomi Piro poniankicharira Vereaku), Arishitariko intiri Segonto (poniaigankicharira Tesaronikaku), Gayo (poniankicharira Irereveku), Timoteo, Tikiko intiri Toropimo (poniaigankicharira Ashiaku). ⁵Iriroegi iivaiganakena yogiaigakenara Toroashiku. ⁶Impogini avisanaira vieseta ogantaganirira pan terira onkonogempa opoegantarira nomateiganaka pitotsiku noponiaiganaka Piripoku. Impogini avisanakera 5 kutagiteri nogiaigavairi Toroashiku. Ario nomagaiganake patiro tominko.

Inakera Pavoro Toroashiku

⁷Impogini agakara kutagiteri apishigopireantaganirira napatoitaigaka notentaigakarira napigematsaegine

nonkotagaigakerora pan nogaigakempa-
rora nosuretakoigaemparira Kirishito
ikamaventaigakaira. Impo ikenkitsava-
getanake Pavoro ovashi inigankigiteta-
kovagetanake, yogotaketari onkutagite-
tanaera iriatanae. ⁸Onti nonaigake
omenkotakara enoku nomorekaatakoi-
gaker. ⁹Ario inake kara ikyaenkarira
gaenokanankicha paitacharira Eotiko,
ipirinitake ovenakitakara. Samanitari
ikenkitsavagetake Pavoro ipochokimata-
naketyo ovashi imaganake. Iroro
imagasano vetanakara yashiriamatana-
katyo akyo itsatake savi ikantavageta-
kyo tign. Iaigavetaka inoshikaigavetari
paa kamake. ¹⁰Kantankicha yogari
Pavoro yaguitanake inoshikakeri
yavinatakeri ikantaigiri maganiro:

—Gara pitsarogaigi, ataketari
yanianai.

¹¹Impogini yatagutanaira ikotagakero
pan ipaigakerira maganiro. Impo
ikenkitsavagetanai aikiro niganki
ikutagitetakovagetanake ovashi iatanai.

¹²Yogari Eotiko itentaiganaari ivankoku
kañotasanotaa ovashi ishinevageiga-
naka maganiro.

Iatanakera Pavoro Miretoku

¹³Naroege noivaiganake namaatako-
ganake pitotsiku noaigakera Asoku
nagaiganaerira Pavoro, irirori ontitari
ikenanake avotsiku. ¹⁴Impogini
noneaigairira Asoku yomatetakoiga-
naana noaiganake Mitireneku. ¹⁵Okuta-
gitetanaira noaiganai navisaiganakero
Kio. Iroro omavatanakara kutagiteri
nagatakoigapanuti Samoshiku. Impogini
noaiganai aikiro ariokya nagatakoigapa-
nuti Miretoku. ¹⁶Patiro nogaiganakero
tera nagatakoige Epesoku, tera
inkogenika Pavoro impeguntevagetem-
para Ashiaku. Ontitari itsatimatanake
tsikyari irogonketempa Jerosarenku
irogavisakerora Pentekoshite.

Pavoro iniaiganairira sentaigiririra kematsaigatsirira timaigatsirira Epesoku

¹⁷Antari nonaigakera Miretoku
itigankake Pavoro inkantaigakiterira
sentaigiririra kematsaigatsirira timaiga-
tsirira Epesoku. ¹⁸Impo ipokaigapaakera
ikantaigavakeri: “Viroegi pogoigake
tyara nokantakita notimimoigutimpira,
pogoigaketari onti nonegintevagetaka
pairani nakyara pokankitsi aka Ashiaku
kigonkero maika. ¹⁹Omirinka nokenki-
tsatakovagetakari Atinkami. Tera
naventakotumatempa, onti niragatsika-
naigakempi, aikiro natsipereakovage-
taka ikogaigavetakara irogaigakenamera
notovaireegi. ²⁰Tera nampakuimaigero
nokamantaigakempira nogikoneaiga-
kempirora magatiro, nogotagaigakempi
pinaigakera yapatovageigara ontiri
pinaigira pivankoegiku. ²¹Aikiro nogota-
gaigakeri notovaireegi intiegiri aikiro
terira iriroegi notovaireegi nokantaiga-
kerira inkantatigaiganakempa
irapakuaiganakerora ikañovageigara
inkematsaiganakerira Tasorintsi intiri
Atinkami Jeso. ²²Maika noatanake
Jerosarenku, intitari tigankakena Isure
Tasorintsi. Tera nogote tatarikara
gakenane. ²³Intagati nogotake ikamanta-
kenairira Isure Tasorintsi, ikantakenatari
omirinka tyarika kara noatakera
nonkenkitsavagetakera irashitakoita-
kena, aikiro iratsipereakagavageitakena,
²⁴kantankicha naro tera nontsarogumate
maani, tera nompinkeronika nogamane.
Intagati nokogake nontsatagakerora
magatiro ikantagetakenanira Atinkami
Jeso nonkenkitsavagetakera Niagantsi
Kametiri nonkamantaigakerira maganiro
tyara ikanta Tasorintsi ikavintsaantava-
getira yogavisaakotantira.

²⁵“Maika nogotasanotake gara
pineimaigaana maganiro viroegi,
gatakenatari nokenkitsatimoigakempira

nokamantakotakerira Tasorintsi tyara ikantaka ikavintsajaigakaira kameti ankematsaigakeriniri Jesokirishito impegakempara Agoveenkariegite. ²⁶Maika aïñorika kara terira inkematsaige teraty naro kañotagantaigerine. ²⁷Nokenkitsatakogetakerotari magatiro ikantagetirira Tasorintsi tera nomanakotumate maani. ²⁸Irorotari nonkantantai-gakempirira tsikyata pineaigaempa viroegi. Pinkantakanira pisentaigaeri maganiro kematsaigiririra Tasorintsi pogotagaigakerira Iriniane, intitari kantaigakempi Isure pinkañoigakempara maika. Pisentasanoigakerira pinkaño-tagaigakerira ovisha isentasanotaganira, ikamaventaigakeritari Atinkami ipunaventantaigakarira iriraa. ²⁹Naro nogotasanotake iroro noatanaera iripokashiiganakempi matagavageiga-charira irogitivarokaigakempira inkañoigapaakempirira matsontsori gitivarokagiririra ovisha. ³⁰Aikiro pinkonogagaran-taigakempa viroegi pogotagantaiganake terira iroro arisanorira pamatavinaiganakerira papigematsaegine viroeginiri irogiatakoiganake. ³¹Kantankicha naro nonkantaigakempi tsikyanira yamatavinitimpikari irapakuakagaitakempira ganigera pikematsaigai. Gara pimagisan-taigiro omirinka nogotagaigimpira kutagiteriku ontiri tsitenigetiku niragatsikanaigakempi ovashi nomavatakovagetanaka shiriagarini.

³²“Maika, napigematsaegine, nonkantakeri Tasorintsi irisentasanoigaempira. Kematsatasanoigero Iriniane kamantaigakairira ikavintsaavageigakaira irirori, irorotari ishintsitagantaigakempirira. Impogini irapatoitaigakempi anta itimira irirori, pintentaiganakempirira maganiro yogavisaakoigakerira imagisantairora ikañovageigara. ³³Narori teraty nonkogumate impunaitakenara nokenki-savagetira impaitakenara koriki ontirika

kamisa. ³⁴Tsikyatatari nantashivageta naro nagagetira nokogakogetarira, aikiro nopaigirira mutakoiganarira. Viroegi pineasanoigakenatari. ³⁵Onti nokañotakero maika kameti pogiatakoigakenaniri pinkavintsaavageigerira kogakovageigan-kicharira. Pinkenkiaigaerora ikantanakerira Atinkami Jeso ikanti: ‘Pairo avisake okametitasanotakera pinkavintsaantava-geigakera avisakero vintiegira inkavintsaavageitake.’”

³⁶Iroo yagatanakera ikantaigakerira itigeroanaka iniakerira Tasorintsi itentaigakari maganiro. ³⁷Impo iragaiganaka maganiro yavinaigavairi yasaraanaigavaarira. ³⁸Ikenkisureavageiganaka ineigakera ikantaiganairira gara ineimaigairi. Impo yamampiaiganakeri yogaigakitirira omarane ku pitotsi ikamaguigavairira yomatetanaara.

Iatanakera Pavoro Jerosarenku

21 ¹Iroo noniaiganairira napigematsaegine nomateiganana pitotsiku namaatakoiganaira, patiro nogaiganakero Koshiku. Ario nomagaigapaake kara. Impo okutagitetanaira noaiganai ariokya nomagaiganai Irorashiku. Antari okutagitetanaira aikiro noaiganai ariokya nomagaiganai Pataraku. ²Ario noneaigapaakero omarane pitotsi atankitsinerira Penishiaku ovashi nomateiganaka. ³Impo namaatakoiganake noaiganakera Suriaku. Noneventaikoiganakaro Tsipere, onti onantaka oatakara nampateku. Impo nagatakoigananuti Tiroku iroguitaiganakerora arakintsipage. ⁴Ario kara noneaigapaakeri kematsaigatsirira, iriroegi yagaigavakena ovashi nomagimoiganakeri patiro tominko. Antari nonaigakera kara yogari Isure Tasorintsi iniasurentaigakeri iriroegi ikantantaigavetakaririra Pavoro: “Garakari piati Jerosarenku.” ⁵Kantankicha irirori tera inkematsaigeri. Impogini

noniaiganairi noaiganaira. Maganiro iriroegi ontiri itsinanetsiegite intiegiri itomiegi yamampiaiganakena otsapiaku agatakera pitotsi. Notigeroaiganaka noniaigakerira Tasorintsi. ⁶Impogini noniaiganairi nomateiganara noaiganaira. Iriroegi ipigaiganaa ivankoku.

⁷Patiro nogavageigakero Toremairaku ario nagatakoigapaake kara, impo noaiganake noneaigakerira napigematsaegine, patiro nomagimoiganakeri. ⁸Okutagitetanaira noaiganai Sesareaku nogonkeigapaaka ivankoku Jeripe kenkitsatirorira Niagantsi Kametiri. Irirori inti itovaire kavintaavageigiririra kematsaigatsirira ikogakagunkanirira okyara impirininventa-vageigakerira impaigakerira iseka kogakovageigankicharira timaigatsirira kara Jerosarenku. ⁹Aiño 4 irishintoegi tekyenkarira ineimaigero surari. Iroroegi ontiegi kamantakoigiririra Tasorintsi.

¹⁰Antari nomaguntevageiganakera tovaiti kutagiteri ipokake kamantakotiririra Tasorintsi paitacharira Agavo.

¹¹Irirori iponiaka Joreaku onti ipokashitake ineiaigakitenara. Impo yaganakeri isuntoratsate Pavoro yogusotanaka igitiku ontiri irakoku ikanti:

—Ikanti Isure Tasorintsi: ‘Ario inkaño-tagaiakeri jorioegi Jerosarenkunirira irogusoigakerira shintaririra yoka isuntoratsate impo iramaiganakeri inkisaigakerira terira iriroegi jorioegi.’

¹²Iroko nokemaigavakera naroege intiegiri timaigatsirira Sesareaku nokantaigavetakari Pavoro:

—Garakari piati.

¹³Kantankicha irirori ikanti:

—¿Antari gara piragaiga?, onti pikenkisureakagaiganakena. Tera nompinkumateronika irogusoitakenara. Irirorikara kogankitsine Atinkami Jeso nonkamaventakerira anta Jerosarenku garatyo nagamaimataro nogamane.

¹⁴Nokantaigavetakari kantankicha tera inkematsaigena, napakuantaigana-karirira intagati nokantaigakeri:

—Irirompatyo Tasorintsi tatarikara ikogake.

¹⁵Impogini novetsikaiganaka noaiganakera Jerosarenku. ¹⁶Yogiatagarantaignanakena napigematsaegine timaigatsirira Sesareaku, impo yamaiganakena ivankoku Maso nomagimoigapaakerira. Irirori onti iponiaka Tsipereku. Inti igantagarira ikematsati pairani.

Pavoro ikamosotakerira Santiago

¹⁷Antari ineiaigavaanara napigematsaegine nogonkeigaara Jerosarenku, ishinevageiganaa. ¹⁸Okutagitetanaira itentaiganakena Pavoro noaigakitira nokamosoigutirira Santiago. Ario inaigake kara maganiro sentaigiririra kematsaigatsirira yapatoitaigakara. ¹⁹Yogari Pavoro ikamantageigapaakeri magatiro yagavea-kagagetakerira Tasorintsi ikenkitsatimoi-gakerira terira iriroegi jorioegi. ²⁰Iroko ikemaigavakera ikantaiganake:

—iPairo ikavintsaanti Tasorintsi!

Impo ikantaigiri Pavoro:

—Kametitake, kantankicha aiñoegi itovaigavageti ashaninkaegi kematsaigakeririra Kirishito, onti ikogaigake ontsatagasanotanankenkanira itsirinkakotanakerira Moiseshi. ²¹Iriroegi ikemakoigakempi pogotagageiganakerira jorioegi timaigatsirira parikoti konoiigaririra terira iriroegi jorioegi kameti ganigera itsatagaigairo itsirinkakotanakerira Moiseshi. Aikiro pikantaigakerira ganigera yogaratsaigairo ichonkirimeshinate itomiegi, aikiro ganigera yogiatakogairo ikantaigakerira yashikiiganakairira. ²²¿Tyampa ankantaigakempa? Maika inkemakoigavakempira irapatoventaigapaakempi inkisaigakempira. ²³Irorotari maika nokogantaigakarira povetsikakera nonkantaigakempirira. Aiño aka 4

atovaireegi panikyarira intsatagaigakero ikantaigakeririra Tasorintsi karanki.

²⁴Noneaigake kametitake pamaiganakerira ivankoku Tasorintsi pintentaigakemparira pisaankaigakempara pimpunaventaigakenerira tatarika inkogakoigakempa irisaankaigaempara kameti irogaragitotagantaigakempinari. Pinkañotakerorika maika iroro ineantaigakempa maganiro onti itsoeventaitakempi kogapage, aññokyatari pitsatagiro itsirinkakotanakerira Moiseshi. ²⁵Kantankicha yogari kematsaigankitsirira terira iriroegi jorioegi notsirinkaigakeri karanki nokantaigiri gara yogumaigaari ivatsa ipaigavetunkanirira ipegagetaganirira tasorintsi kogapage, gara yogumaigaaro iriraapage yogagetaganirira, gara yogumaigaari ikatikagetaganirira, aikiro gara iatashitumaigairo tsinane terira iroro irashi.

Yashitakotunkanira Pavoro

²⁶Antari okutagitetanaira yogari Pavoro itentaiganakari garagitotagantaigankichanerira iaigake ivankoku Tasorintsi isaankaigakara. Impo irirori ikiye tsompogi ikamantakerira saserorote tyatirikara kutagiteri ontsontakanta-naempa isaankantaigakarira kameti iripokaigakera paniropage garagitotagantaigankichanerira iramaigakera piratsipage irovetisakagantaigakerineririra Tasorintsi.

²⁷Impogini panikyara ontsontakanaempa oga 7 kutagiteri isaankantaigakarira, yogari jorioegi poniaigankicharira Ashiaku ineaigakeri Pavoro ivankoku Tasorintsi ikantaigakaririra maganiro inkisaiganakerira. Impo yagaiganakeri ²⁸ikaemavaitaiganake ikantaigi:

—Notovaireegi, iatsi tainakario mutakovageigenanityo! Yogari yoga Pavoro onti ipiriniventavageti yanuiventavageti rora yogotagaigakerira maganiro kantankicha onti ikantaigakeri inkisaiga-

kaera aroegi iseraereegi, aikiro ikantaigakeri ganigera itsatagaigairo itsirinkakotanakerira Moiseshi, ontiri aikiro ikantaigakeri kametitake osamatsanatakenkanira ivanko Tasorintsi. Aikiro yamaigakeri terira iriroegi jorioegi yogiagaigakerira ivankoku Tasorintsi isamatsanaigakerora.

²⁹Ikantantaigakarira maika ontitari ineaigakerira inkaara itentavagetakarira Toropimo poniankicharira Epesoku ineaigiri ariori itentanakari irirori ivankoku Tasorintsi.

³⁰Ovashi ikisaiganaka maganiro ishigaigapaaka yagaiganakerira Pavoro inoshikaiganakerira soororo yamaiganakerira sotsi. Ikatimaigakero yashiigakerora shitakomentontsi togn. ³¹Impo ipasapasaigakeri irogamagaigakerimera, kantankicha irorotyto ikamantunkanira itinkami soraroegi ikisaigakara maganiro Jerosarenkunirira ikaemavaitaigakera, ³²irirori yapatoitaigamatanakerityo isoraroegite intiegiri itovaire itinkamiegi ishigasanovageiganakatyto iaigakera inkamosoiguterira. Iroro ineaigavakerira iriroegi yapakuaiganakeri Pavoro tenige impasaigaeri. ³³Yogari itinkami soraroegi yaiñonitapaakari Pavoro yagapaakeri yogusotagantakeri piteti karenatsa. Impo ikantaigiri kisaigakeririra:

—¿Tyani yoga? ¿Tatoita pikisaviigakeri?

³⁴Kantankicha iriroegi ariompatyto ikaemavaitaiganakeri ikantatigagiseiganakerotari iriniane pashinikya kantatigaigavakero tera patiro inkantaige, nerotyto tera inkemasanoigeri itinkami soraroegi, yamakagantantakaririra Pavoro itimaigira soraro. ³⁵Iroro yagaiganakerora yatagutapiniigira soraroegi, ikompiigamatanakerityo yogaenokaiganakerira ganiri yagaigavakeri kisaigankicharira. ³⁶Yogiaigapaakeritari ikaemaigapaakera:

—iKante inkamakera!

Iniaiventakara Pavoro

³⁷Impo yagaigapaakerora sotsimoroku iniamatanaketyo Pavoro ikantiri itinkami soraroegi:

—Nokogavetaka noniakempira.

Ikanti irirori:

—¿Matsi pogotiro viro iriniane guriegoegi? ³⁸¿Matsi teratyo viro yoga Ejipitokunirira pugatakiririra koveenkari maiganakeririra 4,000 gantaigatsirira anta osarigagitetapaakera?

³⁹Ikanti Pavoro:

—Naro nanti jorio onti nomechoti Tarisoku pairorira avisagetakero okemakogetaganirira Surishiakutirira. Atsi kante noniaigakerira patoitaigankicharira.

⁴⁰Yogari itinkami soraroegi ikantiri:

—Nani.

Impo yaratinkanake Pavoro yatagutapiniigira soraroegi yogaenokanake irako inkemisantaigakeniri maganiro. Impo ineaigakerira ikemisantaiganakera iniaiganakeri evereoku ikanti:

22 ¹“Notovaireegi, kemisantaigavakena noniaiventakempara.”

²Ikemaigavakerira iniantanakarora evereo ikemisantasanoiganake. Impo ikanti Pavoro:

³“Narori nanti jorio, onti nomechoti Tarisoku nankitsirira Surishiaku, kantankicha onti yogimonkaitana aka Jerosarenku. Inti gotagavagetana Gamariere magatiro yogotagantaigirira yashikiiganakairira. Omirinka nokematsatanovagetiri Tasorintsi nokañoigimpira viroegi maika. ⁴Karanki pairo nokisashivageigakari kematsaigiririra Jesokirishito. Namaiganakeri surariegi ontiri tsinaneegi irashitakoigakenkanira irogaigakenkanira.

⁵Yogari itinkamisanorira saseroroteegi intiegiri atinkamipage yogotasanoigake arisano nokantasannotake maika, iriroegitari paigavakenaro sankevanti namaiganakenerira atovaireegi timaigatsirira

Iramashikoku kameti nonkogaigakiterira kematsaigatsirira namaigakerira Jerosarenku nonkisakagantaigakerira.

⁶“Kantankicha iroo nagavagetanakerora ochoenitapaakara Iramashiko atake ikatinkatanai poreatsiri. Katsiketyo noneatigirotyo okantamatanake tsaarere oponiapaaka enoku opokagutapaakena naroku osaatsantsaganake. ⁷Nashiriana nagavayoteku nokemi ikantaitapaakena: ‘Saoro, Saoro, ¿antari gara pikisana?’ ⁸Narori nokantutariyo: ‘¿Tyanimpatyora viro, Notinkami?’

Ikantana: ‘Naro nanti Jeso Nasarekunirira pikisashitakarira.’ ⁹Yogari notentai-ganakarira ineaigavakerora okantana-kera tsaarere itsarogavageiganaketyo kara, kantankicha tera inkemaigeri niakenarira. ¹⁰Narori nokanti: ‘Notinkami, ¿tatoita pikogake?’ Ikanti irirori: ‘Maika tinaanake piatakera Iramashikoku, ario inkantaitakempi kara magatiro tatarikara pimpirininivagetake.’ ¹¹Antari noneakerora okantana-kera tsaarere ovashi tera noneae, nerotyo onti ikatsaiganakena notentaigakarira yamaiganakenara Iramashikoku.

¹²“Ario itimi kara paniro paitacharira Ananiashi. Irirori ipinkatsatanotiri Tasorintsi itsatagetirora itsirinkakotakerira Moiseshi. Imirinka jorioegi timaigatsirira kara Iramashikoku ikantaigake pairo ikametiti. ¹³Impo ipokuti irirori inekitanara. Antari yogonketapaakara ikantapaakena: ‘Napigematsatene Saoro, neanae.’ Ogatyo nokenake noneanai ovashi noneakeri. ¹⁴Impo ikantakena: ‘Yogari Tasorintsisanorira ikematsaigirira yashikiiganakairira ikogakagakempi pairani kameti pogotakeniri magatiro tatarikara oita ikogagetirira. Ikogakagekempi kameti pineakeriniri Pairorira Ikametiti, aikiro pinkemisantakerira iriniakempira. Irirori inti terira inkañoavagetumatempa. ¹⁵Viro

pinkenkitsatakotakeri pogotagaigakerira maganiro matsigenkaegi pinkamantakogetakerora magatiro pineagetakerira ontiri aikiro pikemagetakerira. ¹⁶Maikari maika atsi kaviritanakenityo pogiviatagatakempara pinkantakerira Atinkami irisaankakerora pikañovagetara.’

¹⁷“Impogini nopigaa Jerosarenku noatake ivankoku Tasorintsi noniavagetakerira. Impo nonei ontinirika okañotimotakena nogisanireku. ¹⁸Ikoneatimotakena Notinkami ikantana: ‘Piatepage parikoti pintsatimatanakera. Akari aka Jerosarenku pinkenkitsatakovetakenatyogaratyo ikematsaigimpi.’ ¹⁹Narori nokanti: ‘Notinkami, iriroegi ineasanoigakenatari karanki noagetakera yapatoitan-taigarira jorioegi namaiganakerira kematsaigimpirira nashitakotagantaigakerira. nopasapasatagantaigakerira.

²⁰Kañotari karanki yogunkanira kenkitsatokitimpirira Ishitivano ario nonake nara nara noshinevagetaka noneakera ipitankunkanira, neroty noneantaigainiririra imanchaki gaigakeririra.’ ²¹Kantan-kicha irirori ikantana: ‘Piate, nontigankakempira samani pinkenkitsatimoigakerira terira iriroegi jorioegi.’”

²²Antari ikyara kenkitsatanankitsi Pavoro ikemisantaigavetakaniroro maganiro, kantankicha iroroty ikemai-gakerira ikañotakerora maika ikaemai-gamatanaketyo:

—iKante inkamakera! iTera nonkoge intimaera!

²³Ariompatyo ikaemaiganakeri isapokaiganakarora imanchaki enokutirira yovuokaiganakerora enoku vuo vuo, ontiri aikiro yovuokavanekiigana-kerora kipatsipane. ²⁴Yogari itinkami soraroegi yogiagakagantakeri Pavoro tsompogi impasatagantakerira kameti iriniakeniri intsavetakera tatarikara ikisaviigakeri. ²⁵Iroto yogusoigavetakera impasaiigakerimera inianake Pavoro

ikantiri inampina itinkami soraroegi aratinkankitsirira kara:

—¿Matsi pagaveake pimpasataganta-kerira iromano ipugamentavintsatirira Sesa tekyara inkogakotagantasanoten-kani kameti ogotakenkaniri arisanorika yovetsikake terira onkametite ontirika tera?

²⁶Iroto ikemavakera iatake ikamanta-kitirira itinkami ikanti:

—Tsikyanira pipasatagantirrikari, intiraty iromano ipugamentavintsatirira Sesa.

²⁷Ovashi iatake inakera irirori ikantiri: —Atsi kantena. ¿Arisano viro vinti iromano?

Ikanti:

—Jeeje, arisanoniroro nanti iromano.

²⁸Ikantiri:

—Narori onti nopunaventaka tovaini koriki nompegakempara iromano.

Ikantiri Pavoro:

—Narori nantityo iromanosanorira, kantakanatari nomechotakera.

²⁹Ogatyo ikenaigake itsarogaiganake pasaigakerinerimera, ovashi yontainai-ganakari. Ario ikañotaka itinkami soraroegi irirori itsaroganake ineakera yogusotagantakerira iromano.

Yamanunkanira Pavoro inkogakotagantakenkanira

³⁰Impo okutagitetanaira ikogakera itinkami soraroegi irogotasanotakera tatarikara ikisaviigakeri jorioegi itsaakotagantairi igarenatsate ikaemakagantagakeri itinkamiogi saseroroteegi intiegiri maganiro itinkamipage jorioegi yapatoitaigakeri inkogakotagantaigakerira Pavoro, impo yamanakeri yogaratinkapaakeri inaigakera iriroegi.

23 ¹Yogari Pavoro yogaiganakeri kavako ikantaigiri:

—Notovaireegi, narori nokantakani nokematsatasanotirira Tasorintsi,

nonegintetasanovagetakatyo kara kigonkero maika.

²Ario inake kara itinkamisanorira saseroroteegi paitacharira Ananiashi. Iro-ro ikemavakerira ikantaigiri naigankitsirira Pavoroku:

—Patosavaganteteri.

³Kantankicha irirori ikantiri:

—iVirompatyo impatosake Tasorintsi, virori ontitari pikametitamampegaka kogapage! Pine maika onti pipirinitashive-taka aka pimpampiatavakerora itsirinkakotanakerira Moiseshi kameti pinkantakera ariorika novetsikake terira onkame-tite ontirika tera. Kantankicha maika teraty ario pinkañotero maika, ontityo pikogake povetsikakera okantavitantagani-rira pimpatosavagantetagantakenara.

⁴Yogari naigankitsirira kara ikantaigiri:

—¿Antari gara pikañotiri maika itinkamisanorira isaseroroteegine Tasorintsi?

⁵Ikanti Pavoro:

—Notovaireegi, nogotakemera iriro itinkamisanorira saseroroteegi gamerorokari nokañotiri maika. Okantitari Itsirinkakagantakerira Tasorintsi: ‘Gara pipugatsaigari pitinkamiegi.’^s

⁶Irirori ineaketari ikonogagarantagaka intiegi saroseoege, pashinikya intiegi pariseoege neroty iniantaigakaririra imaraenkarikatyo kara ikantaigiri:

—Notovaireegi, narori nanti pariseo, intitari tomintakena pariseo, kantankicha maika onti pikisaviigakena nokantakera iraniaiganaera kamaigankitsirira.

⁷Iro-ro ikantakera maika ogatyo ikenaiage iniaiganake yakanatavakagaiganakara pariseoege intiegi saroseoege ikisavakagaiganakara.

⁸Ikantaigaketari saroseoege gara yaniaiganai kamaigankitsirira. Ikantai-gake aikiro mameri isaankariite Tasorin-

tsi, aikiro mameri isure matsigenka.

Yogari pariseoege ikantatigaigaka, onti ikantaigake iraniaiganaera kamaigankitsirira, aikiro aino isaankariite Tasorintsi, aikiro aityo isure matsigenka.

⁹Ariompatyo ikaemavaitaiganakeri maganiro. Ikaviritagarantaigamatanakaty pariseoege gotagantaigirorira itsirinkakotanakerira Moiseshi ikantaigi:

—Noneaigakeri tera tatoita irovetsikumate terira onkamete. Irirorakari niakeri pashini tatarika iita intirika isaankariite Tasorintsi.

¹⁰Iriroegi ariompatyo ikisavakagaiganakari tyarika, neroty ineantakarira itinkami soraroegi itsarogakaganakari Pavoro ikanti ontirorokari intinkaragaraigakeri ikaemakagantantaigakaririra isoraroegite iramaiganaerira tsonpogi irashitakoigaeirira. ¹¹Antari okutagitetanaira impo ochapinitanaira aikiro yogari Atinkami ikoneatimotakeri Pavoro ineiri ikenapaake ikantiri: “Shinetanaempa, gara pitsarogi. Kañotari pikenkitsatakotakenara aka Jerosarenku, ario pinkañotagakero anta Iromaku.”

Isariavetunkanira Pavoro irogakenkanira

¹²Okutagitetanaira ikonogagarantagaka jorioegi ikemavakagaigaka isariaiganakarira Pavoro irogaigakerimera ikantaigi: “Kante inkisashiigakenara Tasorintsi garika nogaigiri Pavoro. Maika gara nosekatumaigaa, aikiro gara noviikumaigaa. Antari nogaigakeririka ario pinkante nosekataigaempa.”

¹³Ariorika inaigake 40 sariaigakaririra irogaigakerira. ¹⁴Iatashitantaigakaririra itinkamiegi saseroroteegi intiegi itinkamiegi jorioegi ikantaigakerira:

—Naroegi nokemavakagaigaka nokantaigakera: ‘Kante inkisashiigakenara Tasorintsi garika nogaigiri Pavoro.

Garatyo nosekataigaa kigonkero nogaigakerira.’ ¹⁵Maika viroegi piaigakera pamatavinaigakerira itinkami soraroegi pinkantaigakerira iramaigana-kempirira Pavoro kameti pinkogakotagantanoigakeriniri. Naroegi nontimashiigavakeri avotsiku nogaigavakerira.

¹⁶Kantankicha impo iroro ikemakotavakerira iritineri Pavoro iatake inkamantakiterira. ¹⁷Iroro ikemavakera irirori ikaemakera inampina itinkami soraroegi ikantiri:

—Neri yoka notineri. Atsi tentanakeri pitinkamiku kameti inkamantagetakeriniri.

¹⁸Iatake itentanakeri ikantapaakeri:

—Yogari Pavoro shitakotankicharira ikantakena nontentakempirira yoka iritineri ikogake inkamantagetakempira.

¹⁹Irirori ikatsatanakeri yamanakeri parikoti ikantiri:

—Atsi kamantena.

²⁰Irirori ikanti:

—Nokemaogakeri jorioegi ikogaigakera iramatavinaigakempira inkantaigakempira kamani pamaiganakenerira Pavoro itinkamipage inkogakotagantanoigakerira. ²¹Kantankicha gara pikematsaigiri, aiñoegitari inaiwake ariorika 40 timashiigavakerineririra irogaigavakerira, ikantaigaketari: ‘Kante inkisashiigakenara Tasorintsi garika nogaigiri Pavoro. Maika gara nosekatumaigaa, aikiro gara noviikumaigaa. Antari nogaigakeririka ario pinkante nosekataigaempa.’ Maika aiño yogiakoigaka tyarika pinkante.

²²Iroro ikemavakera itigankairi ikantavairi:

—Maika gara tyani pikamanti.

²³Impo ikaemaigakeri piteni inampina ikantaigakeri:

—Kaemaigeri soraroegi pampatoitai-gakerira. Agaigakera 200 nuitaiganankitsinerira. Impo agaigake aikiro 70 shigakoiganankichanerira kavayoku,

impo aikiro 200 pagoiganankitsinerira igamashire. Impo onchapinitasanotanakera pamaiganakerira Pavoro Sesareaku. ²⁴Maika povetsikaigakenerira kavayo irishigakotantanakemparira kameti pogonketagaigakempariniri itimira Perishi inampina Sesa.

²⁵Ipaigavakeri sankevanti itsirinkakeneririra Perishi okanti:

²⁶Naro Karaorio Irishia notsirinkakempiro viro Perishi inampina Sesa pairorira pavishi pogovagetira: ¿Aiño vi kametikyarika pinake? ²⁷Maika nokogake nonkamantakotakerira yoga Pavoro yamaiganakempirira soraroegi. Yogari jorioegi yagaigakeri ikisaigakerira ikogaigavetaka irogaigakerimera, kantankicha narori iroro nokemakotakerira inti iromano noatake notentainanakari nosoraroegite nopugamentairira. ²⁸Impogini nokogake naro nogotakera tatarika oita ikisaviigakeri, irorotari namantavetanakaririra anta yapatotaigakara itinkamipage. ²⁹Impo iriroegi ikamantaigakena onti ikisaviigakeri ineaigakera tera intsatagero itsirinkakotanakerira Moiseshi, kantankicha narori noneakeri mameri tatampa irashitakovitakenkani ontirika irogakenkanira. Ontityo isariaigavetakari kogapage. ³⁰Nerotyo iroro nokemakotavakerira isariaigakarira jorioegi irogaigakerimera notigankantakaririra viroku. Aikiro nokantaigakeri kisaigakeririra iriaigakera, tsikyata inkamantaigakitempi.

³¹Impogini yogari soraroegi itsataganoigakero ikantaigakeririra. Iroro onigankigitetanakera yagaigapanutiri Pavoro yamaiganakeri Antipatirishiku. ³²Impo okutagitetanaira yogari soraroegi nuitaigankitsirira ipigaiganaa Jerosarenku. Yogari shigakoigankicharira kavayoku iriro tentaiganakari Pavoro. ³³Impogini yogonkeigapaakara

Sesareaku ipaigapaakeri Perishi
sankevanti impo ikantaigiri:

—Neri yoka.

³⁴Yagatanakera iniavantakerora
sankevanti ikantiri Pavoro:

—¿Tyara pitimi viro?

Ikanti:

—Onti notimi Surishiaku.

Nerotyo ikemakera onti itimi
Surishiaku ³⁵ikantiri:

—Impogini iripokaigakerika kisaiga-
kempirira ario nonkemisantavakempi
tyarika pinkante.

Ovashi ikantaigakeri soraroegi iramai-
ganakerira itimavetara Erorishi inkama-
gutasanoigakerira ganiri ishiganaa.

Iniaventanakara Pavoro

24 ¹Impogini avisanakera 5
kutagiteri yogonketapaaka
Ananiashi. Itentaigakari itinkamiegi
jorioegi intiri pashini matsigenka
niaventaigakerineririra. Irirori onti
ipaita Teritoro. Onti ipokashiigake
inkantaigakerira Perishi tatoita ikisavi-
gakeri Pavoro. ²Yogari Perishi ikaema-
kagantakeri Pavoro impo yogonketapaa-
kara inianake Teritoro ikantiri Perishi:

³—Naroegi noshineventavageigakempi-
tyo kara noneaigaketari paio pavishi
pinegintevageigakenara pitimakagaigake-
nara kameti, tera tyani veraavageigenane,
pairotari pikavintsavageigakena. ⁴Maika
gara noveraasanotimpi, intagati nokogake
pinkemisantakenara maani nonkamanta-
kempirira. ⁵Yogari Pavoro inti pairorira
yoveraantavageti, aikiro iatake yapagitea-
nakarora inianiaigakerira noshaninkaegi
ovashi ikisavakagaiganaka yontainavaka-
gaiganakara. Irirori intitari itinkami
kematsaigiririra Jeso Nasarekunirira.

⁶Iatake ivankoku Tasorintsi ikogavetaka
isamatsanatakeromera, irorotari nagantai-
gakaririra. Impo nokogaigavetaka
nonkisakagantaigakerimera nompampiai-

gavakeromera itsirinkakotanakerira
Moiseshi, ⁷kantankicha ipokake Irishia
itinkami soraroegi yagapitsaigakenari.
⁸Ikantaigakena tyanirika kisaigakeririra
Pavoro iripokaigakera inkantaigakempira
tatoita ikisaviigakeri. Maikari maika
virompatyo, pikogakerika pinkogakota-
gantakerira kogakotaganterityo kameti
pogotakeniri tatoita nokisaviigakeri.

⁹Imirinkatyo jorioegi tentaigakaririra
ikantaiganake:

—Arisanoniroro ikantasanotake.

¹⁰Impo yogari Perishi itimeroakitashi-
takari Pavoro ikantiri:

—Nani nianake viro.

Impo inianake Pavoro ikanti:

—Noshinevagetaka pinkemisantake-
nara noniaventanakempira, noneakempi-
tari pipegani pairani nojoesegite
kigonkero maika. ¹¹Maika nokogake
nonkamantakempira maganiro yogoigake
atake avisanake 12 kutagiteri noatutira
Jerosarenku noniitirira Tasorintsi.

¹²Tyarikara nonake ontirika ivankoku
Tasorintsi ontirika pankotsiku yapatoitan-
taigarira noshaninkaegi ontirika apatoge-
tara pankotsi tera tyara nonkantumaigeri
naigankitsirira kara kameti onkenanta-
kemparora nonkisavakagaigakempira
ontirika inkisavakagaigakempira iriroegi.

¹³Nerotyo tyampa iragaigakero irogiko-
neaigakerora inkantaigakera arioniroro
ineagakena novetsikakera ikantaigake-
rira maika. ¹⁴Kantankicha maika
nokogake nonkamantakempira arisano
ikantasanoigake narori onti nokematsa-
keri Jesokirishito, kantankicha iriroegi
ikantaigake gametyo ikematsatagani
teranika ario imponiempa Tasorintsiku.
Kantankicha tera paniri nonkematsateri
irirori, nokematsakerityo aikiro
Tasorintsisanorira ikematsaigirira
yashikiiganakenarira, aikiro notsatagage-
takero magatiro itsirinkakotanakerira
Moiseshi, aikiro nokantake onti arisano-

rira magatiro itsirinkakoiganakerira kamantantaigatsirira. ¹⁵Ariotyo nokañoigakari iriroegi nokematsaigakerira Tasorintsi nokantaigira iraniaiganaera maganiro kamaigankitsirira. Iraniaiganae vetsikaigirorira kametiripage intiegiri aikiro vetsikaigirorira terira onkametite. ¹⁶Irorotari nokogantakarira nonkantakana nongintevagetakempa kameti ineakenaniri Tasorintsi intiegiri maganiro matsigenkaegi nanti negintevagetacharira.

¹⁷“Narori onti notimuntevagetakiti parikoti. Impogini avisanakera tovai shiriagarini nopiganaa Jerosarenku namaiganakenerira koriki noshaninkaegi kogakovageigankicharira ontiri aikiro nompakerira Tasorintsi nokashigakakaririra. ¹⁸⁻¹⁹Impogini nagatavagetakera nosaankavagetakara anta ivankoku Tasorintsi ipokaigake noshaninkaegi ponaiigankicharira Ashiaku ineai gapaakena, kantankicha tera ompanivatumate irapatoventaigenara matsigenka, aikiro tera nonee nonkisavakagumaigempara. Iriroegimetyo pokaigankitsine maika inkantaigakempira tatoita ikisaviigakena ineai gakenarika novetsikakera terira onkametite. ²⁰Atsi kantaigerinityo maika yogaegi ineai gakenarika novetsikakera terira onkametite chapi nonakera yapatoitaigakara itinkamipage notovai reegi. ²¹Impo irororakari ineai gakera nokaemanakera nokantanakera: ‘Onti pikisaviigakena nokantakera iraniaiganaera kamaigankitsirira.’”

²²Yogari Perishi ikemakotasanoigakeritari kematsaigiririra Jesokirishito, nerotyo iroro ikemavakerira Pavoro ikanti:

—Maikari intagatikya. Impogini iripokaikerika Irishia iriro kamantasanotakenane.

²³Impo ikantanakeri inampina itinkami soraroegi:

—Manakeri pashitakotakerira, kantankicha gara pikantaviigiri iripoka-

pinii gaatera iamigoegite ineapiniigaaterira iramaigaenerira tatarika oita ikogakogetaka.

²⁴Impogini avisanakera tovaiti kutagiteri ipokai Perishi itentakaro itsinanetsite. Irorori onti joria paitacharira Iroroshira. Impo ikaemakagantakeri Pavoro inkemisaigaigakerira inkamantakotakerira Jesokirishito. ²⁵Kantankicha iroro ikemavakerira itsarogamata-naketyo kara, ikantakeritari negintevagetakempara ishintsitashitakerora magatiro terira onkametite, aikiro ikamantakeri impogini agakempa kutagiteri inkisashitantaigakemparirira Tasorintsi kañovageigankicharira, ovashi ikantakeri:

—Maika intagatikya pikamantana. Piatae, antari garira tatoita nopirininventavageti ario nonkaemakagantaempi impo nonkemaempira pinkenkitsatakera. ²⁶Intitari yogiakovetaka koriki impakerira kameti irapakuainerini, nerotyo ikaemakagantapinitantaririra iriniaerira. ²⁷Ario ikañotakero maika ovashi avisavagetanake piteti shiriagarini. Impogini irirokya pugairi Poroshio Peshito. Yogari Perishi ontitari ikogakera irogishineai gakerira jorioegi nerotyo tera irapakuai.

Iniaventaara Pavoro

25 ¹Impo ipokapaake Peshito Sesareaku. Antari omavatana-kara kutagiteri iatanake Jerosarenku. ²Iroo yogonketapaakara ipokashiigakeri itinkamisanorira saseroroteegi itentaigakari pashini itinkamipage jorioegi ikantaigapaakerira tatoita ikisaviigakeri Pavoro. ³Impo ikantaigakeri:

—Nokogaigake pagakagantakerira Pavoro iramakenkanira aka.

Ontitari ikantashiigake kameti intima-shiigavakeriniri avotsiku irogaigavakerira. ⁴Kantankicha Peshito ikanti:

—Yogari Pavoro aĩnotari yashitakotun-kani Sesareaku. Narori nompiganaetari shintsi. ⁵Maika kantaigerityo pitovaireegi tinkamiigatsirira irogiagianakenara kameti inkamantakoigakeriniri tatarika yovetsikake. Arisanorika yovetsikake terira onkametite inkamantakoigakerityo.

⁶Impo yogari Peshito inakiti ariorika patiro tominko, impo ipiganaa Sesareaku. Iroko okutagitetanaira iatake ipirinitakera ikanomaantapinitira ovashi ikaemakagantakeri Pavoro. ⁷Iroko ikiapaakera yaiñoniigapaaka jorioegi poniaigankicharira Jerosarenku itsoeventaigakarira posante. ⁸Kantankicha irirori iniaventanakatyio ikanti:

—Tera tatoita novetsikumate, aikiro tera nonkantatigumatero itsirinkakotanakerira Moisesi. Tera novetsikumate terira onkametite ivankoku Tasorintsi, aikiro tera nosamatsanatumateri koveenkari Sesa.

⁹Kantankicha yogari Peshito ikogakeri irogiashineigakerira jorioegi ikantiri Pavoro:

—¿Pikogake piataera Jerosarenku kameti nonkogakotagantasanotakempiniri?

¹⁰Ikanti Pavoro:

—Oga ariometyo pinkogakotagantasanotakena aka, ariotari ikantakeri koveenkari Sesa onkogakotagantantakenkanira aka. Pogotasantaketari viro tera tyara nonkantumaigeri jorioegi kameti inkisaigakenaniri. ¹¹Antari virorikara neakena novetsikakera terira onkametite kantetyo irogaitakenara, nonkemisantakotanakempaty garaty tyara nokantumati. Kantankicha antari terika arisano one ikantaigakenarira gara tyani gaveatsi impimantakenara irogaitakenara. Ariompaty noatakeri Sesaku, irirori kogakotagantasanotakenane.

¹²Yogari Peshito ikogakotagantaigakeri itentashiigarira ikanomaantira

ineakera tyarika inkantaige iriroegi. Impo ikantiri Pavoro:

—Irokoventira pikogavintsatakera inkogakotagantakempira Sesa ariotyopiatake iriroku.

Yamanunkanira Pavoro Aguripaku

¹³Impogini yogari koveenkari Aguripa iatake Sesareaku itentanakaro Verenise ineakiterira Peshito. ¹⁴Antari inaigakera anta yogari Peshito ikamantakeri ikantiri:

—Aĩño aka paniro jorio yashitakotagantanakerira Perishi. ¹⁵Antari noatutira Jerosarenku yogari itinkamiegi saseroro-teegi intiegiri itinkamiegi jorioegi ipokaigake naroku ikamantaigakenara tatoita ikisaviigakeri ikogaigavetaka nogakagantakerimera. ¹⁶Kantankicha narori nokantaigakeri yogari iromanoegi tera irogantavageigenika kogapage, onti ikaemakagantaigiri kisanigaigankitsirira intiri ikisashiigakarira iriniaventaiganakempara inkemaigakerira maganiro.

¹⁷Nerotyo iroko ipokaigakera iriroegi aka tera nogisamanitero, irotyo okutagitetanakera nogenanekyatyo noatake nopirinitakera nokanomaantapinitira nagakagantakerira Pavoro.

¹⁸Okyara nonei ariori inkantaigakena yovetsikake ikantavitantirira Sesa, kantankicha tera ario inkañogero maika. ¹⁹Intagati inkantaigakena tera intsatagero ikogagetirira itasorintsiegite, aikiro iniakoigakeri paniro kamankitsirira ikantaganirira Jeso, kantankicha yogari Pavoro irirokya kantatsi atake yanianai. ²⁰Narori tyampaty nonkante ovashi nokemisantaenkatanake, impo nokantiri Pavoro ikogakerikara iriataera Jerosarenku inkogakotagantakenkanira. ²¹Kantankicha irirori tera inkoge, onti ikogake iriatakera Sesaku iriro kogakotagantakerine, ovashi nokantantakarira gara yapakuagani kantakani irinakera

kara kigonkero namakagantakerira anta iriroku.

²²Yogari Aguripa ikantiri:

—Nokogake nonkemakerira naro.

Irirori ikanti:

—Nani, kamani pinkemakeri.

²³Impo iroro okutagitetanaira iatake Aguripa inkemakerira Pavoro itentana-karo Verenise intiegiri itinkamiegi soraroegi intiegiri aikiro itinkamiegi Sesareakunirira yovetsaenkaiganakatyo kara negintetakovageigakatyo. Iroro ikiaigapaakera okanomaantapinitagannira yogari Peshito yagakagantakeri Pavoro ²⁴ikantiri Aguripa:

—Koveenkari Aguripa, vintiegiri maganiro, neri yoga Pavoro ikisaigakerira maganiro jorioegi Jerosarenkunirira intiegiri timaigatsirira aka. Omirinka ikantaiganakena nogakagantakerira. ²⁵Narori noneake tera irovetsikumate tatampa irogavitakenkani, kantankicha irirotari kogankitsi iriatakera Sesaku, irirori kogakotagantagetakerine, irorotari namakagantantakemparirira anta. ²⁶⁻²⁷Kantankicha tyampa nonkante nontsirinkakenerira Sesa nonkamantakerira tatoita ikisavitunkani, mameritari. Antari namakagantavetempari kogapage tyarikarorokari inkante irirori. Irorotari maika nokaemakagantantakaririra kameti pinkogakotagantasanotakeriniri viro ovashi nogotantakemparora tyara nonkanteri nontsirinkakenerira.

Pavoro iniakerira koveenkari Aguripa

26 ¹Impogini inianake Aguripa ikantiri Pavoro:

—Nani, niaventanakempa.

Yogari Pavoro yogaenokanakero irako inianake ikantiri:

²—Koveenkari Aguripa, nogotake pikemakoigakeri yogaegi noshaninkaegi ikisaigakenara ikantaigakenara posantepage. Maikari maika noshinevagetaka

noniakempira noniaventakempara.

³Viro pogotasanotitari tyara nokantaiga naroege jorioegi, aikiro pogoti tatoita nokisavitantaigi tera nonkemavakagiegempa. Irorotari nokogantakarira pinkemisantasannotakenara.

⁴“Naro notimimoigakeri noshaninkaegi pairani notyomiakyanira kigonkero maika. Ineasanoigakena notimakera Tarisoku ontiri aikiro Jerosarenku, irorotari yogotantanoigakarira tyara nokanta. ⁵Nerotyo maika inintaigakerika inkamantaigakempira inkamantaigakempityo. Naro notsititnakero nakyaenkara gaenokanankicha nogiatakotasanoiganakerira pariseoegi. Iriroege paio yavisaigake itsatagasanogirora itsirinkakotanakerira Moiseshi.

⁶Pairani Tasorintsi ikamantaigakeri yashikiiganakenarira iroganiaigaerira kamageigankitsirira. Ario nokañotaka naro nogotake nonkamavetakempa iroganiaena, irorotari ikisantaigakenarira maika notovaireegi. ⁷Arisanoniroro ikantake Tasorintsi iroganiaigaerira kamageigankitsirira, irorotari yogiaigake maganiro iseraereegi, nerotyo ikantakani ipiriniventaigakero intsatagaigakerora ikogagetirira Tasorintsi kameti iroganiaigaeriniri impogini. Irorotari ikisaviigakena maika ineaiigakenara nokañoigakarira iriroege nokantakera nanianaera naro aikiro. ⁸¿Matsi tera ario pinkantaige viroegi iroganiaigaerira Tasorintsi kamageigankitsirira?

⁹“Pairani naro noneavetaka kametimatake nonkisashivageigakemparira nantsipereakagavageigakemparira kematsaigiririra Jeso Nasarekunirira.

¹⁰Ariotari nokañoigakeriri Jerosarenkunirira nokisashivageigakarira nokogakera nashitakoigakerira. Nerotyo nokantaigakaririra itinkamiegi saseroroteegi impaigakenara sankevanti iroroniri naventakempa, impo nashitako-

tagantaigakeri tovaini. Antari yogaigun-kanira noshinevetakatyo kara. ¹¹Ario nokañoigavetakari maika nokisakisaigakerira kameti nampakuakagaigakeriniri ganigera ikematsaigairi Jeso. Tyarika, nokisashivageigakarityo kara, neroty noatashigeigamatirityo parikotipagekunirira nokiashiiganakerira pankotsipageku yapatoitantaigarira namaiganakerira natsipereakagavageigakarira.

¹²“Impogini namanakero sankevanti ipaigavakenarira itinkamiegi saseroro-teegi noatakemera Iramashikoku nagaigutemera pashini. ¹³Kantankicha iroto ikatinkatanakera poreatsiri nokenavetanakara avotsiku, noneatigirotyo okantanake tsaarere ontenenkakotanakena naro intiegiri maganiro notentai-gakarira. Omameatantavagetiratyo kara, avisagetakeroty yomameatantira poreatsiri. ¹⁴Maganiro nashiriaiganaka nogavayoeigiteku. Nokemi ikantaitapaa-kena nonianeku: ‘Saoro, Saoro, ¿antari gara pikisana? Vikiro tsipereakagaacha.’

¹⁵Narori nokantutarityo: ‘¿Tyanimpatyora viro, Notinkami?’ Ikantana: ‘Naro nanti Jeso pikisashitakarira. ¹⁶Maika tinaanake aratinkanake, onti nokoneati-motakempi nonkantakempira nokogake nontigankakempira pinkenkitsatakotakenara pinkamantakotakerora magatiro pineagetakerira maika ontiri aikiro magatiro nokotagagetanakempirira impogini. ¹⁷Nontigankakempi pinkamantaigakerira jorioegi intiegiri terira iriroegi jorioegi. Nompugamentakempi ganiri yagaveaigi irogamagaigakempira. ¹⁸Nontigankakempi iriroegiku pogotagaigakerira kameti irapakuaiganakeroniri isuregisevageigarira posante-page ganigera ikematsaigairi Satanashi irirokya inkematsaiganake Tasorintsi. Inkematsasanoigakenara naro kameti nogavisaakoigakeriniri intentaiagakempirira maganiro nokavintsajaigakerira

nogavisaakoigakerira nomagisantairora ikañovageigara.’

¹⁹“Irorotari maika, koveenkari Aguripa, nokogake nonkantakempira notsatagakerora magatiro ikantakenarira Jeso ikoneatimotakenara anta avotsiku.

²⁰Iketyo nokenkitsatimoigake timaigatsirira Iramashikoku. Impogini nomaiganakeri timaigatsirira Jerosarenku intiegiri maganiro timageigatsirira Joreaku. Nokenkitsatimoigakeri aikiro terira iriroegi jorioegi nokantaigakerira inkantatigaiganakempira irapakuaiganakerora ikañovageigara irirokyaniri inkematsasanoiganake Tasorintsi.

²¹Irorotari yagaviigakena noshaninkaegi ivankoku Tasorintsi ikogaigavetakara irogaigakenamera. ²²Kantankicha imutakenatari Tasorintsi ishintsitagakenara ariompatyo nokenkitsatanakerori Niagantsi Kametiri nogotagaiganakerira maganiro matsigenkaegi tyarika ikantaigaka aikiro tyarika inaigake, ontitari nogotagaigakeri ikantaigakerira kamantantaigatsirira intiri aikiro Moiseshi. Tera nagashitemparo kogapage. ²³Iriroegi ikantaigaketari yogari Ikogakagakerira Tasorintsi imegakempira Igoveenkariegite iseraereegi iratsipereavagetakera impogini inkamavetakempa iraniana. Iketyo ivatanaatsine iranianaera kameti irogoigakeniri maganiro itovaireegi intiegiri pashinirira inaigake onti ipokashitake irogavisaakoigakerira maganiro kematsaigakerinirira imagisantaerora ikañovageigara.”

²⁴Iroto ikemavakerira Peshito ikañotanakerora maika iniaventanakara ikaemamatanaketyo:

—iPavoro, ario pipigatanake! Ontiro-rokari pipirini ventavagetakerora pisankevante ovashi opigataganakempi.

²⁵Ikanti Pavoro:

—Teraty nompigate. Magatiro nokantanakempirira onti arisanorira, tera ario

namatagempa. ²⁶Yogari yoga koveenkari Aguripa irirori pinkante yogotasantiro magatiro, irorotari noshinevegetantakarira ikemakerora magatiro nokantaigakempirira. Yogoti onti arisanorira, ogarika omanakogetakenkani nokenkitsatagogetakerira maika. ²⁷Virori koveenkari Aguripa, ¿tyara pikanti viro? Ogari itsirinkakoiganakerira kamantantaigatsirira pairani ¿iroro arisanorira ontirika tera? Narori nogotake pineakero onti arisano.

²⁸Ikanti Aguripa:

—Maika panikyatyo pinkematsatagakena naro aikiro nonkematsatakerira Jesokirishito.

²⁹Ikanti Pavoro:

—Ariorika maika ontirika impogini naro nokogavetaka pinkematsatakerira, kantankicha gara paniro viro pikematsati, inkematsaigaketyo aikiro maganiro kemisantaigakenarira maika inkañoigakenara naro, kantankicha gara yogusotagani karenatsaku.

³⁰Iroko ikantakera maika ikaviritanaa koveenkari Aguripa intiri Peshito itentaiganaarora Verenise. ³¹Ario ikañoiganaa maganiro itentaigakarira iaigake parikoti iniakoigakerira Pavoro ikantaigakera:

—Noneakeri naro tera tatoita irovetsikumate kameti irogakenkanira aikiro gamerakari yashitakotagani.

³²Impogini inianake Aguripa ikantiri Peshito:

—Game tsikyata ikogi irirori inkogakotagantakerira koveenkari Sesa irapakuaenkanimetyo.

Yamanunkanira Pavoro Iromaku

27 ¹Antari ikantaigakera noaigakera Itariaku inti ikantaigake itinkamiegi soraroegi ikantaganirira “Irashi Koveenkari” iramanakerira Pavoro intentagantaigankempirira pashinipage shitakoigankicharira. Yogari itinkamiegi soraroegi onti ipaita Jorio. ²Impo nomatei-

ganaka omaraneku pitotsi panikyarira oatanake Ashiaku oponiakara Arerami-tioku. Ario notentaigakari Arishitariko irirori. Inti timatsirira Tesaronikaku Maseroniaku. ³Impo okutagitetanaira nagatakoigapaake Suronku. Yogari Jorio itsarogakagakaritari Pavoro ikantakeri iriatakera ineagakerira iamigoegite impageigakerira tatarika ikogakogetaka.

⁴Impogini noaiganaira okakoiganakena tampia nokenaguiganakero nigankivogea Tsipere oatakara nampateku. ⁵Nokenaguiganakero Surishia ontiri Pampiria nogonkeigapaaka Miraku nankitsirira Irishiaku. ⁶Ario kara ineapaake itinkami soraroegi pitotsi poniankicharira Arijantiriaku atankitsinerira Itariaku. Iroko yomatetantaiganakena nomaiganairora aikiro noaiganaira. ⁷Tsikyanisano namatsinkaatakovageiganake namaatakoiganakera nomaguntevageiganake tovaiti kutagiteri. Nopomirintsiigavetanakaro nogonkeigakempamera Jeniroku, kantankicha iroro nogonkeigavetapaa-kara okatinkatanakera Jeniro ogipigakoi-gavakena tampia ariokya nomonteakoi-ganake nigankivogea paitacharira Kereta, onti nokenaiganake ochoenitira Saromon. ⁸Impo nopomirintsiiganaaro aikiro namaatakoiganaira nonkuaiganakarora Kereta kigonkero nogonkevageigapaaka nagatakoigapaakera agatakotapinitaganira paitacharira Kametiri Agatagetira ochoenitakotira Irasea.

⁹Ataketari notovaigakovageiganake kutagiteri noponiaigakara Sesareaku niganki onkanigitetanai, nerotyo paio ogagavagetanaa okoveenkavagetanaira namaatakoiganaera, irorotari ikantaigakaririra Pavoro:

¹⁰—Narori noneakero aiganakerika maika onti antsipereavageiganake. Gara patiro aokajaigi pitotsi ontiri arakintsi-page, ariorika aokajaigakempa aroegi aikiro.

¹¹Kantankicha yogari itinkami soraroegi tera inkematsateri, inti ikematsaigake tsititanakerorira pitotsi intiri aikiro shintarorira. ¹²Antari agatapinitira pitotsi tera onkametitenika inkangiteku, neroty oikogantaigakarira maganiro irimaiganaerora aikiro ineaigakera iragaveaigakerikara irogonkeigakempara antakona anta iragatakoigakera Penishiku irinaigakemera anta kigonkero osariganaera. Antari Penishiku ariotari agatagetiri pitotsi oatara ishonkara poreatsiri. Ario okañotaka aikiro katonko ontiri kamatikya okametitake agatakera.

Otampiavagetanakera tampia

¹³Impogini ineaigavakerora choeni otampiaenkatanake ineaigiri kametita-keri iriaiganakera ompote amakoiganakerira ipintsigakara, ovashi iaiganake ikenaiiganakera otsapiaku. ¹⁴Kantankicha choeni osamanitanake otampiamatanaketyo omarane tampia paitacharira Eoroakiro, okantavagetanaketyo jiriririri ¹⁵okakovageigakena parikoti. Naroegi nokemisantakovageiganaka tyampa nonkantaigavakero. ¹⁶Impogini nokena-koiganake intatonikya pashini nigankivo-gea paitacharira Karaora ario pinkante tesakona ontampiatæ. Nopomirintsiigakaro otyomiatirira pitotsi nopantsaatakoigakerira nomateigakerora. ¹⁷Impo nomateigakerora irorori irorokya yantsuvoaigake nokenantaigakarira ikusotasanoigakerora. Impo iriroegi ipinkaigakerora iragavakoigakempara impanekiku paitacharira Surete itsaageigakero kamisamago yogujiigakerora kameti tsikyataniri amakoiganakena tampia. ¹⁸Kantankicha okutagitevetanaka pairotyo ogagavagetaka otampiavagetakera ovashi yovuokaatagarantaigake arakintsi-gea yamaigavetanakarira. ¹⁹Impogini omavatanakara kutagiteri novuokajaigakero omagantaganirira,

mesapage, magatiro. ²⁰Ogatyo otovaigavagetanake kutagiteri apavatsaasevagetanaka tera inkoneatumatae poreatsiri intiri impokiro-gea. Ariompatyo ogagavagetanakari otampiavagetanakera noneaigiri ariori nokajaigakempa.

²¹Impogini avisanakera tovai kutagiteri tera nosekatumaigaempa, yaratinkanake Pavoro ikanti:

—Viroegitakaniroro, pinkematsaigake-name okyara nokantaigavetakempira ariome antimaiganakeme Keretaku gamerakari atsipereavageigi maika, aikiro gamerakari opegageta magatiro pamageigavetakarira. ²²Maikari maika gara pitsarogaigi. Ontsitigavtanakempatyo pitotsi, kantankicha viroegi gara pokajaigumata. ²³Naro nokematsatasanotiritari Tasorintsi shintasanotanarira. Inkaara nokisanivagetake nonei ikoneatimotakena isaankariite ikantapaakena: ²⁴Pavoro, gara pitsarogi, piatimotakeritari pineakerira koveenkari Sesa. Gara iokaatumata paniro pitentai-gakarira pitotsiku, itsarogakagakempitari Tasorintsi. ²⁵Nonkantantaigakempirira gara pitsarogaigi shineiganakempa. Naro nogotake intsatagakero Tasorintsi magatiro ikantakenarira isaankariite, ²⁶kantankicha onti aokaigakempa nigankivogeaku.

²⁷Impogini avisanakera piteti tominko nonavageigi omaraaniku nia paitacharira Ariria, ogari tampia akyaty amakoigana, akyaty amakoigana. Impogini onigankigitetanakera yogari marineroegi tsitiiganakerorira yogoigavake ochoenitapaakera kipatsi. ²⁸Yogoigavetakaro otsompogiatakera onti onake 36 metero. Impo choeni osamanitanake imaigavetaaro aikiro onti onake 27 metero. ²⁹Itsarogaigamatanaketyo ineaigiri ariori ironksinakakoigakempa mapuku, yoguitantaigakarira otsitiku pitepage asuro kusoatagirorira pitotsi kameti

onkusoatagakeroniri. Yovankinavageigakaty kara ovashi ipirinitaigake yogiaigakerora onkutagitetanaera. ³⁰Impo yogari marineroegi ikogaigavetakara irishigaiganakemera iokaiganakenamera itamampegaigamatanakaroty ioriaigakera irogujiigakerora asuro kusoatagirorira otsovaku, kantankicha ontityo yogujiigavetanaka otyomiatirira pitotsi irishigantaiganakemparomera. ³¹Kantankicha inianake Pavoro ikantaigiri itinkami soraroegi intiegiri isoraroegite:

—Iokaiganakempirika onti pokajaigakempa viroegi.

³²Iroo ikemaigavakera yovatuakoigakero otyomiatirira pitotsi oga okenake akya ashiriaatanaka amaatanakera.

³³Impo iroo okutaenkatanaira yogari Pavoro ikantaigakeri maganiro isekataigakempara ikantaigiri:

—Oga apitevetanaka tominko tera pimagaigae, aikiro tera pisekataigaempa.

³⁴Maika nonkantantaigakempirira pisekataigaempa kameti pishintsiiganaeniri, gatanika tata gaigimpi.

³⁵Iroo yagatanakera ikantakera inoshikanake pan inianakeri Tasorintsi ikotagakero isekatakara. ³⁶Iroo ineaikogakerira itovaireegi ishineiganaa imaiganaka iriroegi aikiro isekataiganaka. ³⁷Napatoitaigakara maganiro nonaigake 276. ³⁸Impo yagataiganakera isekatasanoigakara yovuokajaigakero turigoki kameti aravonkaatasanotanakeniri pitotsi.

Otsitiganakera pitotsi

³⁹Iroo okutagitetasanovetanakara tera irogoige tyarika inaigake, onti ineventakoigakero ochanchaatira, ario otimake impaneki, ikogantaigakarira impankinanaigakemparora ineaigakera iragaveaigakerika iragatakoigakera.

⁴⁰Yovatuakoigakero kusoatagirorira pitotsi iokajaiganakerora. Impo itsaakoi-gakero komarontsi takiatavakerorira.

Impo yogaenokotairo kamisamago otsovaku kameti amakoiganakenaniri tampia impanekiku. ⁴¹Kantankicha amakoigavetanakena, onti okakoigakena parikoti oshintsiatira nia agavasanotantapaakaro impaneki otsova. Ogari otsiti otintsiraanakero ovore.

⁴²Yogari soraroegi ikogaigavetaka irogaigakerimera shitakoigankicharira ganiri yamajaiganake irishigaiganakera.

⁴³Kantankicha yogari itinkami soraroegi tera inkoge intentagantakenkanira Pavoro, ikantantaigakaririra:

—Arione inkañoigake. Tyanirika goigatsirira yamajaigira iketyo ivaiganankitsine iramaataiganakera iragataigaera otsapiaku. ⁴⁴Yogari terira irogoige iramajaigera irairikaiganake inchakotapage ontirika tatarika oita kameti iragataigaeniri.

Ario nokañotagaiganakaro maika nogonkeigakara maganiro otsapiaku.

Itimuntevetanakera Pavoro Maretaku

28 ¹Iroo nagataigaira maganiro nogoigake oga nigankivogea onti opaita Mareta. ²Yogari timaigatsirira kara kametikya yagaigavakena ikavintsajaigakena itagashiigakenara tsitsi nontaenkai-gakera, okatsinkagitetaketari oparigakera inkani. Ikaemaigakena maganiro nontaenkaigapaakera. ³Yogari Pavoro yapatovage-take tsitsi. Iroo itagavetakarora yagutari-tyo maranke irakoku ishiganakara ogishiganakerira tsitsi. ⁴Yogari timaigatsirira kara ineaigavakerira itsatakara irakoku ikantavakagaiganaka: “Irirorokari gantatsirira, neroty yagatavetaaty iokaavetakara maika irirokya gakeri maranke. Ariorakari ikisashitunkani.”

⁵Yogari Pavoro inoshikiri ipotetiri tsitsipokiku, kantankicha tera intavateri. ⁶Iriroegiri ineaigiri ariori irinonanake oga inkenake intuanake inkamanakera, kantankicha yogiaigavetaka kogapage

tera iragaveeri. Ariokya ikantaigake:
“Intirorokari tasorintsi.”

⁷Ario itimi itinkamiegi paitacharira Povurio. Irirori yagaigavakena nomagimoiganakerira mava kutagiteri. ⁸Yogari iriri aiño inoriaka imantsigatakera ikovaavagetanakera ishiavagetanakara. Impo iatake Pavoro ikamosotakerira. Iniaventapaakeri ipatikaitapaakeri igitoku ogatyo ikenake yoveganaa. ⁹Iroto ikemakoigavakerira ipokashiiga-paakeri maganiro mantsigaigankitsirira irovegaigaerira, impo irirori yovegaigairi. ¹⁰⁻¹¹Ario notimaiganake mavani kashiri. Irirorogi ikavintsavaveigakenatyo kara, impogini novetsikavaveigakena noaiganaera ipaigavakena magatiro nokogakogeigakarira. Nomateiganaa pitotsiku poniankicharira Arijantiriaku opaita Tasorintsi Piteanintacharira. Yogari shintarorira itimuntevagetanake kara nigankivogeaku nonantaigakarira naroege yogiakerora osariganaera.

Yogonketakara Pavoro Iromaku

¹²Impogini noaiganake nagatakoigapanuti Surakosaku mavati nomagaiganake. ¹³Impo nomaiganairo aikiro nokenakoiganake otsapiaku nogonkevegeigapaaka Irejioku. Okutagitetanaira otampiaenkatapaake amakovaveigakena nopintsigaikara. Namaatakoigakena piteti kutagiteri nogonkeigapaa-kara Poteoriku. ¹⁴Ario kara noneaigapaake napigematsaegine. Irirorogi yagaigavakena nomagimoiganakeri patiro tominko impo noaiganake nogonkeigapaaka Iromaku. ¹⁵Yogari napigematsaegine Iromakunirira ikemakoigavakenatari ikonogagarantagaka ipokaigake itonkivoigavakenara Pororeapioku. Pashini onti ipokaigake yogiaigavakenara anta okantaganirira Mavati Taverenaku. Yogari Pavoro iroro

ineaigapaakerira iniakeri Tasorintsi ikantakerira ishineventakari ovashi ishintsitanai. ¹⁶Antari nogonkeigapaa-kara Iromaku yogari itinkami soraroege ikantakeri Pavoro kametitake intimakera irashirikoni inkamagutakerira paniro soraro.

¹⁷Impo omavatanakara kutagiteri yogari Pavoro ikaemakagantaigakeri itinkamiegi jorioegi timaigatsirira kara ikantaigiri:

—Noshaninkaegi, tera tyara nonkantumaigeri atovaireegi, aikiro tera nogagumatero ikantaiganakerira yashikiiganakairira pairani, kantankicha irirorogi yagaigakena Jerosarenku impo ipimantaigakena yamaiganakenara iromanoegi. ¹⁸Impo yagataigakera irirorogi ikogakotagantaigakenara ikogaigavetaka irapakuaigaenamera, ineaiaketari tera tatoita novetsikumate tatampa irogaviitakena. ¹⁹Kantankicha yogari atovaireegi tera inkogaige irapakuaigaenara, irorotari nokantantakaririra Peshito nompokakera aka kameti inkogakotagantakenaniri Sesa. Kantankicha tera nonkisaigeri atovaireegi, intagati nokogake noniaventaempara. ²⁰Irorotari nokaemashiigakempi maika kameti noneaigakempiniri noniaigakempira. Naro onti nokañoigakempira viroegi nogiakera aganakempara kutagiteri iraniantaiganaemparira kamageigankitsirira, irorotari pineantaigakenarira maika yogusoitakena karenatsaku.

²¹Irirorogi ikantaigiri:

—Yogari timaigatsirira Joreaku tera impakagantumaigena sankevanti kamantakotakempinerira. Ario ikañoigaka ipokaigakera atovaireegi poniaigankicharira kara tera tyara inkantumaige iriniashiigakempira. ²²Maika nokogaigake nonkemisantaigakempira tyarika pinkantera viro.

Nokemakoigakeritari maganiro atovaireegi ikisaigakeri kematsaigiririra Jesokirishito ikantaigakera gametyo ikematsatagani teranika ario imponiempa Tasorintsiku.

²³Impo iaiganaira ikamantaiganakeri tyati kutagiteri iripokantaigakempa inkemisantasanoigakerira. Impogini aganakara iripokantaigakemparira ipokaigake tovaini ikemisantaigakerira. Irirori itsititanakero ikenkitsatanakera okyara kutagitetamanankitsi ovashi ichapinienkatakovagetanake ikamanta-kotakerira Tasorintsi tyara ikanta yogavisaakotantira ipegakara Igoveenkariegite maganiro kematsaigakeririra. Ikañoiganakeri maika ikogaketari inkematsatagaigakerira, nerotyo ipampiatakotantavakarorira itsirinkakotanakerira Moiseshi ontiri aikiro itsirinkakoiganakerira kamantantaigatsirira ikamantakotakerira Jesokirishito ikantakera inti Ikogakagakerira Tasorintsi intigankakerira irogavisaakoigakerira maganiro kematsaigakerinerira impegakempara Igoveenkariegite. ²⁴Ikonogagarentaigaka ikematsaigakeri pashinikya tera inkematsaigeri. ²⁵Impo iriroegi ineaigakera tera inkemavakagaigempa ovashi iaiganai. Yogari Pavoro ikantagavairi:

—Arisanoniroro ikantasanoti Isure Tasorintsi pairani iniakagakerira kamantantatsirira Isaiashi, impo irirokya kantaigakeri yashikiiganakairira ikanti:

²⁶‘Piate kantaigeri pitovaireegi:

Pinkemaigavetakempatyo kantan-kicha garatyo pikematsatumaigi,

aikiro pineaigavetakempatyo, garatyo pogotumaigi.

²⁷ Kañomatakatarit tenirikatyo

ontimaige isureegi,

aikiro kañomataka ontinirikatyo yaviigakero igempita ganiri ikemumaigi

ontiri aikiro kañomataka ontinirika imatsivokaigake ganiri ineaigiro magatiro yovetsikagetakerira Tasorintsi.

Arisanoniroro kañotasanomataka tenirikatyo ontime isure ganiri ikematsaigi kameti iripokashii-gakenara nogavisaakoigakerira.’

²⁸⁻²⁹Maika nokogake nonkamantasanogakempira irirokya inkenkitsatimoigakenkani terira iriroegi jorioegi inkamantaigakenkanira tyara ikanta Tasorintsi yogavisaakotantira. Iriroegi inkemisantasanogaketyo.

³⁰Yogari Pavoro itimuntevagetake piteti shiriagarini. Omirinka ipunatakeri shintarorira pankotsi kameti irimagantakemparoniri. Iniaigiri maganiro neapiniigiririra ³¹yogotagaigakerira ikamantakotakerira Atinkami Jesokirishito, aikiro ikenkitsatakovagetakeri Tasorintsi tyara ikanta yogavisaakotantira ipegakara Igoveenkariegite maganiro kematsaigakeririra. Tera intsaroge, aikiro tera tyani kantaviterine ikenkitsavagetakera.